

ଯୀଶୁଖ୍ରୀଷ୍ଟଙ୍କ ବିଷୟରେ ମାର୍କ ଲେଖିଥିବା ସୁସମାଚାର ଜିସୁକ୍ରିସ୍ଟର ବିଷୟରେ ମାର୍କ ଲେଖିଲା ନିମାନ୍ କବର ଏ ବଇ ବିଷୟରେ ଜାନ୍‌ବାଟା

ଜିସୁ ମାପୁରୁର ଜିବନ୍ ବିଷୟର ଟିକି ନିକି କାତା କରିରଇବା ନୁଆ ନିୟମର ଚାରିଟା ବଇ ବିତ୍ତରେଅନି ମାର୍କ ଲେଖିରଇବା ସୁବ୍‌କବର୍ ଅଇଲାନି ଗଟେକ୍ । ସେ ଚାରଟା ବଇକେ ସୁସମାଚାର ବଲି କଇବାଇ । ଜନ୍‌ଟାର ଅରଡ୍ କି “ସୁବ୍‌କବର୍ ।” ସେଟା ସବୁ ଜିସୁର ମରନ୍ ପଟେ ମାଡିଉ, ମାର୍କ, ଲୁକ୍ ଆରି ଜଅନର ଲାଗି ଲେକା ଅଇଲା ଆଟେ । ଚାରିଟା ସୁବ୍‌କବର୍ ବିତ୍ତରେଅନି ମାର୍କ ଲେଖିରଇବା ସୁବ୍‌କବର୍ ଅଇଲାନି ସବୁରଟାନେଅନି ସାନ୍‌ଟା । ଏଟାକେ ଏନ୍ତି ମିସା ବିସ୍‌ବାସ୍ କର୍‌ବାଇ ଜେ ଏଟା ସୁବ୍‌କବର୍‌ମନର ବିତ୍ତରେ ଅନି ସବୁର ଆଗୁଡୁ କିରିସ୍‌ଟାଦ ୨୫-୭୦ ବିତ୍ତରେ ଲେକାଅଇଲା । କେତେକ୍ ବାଇବଲ୍ ପଣ୍ଡିତ୍‌ମନ୍ ବିସ୍‌ବାସ୍ କର୍‌ବାଇ ଜେ ରମ୍ ଦେସେ ରଇବା କିରିସ୍‌ତାନି ମନ୍‌କେ ସାର୍‌ଦା କରାଇବାପାଇ ବଲି ରମ୍‌ଦେସେ ଏଟା ଲେକାଅଇଲାଆଟେ । ମାର୍କ, ଜେ କି ଜଅନ୍ ମାର୍କ ବଲି ଜାନିରଇଲାଇ । ସେ ପାଉଲ୍ ଆରି ବରନ୍‌ବାସର୍ ସଙ୍ଗାରି ରଇଲା, ମାଡର୍ ଜେଡେବେଲେ ସେ ସେମନ୍‌କେ ମାପୁରୁର ସେବା କାମର୍ ଲାଗି ଜିବାକେ ଚାଡି ଆଇଲା, ସେଡେବେଲେ ସେମନ୍‌ର ନାଉଁ ବଡି ବଡି ଆଇଲାବେଲେ, ଦୁକର୍ ବେଲା କେଟ୍‌ଲା ପେରିଡ୍ ୧୩:୧୩ କେଡେ ବରସ୍ ଗାଲାପଟେ ମାର୍କ ଆରିତରେକ୍ ବରନ୍‌ବାସର୍ ସଙ୍ଗ୍ ଜିବାକେ ଆରାମ୍ କଲାଇ ପେରିଡ୍ ୧୫:୩୭-୩୯ । ମାର୍କ ମିସା ପିତରର୍ ଗଟେକ୍ ନିଜର୍ ମଇତର୍ ପାରା ବଲି ଜାନିରଇଲାଇ ୧ ମ ପିତର୍ ୫:୧୩ । ମାର୍କ ଜିସୁର ଜିବନେ ଅଇରଇବା ସବୁ ବିଷୟର ସାକି ନ ରଇଲେ ମିସା, ପଣ୍ଡିତ୍‌ମନ୍ ତାକେ ବିସ୍‌ବାସ୍

କରୁବାଇ । ସେ ପିତର ସାକ୍ଷିଦେଇରଇବା ବିସଇ ନିଜର ସୁବକବର
 ତେଇ ଲେକିଆତେ । ମାର୍ଚ୍ଚକ ସିସୁଅଇଲାଟା ଆରି ସାରାସାରି
 ବେଲେ ଅଇରଇଲା କାତା ଜିସୁର ସିକିଆ ତେଇ ଜାନାଇଲାଆତେ
 । ଏ ମାର୍ଚ୍ଚକ ବଇଟାନେ ଜିସୁ କିରିସ୍ଟକେ ଗଟେକ୍ ଦରମ୍
 ଚାକର ଆରି ପର୍ମେସର୍ ଜଜ୍ଜନା କଲାଟା ପୁରାପୁରୁନ୍ କରବାକେ,
 ସବୁବେଲେ ତିଆର୍ ଅଇରଇବା ଆଲାଦର୍ ପିଲାପାରା ଜାନାଇଆତେ
 । ସେଟାରପାଇ ମାର୍ଚ୍ଚକ ଜିସୁ କରରଇବା କାବାଅଇଜିବା କାମର୍
 ବିସଇ ଅଦିକ୍ ଲେକିଲା । ସାରାସାରି ସେ ଗୁଲାଇ ଜଗତେ ମାପୁରୁର୍
 କାତା ସୁନାଇବା ଗଟେକ୍ ମଆନ୍ ଆଦେସ୍ ସଙ୍ଗ୍ ଏ ସୁବକବରର୍
 ଲେକା ତେବାଇଆତେ ।

ବିତ୍ତରେ ରଇବାଟା

୧. ତୁବନ୍ ଦେଉ ଜଅନ୍ ଆରି ଜିସୁର୍ ତୁବନ୍ । ୧:୧-୧୩
୨. ଗାଲିଲିତେଇ ଜିସୁର୍ ସେବାକାମ୍ । ୧:୧୪;୯:୫୦
୩. ଜିସୁ ଜିରୁସାଲାମ୍ ଜିବାଟା ଆରି ପାର୍ତନା ଗରେ ପୁରବାଟା ।
୧୦:୧;୧୨:୪୪
୪. ପର୍କେ ଗଟ୍ ବା ବିସଇ ଜାନାଇବାଟା । ୧୩:୩୧-୩୭
୫. ଜିସୁର୍ ମରନ୍ ଆରିତରେକ୍ ଉଟ୍ ବାଟା ଆରି ମୁକିଅ ଆଦେସ୍ ।
୧୪:୧-୧୭:୨୦

ତୁବନ୍ ଦେଉ ଜଅନ୍ ପର୍ଚାର୍

(ମାତିଉ ୩:୧-୧୨; ଲୁକ୍ ୩:୧-୧୮; ଜଅନ୍ ୧:୧୯-୨୮)

^୧ ଏଟା ଅଇଲାନି ପର୍ମେସରର୍ ପଅ ଜିସୁ କିରିସ୍ଟର୍ ନିମାନ୍
 କବରର୍ ଆରାମ୍ । ^୨ ଏଟା ଏନ୍ତାରି ଆରାମ୍ ଅଇଲା । ଜିସାୟ
 ବବିସତ୍ତବକ୍ତାର ସାସ୍ତରେ ଜେନ୍ତାର ଲେକାଅଇଲା ଆରେ,
 ପର୍ମେସର୍ କଇଲା, ଦେକା ମୁଇ ମର୍ କବର୍ ଜାନାଉକେ ତମର୍
 ଆଗେ ପାଟାଇଲିନି,

ସେ ତମର୍ ବାଟ୍ ତିଆର୍ କରସି ।

^୩ ତାର୍ ସର୍ ମରୁବାଲି ବୁର୍ସି ଆଉଲିଅଇକରି ସୁନାଇଲାନି

ମାପୁରୁର୍ ବାଟ୍ ତିଆର୍ କରା,

ତାର୍ପାଇ ବାଟ୍ ସଲକାଆ ।

^୪ ତାର୍ପରେ ଏ ସବୁ କାତା ପୁରାପୁରୁନ୍ ଅଇଲା, ଜେତେବେଲେ,
 ତୁବନ୍ ଦେଉ ଜଅନ୍ ମରୁବାଲିବୁର୍ସି ଆସି ପାପ୍ କେମାର୍ ଲାଗି ବଲି

ପାପ୍‌ଗାନେଅନି ବାଉଡ଼ାଇବା ବିଷୟ କଇବାର ଦାର୍‌ଲା । “ତମର୍ ପାପ୍ କେମା ଅଇବାକେ ପାପ୍‌ଗାନେ ମନ୍ ବାଦ୍‌ଲାଇ ହୁବନ୍ ନିଆ । ପରମେସର୍ ତମର୍ ପାପ୍ କେମା କରସି ।” ^୫ ସେଡ଼କିବେଲେ ଜିଉଦାଦେସର୍ କେତେକ୍ ଲକ୍ ଆରି ଜିରୁସାଲାମ୍ ରାଇଜର୍ ସବୁ ଲକ୍‌ମନ୍ ବାରଇକରି ଜଅନର୍ କାତା ସୁନ୍ ବଲି ଆଇବାର ଦାର୍‌ଲାଇ । ଆରି ନିଜର୍ ନିଜର୍ ପାପ୍‌କଲାଟା ମାନିକରି ଜର୍ଦନ୍ ଗାଡେ ତାରତେଇଅନି ହୁବନ୍ ନେଲାଇ ।

^୬ ଜଅନ୍ ଉଟର୍ ରେଣ୍ଡିସଙ୍ଗ୍ ତିଆର୍ ଅଇଲା ଲୁଗା ପିନ୍ଦି, ପସୁ ଚାମର୍ ଆଁଟାବେଡା ଆଁଟାଇ ବାନ୍ଦି ଅଇତେରଇଲା । ତାର୍ କାଦି ଅଇଲା ଚିଟ୍‌କା ଆରି ବନର୍ ମୁ । ^୭ ସେ ଜାନାଇକରି କଇବାର୍ ମୁଲିଆଇଲା, “ମର୍ ପଟେ ଗଟେକ୍ ବେସି ବପୁର୍ ଲକ୍ ଆଇସି, ତାର୍ ଗଡିଦାଙ୍ଗ୍‌ଡା ଅଇକରି ତାର୍ ଗଡର୍ ପାଣ୍ଡୁଇ ବେଟ୍‌ବାର୍ ମିସା ମର୍ ଅଦିକାର୍ ନାଇ । ^୮ ମୁଇ ତମକେ ପାନିତେଇ ହୁବନ୍ ଦେଲିନି, ମାତର୍ ସେ ତମକେ ସୁକଲ୍‌ଆଡ଼ମାଇ ହୁବନ୍ ଦେଇସି ।”

ଜିସୁର୍ ହୁବନ୍ ଆରି ପରିକା

(ମାତିଉ ୩:୧୩;୪:୧୧; ଲୁକ୍ ୩:୨୧;୨୨;୪:୧-୧୩)

^୯ ସେଡ଼କିବେଲେ ଜିସୁ ଗାଲିଲି ଜାଗାର୍ ନାଜରିତ୍ ଗଡେ ଅନି ଆସି ଜର୍ଦନ୍ ଗାଡେ ହୁବନ୍ ଦେଉ ଜଅନର୍ ଟାନେ ହୁବନ୍ ନେଲା । ^{୧୦} ସେ ପାନିତେଇ ଅନି ବାରଇ ଆଇବାବେଲେ, ସରଗ୍ ଉଗାଡି ଅଇ ପରମେସରର୍ ଆଡ଼ମା ପରୁଆ ପାରା ଅଇ ଜିସୁର୍ ଉପରେ ଉଡ୍‌ରି ଆଇବାଟା ସେ ଦେକ୍‌ଲା । ^{୧୧} ଆରି ସର୍ଗେଅନି ଗଟେକ୍ ସର୍ ସୁନିଅଇଲା, “ହୁଇ ମର୍ ଆଲାଦର୍ ପିଲା, ତର୍‌ଟାନେ ମୁଇ ବେସି ସାର୍‌ଦା ।”

^{୧୨} ସେଦାପରେ ସୁକଲ୍‌ଆଡ଼ମା ଜିସୁକେ ମରୁବାଲି ବୁର୍ ପାଟାଇଲା । ^{୧୩} ମରୁବାଲି ବୁର୍ ଚାଲିସ୍ ଦିନ୍ ରଇଲାବେଲେ, ସଇତାନ୍ ତାକେ ପାପକରାଇବାକେ ଚେସ୍‌ଟା କର୍ତେରଇଲା । ସେ ଜାଗାଇ ବନର୍ ଜୁଡ଼ମନ୍ ରଇଲାଇ, ଆରି ସରଗର୍ ହୁଡ଼ମନ୍ ଆସି ତାର୍ ସେବା କର୍ତେରଇଲାଇ ।

☆ ୧:୧୧ ୧:୧୧ ମାତିଉ ୩:୧୭;୧୨:୧୮; ମାର୍ଚ୍ଚକ ୯:୭; ଲୁକ୍ ୩:୨୨

ଜିସୁ ଚାରିଟା କେଉଟ୍‌ମନ୍‌କେ ଡାକ୍‌ଲା
(ମାତିଉ ୪:୧୨-୨୨; ଲୁକ୍ ୪:୧୪, ୧୫:୧-୧୧)

୧୪ କେତେଦିନ୍ ଗାଲାପଟେ ଏରଦ୍‌ରାଜା ତୁବନ୍ ଦେଉ ଜଅନ୍‌କେ ବନ୍ଦି ଗରେ ସଙ୍ଗଇଲା ପଟେ ଜିସୁ ଗାଲିଲି ଗାର୍‌ ବାଉଡିଆସି, ପରମେସରର ନିମାନ୍ କବର ସୁନାଇବାର ଦାରଲା । ୧୫ ☆“ସମାନ୍ ବେଲା ଆଇଲା, ପରମେସରର ରାଇଜ୍ ଲଗେ କେଟ୍‌ଲା ଆଟେ । ତମେ ପାପେ ଅନି ମନ୍ ବାଉଡାଇକରି ନିମାନ୍ କାତାଇ ବିସ୍‌ବାସ୍ କରା ।” ୧୬ ଜିସୁ ଗାଲିଲି ସମ୍‌ଦୁର୍ କଣ୍ଡିବାଟେ ଜିବା ବେଲେ ସିମନ୍ ଆରି ତାର ବାଇ ଆନ୍‌ରିଅକେ ସମ୍‌ଦୁରେ ବଇଜାଲ୍ ପାକାଇବାଟା ଦେକ୍‌ଲା, ସେମନ୍ ମାର୍ ଦାରୁ କେଉଟ୍‌ମନ୍ ରଇଲାଇ । ୧୭ ଜିସୁ ସେମନ୍‌କେ କଇଲା, “ମର୍ ସଙ୍ଗ୍ ଆସା, ମୁଇ ତମକେ ଲକ୍‌ମନ୍‌କେ ପରମେସରର ବାଟେ ଆନ୍‌ବା ବିସଇ ସିକାଇବି ।” ୧୮ ସେଦାପ୍‌ରେ ସେମନ୍ ଜାଲ୍ ଚାଡି ଜିସୁର୍ ପଟେ ପଟେ ଗାଲାଇ ।

୧୯ ପଟେ କଣ୍ଡେକ୍ ଦୁର୍ ଜାଇ ଜେବଦିର୍ ପଅମନ୍ ଜାକୁବ୍ ଆରି ତାର ବାଇ ଜଅନ୍‌କେ ଡଙ୍ଗାଇ ଜାଲ୍ ସାଜାଡ୍‌ବାଟା ଦେକ୍‌ଲା । ୨୦ ଜିସୁ ସେମନ୍‌କେ ଦେକ୍‌ଲା ଦାପ୍‌ରେ ଡାକ୍‌ଲା, ଆରି ସେମନ୍ ତାକର୍ ବାବା ଜେବଦିକେ ଆରି କୁଲିଆର୍‌ମନ୍‌କେ ଡଙ୍ଗାଇ ଚାଡି ତାର ସଙ୍ଗ୍ ଗାଲାଇ ।

ଜିସୁ ତୁମା ଦାରଲା ଲକ୍‌କେ ନିକ କଲା
(ଲୁକ୍ ୪:୩୧-୩୭)

୨୧ ପଟେ ଜିସୁ ଆରି ତାର ସିସ୍‌ମନ୍ କପରନାଉମେ ଗାଲାଇ, ଆରି ବିସ୍‌ରାମ୍‌ବାର୍ କେଟ୍‌ଲାକେ ସେ ଜିଉଦିମନ୍‌ର୍ ପାର୍‌ତନା ଗରେ ପୁରି, ଲକ୍‌ମନ୍‌କେ ସିକାଇବାର ଦାରଲା । ୨୨ ☆ଲକ୍‌ମନ୍ ତାର ସିକିଆ ସୁନି କାବା ଅଇଗାଲାଇ, ସେ ସାସ୍‌ତର୍ ସିକାଉପାରା ନ ସିକାଇ, ନିଜର୍ ଅଦିକାର୍ ସଙ୍ଗ୍ ସିକିଆ ଦେଇତେ ରଇଲା ।

୨୩ ସେ ଦାପ୍‌ରେ ସେମନ୍‌ର୍ ପାର୍‌ତନା ଗରେ ଗଟେକ୍ ତୁମା ଦାରଲା ଲକ୍ କିର୍‌କିରି କରି ଜିସୁକେ କଇଲା, ୨୪ “ଏ ନାଜରିତ୍ ଗତ୍‌ର୍ ଜିସୁ, ତୁଇ କାଇକେ ଆମ୍‌କେ ଅରିଆନ୍ କଲୁସ୍‌ନି ? ତୁଇ କାଇ

ଆମ୍ଭଙ୍କେ ବିନାସ୍ କରବାକେ ଆଇଲୁସ୍ କି ? ତୁଇ କେ, ସେଟା ମୁଇ ଜାନି, ତୁଇ ଅଇଲୁସ୍‌ନି ପର୍ମେସରର୍ ସୁକଲ୍ ଲକ୍ ।”

୨୫ ଜିସୁ ତୁମାକେ ଦମ୍‌କାଇ କରି କଇଲା, “ତୁପ୍ ଅ, ଆରି ଏ ଲକର୍‌ତେଇ ଅନି ବାରଇ ଜା ।”

୨୬ ସେଡ୍‌କି ବେଲେ ତୁମା ତାକେ ମଡିପିଙ୍ଗି ବେସି କିର୍କିରି କରି ତାରଲଗେ ଅନି ବାରଇଗାଲା । ୨୭ ତେବର୍‌ପାଇ ପାର୍‌ତନା ଗରେ ରଇବା ସବୁ ଲକ୍ କାବା ଅଇଗାଲା ଆରି ତାକର୍ ତାକର୍ ବିଡ୍‌ରେ କୁଆବଲା ଅଇଲା । “ଏଟା କେନ୍ତାର୍ ? ଏଟାତା ଅଦିକାର୍ ସଙ୍ଗର୍ ନୁଆ ସିକିଆ । ତୁମା ଆଡ୍‌ମାମନ୍ ମିସା, ସେ ତିଆରଲାଟା ମାନ୍‌ଲାଇନି ।”

୨୮ ସେଡ୍‌କିବେଲେ ଜିସୁର୍ କାତା ଗାଲିଲିର୍ ଚାରିବେଡ୍‌ଡିର୍ ଗାଉଁମନ୍‌କେ କେଟିଗାଲା ।

ଜିସୁ ବେସି ଲକ୍‌ମନ୍‌କେ ନିକ କଲା

(ମାଡିଉ ୮:୧୪,୧୭; ଲୁକ୍ ୪:୩୮-୪୧)

୨୯ ତାର୍ ପଟେ ଜିସୁ ଆରି ତାର୍ ସିସ୍‌ମନ୍ ପାର୍‌ତନା ଗରେ ଅନି ବାରଇ ଜାକୁବ୍ ଆରି ଜଅନର୍ ସଙ୍ଗ୍ ସିମନ୍ ଆରି ଆନ୍‌ରିୟର୍ ଗରେ ଗାଲା । ୩୦ ତେଇ ରଇଲା ଲକ୍‌ମନ୍ ସିମନ୍ ସାଡ୍‌ରି ଜରକେ ସଇରଇଲା ବିସଇ ଜିସୁକେ କଇଲା । ୩୧ ସେଟାର୍‌ପାଇ ଜିସୁ ଜାଇ ସିମନ୍ ସାଡ୍‌ରିର୍ ଆଡେ ଦାରି ଉଟାଇଲା, ସେଦାପ୍‌ରେ ତାର୍ ଜର୍ ଚାଡିଗାଲା, ଆରି ସେ ଜାଇ ସେମନ୍‌କେ ସେବା କର୍‌ବାର୍ ଦାରଲା ।

୩୨ ସଞ୍ଜ୍ ବେଲାଇ ବେଲ୍ ବୁଡିଗାଲା ପଟେ, ଲକ୍‌ମନ୍ ଜରର୍ ଲକ୍‌ମନ୍‌କେ ଆରି ତୁମାଦାରି ରଇବା ସବୁଲକ୍‌ମନ୍‌କେ ଜିସୁର୍ ଲଗେ ଆନ୍‌ବାର୍ ଦାରଲା, ୩୩ ଆରି ଗାଉଁର୍ ଲକ୍‌ମନ୍ ସେ ଗରର୍ ଦୁଆରେ ରୁଣ୍ଡିଲା । ୩୪ ସେଡ୍‌କିବେଲେ ସେ ବିନ୍ ବିନ୍ ରକାମର୍ ରଗ୍ ଅଇରଇବା ଜବର୍ ରଗି ଲକ୍‌ମନ୍‌କେ ନିମାନ୍ କଲା ଆରି ଜବର୍ ତୁମାମନ୍‌କେ ଚାଡାଇଲା, ମାଡର୍ ସେ ତୁମାମନ୍‌କେ କାତା କଇବାକେ ଦେଏନାଇ । କାଇକେବଇଲେ ତୁମାମନ୍ ଜିସୁ ପର୍ମେସରର୍ ଗାନେଅନି ଆଇଲାଆଡେ ବଲିକରି ଜାନି ରଇଲା ।

ଜିସୁ ଗାଲିଲି ରାଇଜେ ମାପ୍‌ରୁର୍ କାତା ସୁନାଇଲା

(ଲୁକ୍ ୪:୪୨-୪୪)

୩୫ ଆରକର ସାକାଲେ କୁକ୍ତା ଡାକ୍ ବେଲାଇ ଜିସୁ ଉଟି ଗରେଅନି ବାରଇ ଜାଇ ଗଟେକ୍ କନରା ରଇବା ତିମରା ଜାଗାଇ, ଜାଇ ପାରତନା କରବାର ଦାରଲା । ୩୬ ସେଡକିବେଲେ ସିମନ୍ ଆରି ତାର ସଙ୍ଗରଲକ୍ ତାକେ କଜବାର ଗାଲାଇ, ୩୭ ଜେଡେବଲ୍ ସେମନ୍ ଜିସୁକେ ବେଟ୍ ଅଇଲାଇ, ଆରି କାବାଅଇ ତାକେ କଇଲାଇ, “ସବୁ ଲକ୍ ତମକେ କଜଲାଇନି ।”

୩୮ ସେଡକିବେଲେ ଜିସୁ ସେମନ୍କେ କଇଲା, “ଆସା, ଆମେ ରଇବା ବିନ୍ ବିନ୍ ଗାଉଁମନ୍କେ ଜୁ, କାଇକେବଇଲେ ସେ ଜାଗାମନ୍କେ ମିସା ମୁଇ ପର୍ମେସରର୍ କାତା କଇବି । କାଇକେବଇଲେ ସେଟାରପାଇସେ ମୁଇ ଆଇଲିଆତି ।”

୩୯ ✨ଆରି ଗାଲିଲିର୍ ସବୁଟାମେ ବୁଲି ବୁଲି ସେମନ୍ ସବୁ ପାରତନା ଗରେ, ମାପୁରୁର୍ କାତା ସୁନାଇଲା, ଆରି ତୁମା ଦାରଲା ଲକ୍ମନ୍କେ ଚାଡାଇଲା ।

ଜିସୁ ବଡ଼ ରଗିକେ ନିକ କଲା

(ମାତିଉ ୮:୧,୪; ଲୁକ୍ ୫:୧୨,୧୬)

୪୦ ସେଡକି ବେଲେ ଗଟେକ୍ ବଡ଼ ରଗି* ତାର ଲଗେ ଆସି ମାଣ୍ଡିକଟା ଦେଇ ତାକେ ବାବୁଜିଆ କରି କଇଲା, “ତମେ ଜଦି ମନ୍କଲେ ମକେ ସୁକଲ୍ କରି ପାରସା ।”

୪୧ ତେଇ ସେ ତାକେ ଜିବନ୍ ଦୁକାଇଲା ଆରି ଆଡ଼ ଲାମାଇ କରି ତାକେ ଚିଇକରି କଇଲା, “ମୁଇ ମନ୍ କଲିନି, ତୁଇ ସୁକଲ୍ ଅ ।”

୪୨ ସେଦାପ୍ରେ ବଡ଼ ରଗ୍ ତାର ଲଗେ ଅନି ଦୁର୍ଅଇଲା ଆରି ସେ ସୁକଲ୍ ଅଇଗାଲା । ୪୩ ଆରି, ଜିସୁ ସେ ଲକ୍କେ ତାଟ୍‌ସଙ୍ଗ୍ ଆଦେସ୍ ଦେଇ ସେଦାପ୍ରେ କଇ ପାଟାଇଲା । ୪୪ “ଜାଗରଡ଼, ମୁଇ ତକେ ସୁକଲ୍ କଲି ବଲି କାକେ ମିସା କ ନାଇ, ମାତର୍ ଜା ଆରି ନିଜେ ପୁଜାରିକେ ଦେକାଇ ଅ ଆରି ମସା ଜନ୍ ଜନ୍ ବିରୁ ପର୍ମେସର୍କେ ଦେବାକେ ଆଦେସ୍ ଦେଲାଆତେ, ସେ ଇସାବେ ଦେସ୍ । ଏଟାର ଲାଗି

✨ ୧:୩୯ ୧:୩୯ ମାତିଉ ୪:୨୩;୯:୩୫ * ୧:୪୦ ୧:୪୦ ବଡ଼ ରଗ୍ ଅଇରଇଲାର୍ ପାଇ ଗଟେକ୍ ଲକ୍ ପର୍ମେସର୍କେ ପାରତନା କର୍ତ୍ତେରଇଲା, କାଇକେବଇଲେ ବଡ଼ ରଗିକେ ଜିଉଦିମନ୍ ଅସୁଚି ବଲି ବାବ୍ତେ ରଇଲାଇ ।

ତୁଇ ସୁକଲ୍ ଅଇଜାଇଆରୁସ୍ ବଲିକରି ପୁଜାରି ସବୁଲକର୍ ମୁଆଟେ ସାକି ଦେଅ ।”

^{୪୫} ମାତର୍ ସେଲକ୍ ବାରଇ ଜାଇ ଜିସୁ ସୁକଲ୍ କରିରଇବା କବର୍ ଏତେକ୍ ରାଟୁକରି କଇବୁଲଲାଇ ଜେ, ଜିସୁ ଲକ୍ମନର୍ ଦେକ୍ତେ ଦେକ୍ତେ କନ୍ ଗାଉଁମନ୍କେ ମିସା ଜାଇ ପୁରି ନାପାରଲା । ମାତର୍ ବାଇରେ ଜାଇ ଚିମରା ଜାଗାମନ୍କେ ରଇଲା । ଅଇଲେ ମିସା ଲକ୍ମନ ଚାରିଦିଗେ ଅନି ତାର ଲଗେ ଆଇବାର୍ଦ୍ଦାରଲାଇ ।

୨

ଚେରେଙ୍ଗ୍‌ବାଡ଼ ରଗି ନିମାନ୍ ଅଇଲା

(ମାତିଉ ୯:୧-୮; ଲୁକ୍ ୫:୧୭-୨୬)

^୧ କେତେଦିନ୍ ଗାଲା ପଚେ ଜିସୁ ଆରି ତରେକ୍ କପର୍ନାଉମେ ବାଅଡ଼ଲାକେ, ସେ ଗରେ ଆଟେ ବଲି ଆଲା ଅଇଗାଲା । ^୨ ସେ ଗରେ ଏତେମାଣ୍ଟ୍ ଲକ୍ ଜମଲାଇ ଜେ, ଦୁଆରେ ମିସା ଟାନ୍ ଦାରିନାପାରଲା, ଆରି ଜିସୁ ସେମନର୍ ଲଗେ ପର୍ମେସରର୍ ବାକିଅ ସୁନାଇବାର୍ ଦାରଲା । ^୩ ସେଡ଼କି ବେଲେ କେତେକ୍ ଲକ୍ମନ ଗଟେକ୍ ଚେରେଙ୍ଗ୍ ରଗିକେ ବଇକରି ତାର ଲଗେ ଦାରିଆଇଲାଇ । ତାକର୍ ବିଡ଼ରେ ଅନି ଚାରଲକ୍ ରଗିକେ ବଇରଇଲାଇ । ^୪ ମାତର୍ ଲକ୍ମନ ଚିପାଟେଲା ଅଇରଇଲାଇକେ, ତାକେ ଜିସୁର୍ ଲଗେ ନେଇ ନାପାରଲାଇ । ନାପାରିକରି, ଜିସୁ ଜନ୍‌ଟାନେ ରଇଲା, ତେଇର୍ ଚାନି ବଡ଼ଟା କାଣାକରି, ରଗିକେ କଟ୍ ମିସ୍ତେ ତାର ମୁଆଟେ ସିଦା ଉଡ଼ରାଇଦେଲାଇ । ^୫ ଜିସୁ ସେମନର୍ ବିସ୍‌ବାସ୍ ଦେକି ଚେରେଙ୍ଗ୍ ରଗିକେ କଇଲା, “ବାବୁରେ ମୁଇ ତର୍ ପାପ୍ କେମା କରିଦେଲି ।”

^୬ ମାତର୍ ସେ ଗର୍ ବିଡ଼ରେ କେତେଟା ସାସ୍ତର୍ ସିକାଇବା ଲକ୍ମନ ବସି ନିଜର୍ ନିଜର୍ ମନ୍ ବିଡ଼ରେ ବାବିଅଇତେରଇଲାଇ, ^୭ “ଏ ଲକ୍ ଚେରେଙ୍ଗ୍ ରଗିକେ ‘ତର୍ ପାପ୍ କେମା କରିଦେଲି ।’ ବଲି କେନ୍ତ୍ର କଇପାରଲା ? ଏ ପର୍ମେସର୍କେ ନିନ୍ଦା କରସିଆଟେ, ସେ ଗଟେକ୍ ମାପୁରୁକେ ଚାଡ଼ିଦେଲେ, ଆରି କେ ମିସା ପାପ୍ କେମା କରି ପାରଡ଼ କି ?”

^୮ ସେଦାପୁରେ ଜିସୁ ସେମନ୍ ମନେ ମନେ ଏନ୍ତାରି ବାବିଅଇଲାଟା, ନିଜର୍ ଆଡ଼ମାଇ ଜାନି ସେମନ୍‌କେ କଇଲା, “ତମେ କାଇକେ ନିଜର୍

ନିଜର ମନେ ଏ ସବୁଜାକ ବାବିଅଇଲାସ୍ତନି ? ୯ କନ୍ଦା କରବାଟା ସଅଜ୍ ଅଇଲାନି ? ବାବୁରେ ‘ମୁଇ ତର ପାପ୍ କେମା କରିଦେଲି ।’ ବଲି କଇବାଟା, କି ‘ଉଟ୍ ତର କଟ୍ ବଇ ଇଣ୍ଡିଜା ।’ ବଲ୍‌ବାଟା ? ୧୦ ମାତର ଗୁଲାଇ ଜଗତର ପାପ୍ କେମା କରବାକେ ପରମେସର ପାଟାଇଲା ନରପିଲା ମର ଅଦିକାର୍ ଆଟେ ବଲି ଏବେ ମୁଇ, ଏ ଲକ୍‌କେ ନିକ କରି ଦେକାଇବି ।” ସେ ଚେରେଙ୍ଗ୍ ରଗିକେ କଇଲା, ୧୧ “ମୁଇ ତକେ କଇଲିନି ଉଟ୍, ତର କଟ୍ ବଇ, ନିଜର ଗରେ ବାରିଜା ।”

୧୨ ସେଦାପରେ ସେ ରଗି ଉଟି କଟ୍ ବଇକରି ସବୁ ଲକ୍‌କର ଦେକ୍‌ଡେ ବାରଇ ଗାଲା । ସେବେଲାଇ ସବୁଲକ୍‌ କାବା ଅଇ ପରମେସରର୍ ମଇମା କରି କରି କଇଲାଇ, “ଆମେ ଏନ୍ତାରିଟା କେବେ ମିସା ଦେକି ନ ରଇଲୁ ।”

ଜିସୁ ଲେବିକେ ଡାକ୍‌ଲା

(ମାତିଉ ୯:୯-୧୩; ଲୁକ୍ ୫:୨୭-୩୨)

୧୩ ସେ ଆରିତରେକ୍ ସମ୍‌ଦୁରର୍ କଣ୍ଡିବାଟେ ବାରଇଗାଲା । ବେସି ଲକ୍‌ମନ୍ ତାର ଲଗେ ଆଇଲାକେ, ଜିସୁ ସେମନ୍‌କେ ସିକିଆ ଦେବାର୍ ଦାରଲା । ୧୪ ଆରି ସେ ଜାଉ ଜାଉ ଆଲ୍‌ପିଅର୍ ପଅ ଲେବିକେ ରମିୟ ସର୍କାରର୍ ପାଇ ସିସ୍‌ତୁମାଙ୍ଗୁମନ୍ ମାଙ୍‌ବା ଜାଗାଇ ବସି ରଇବାଟା ଦେକି ତାକେ କଇଲା, “ମର୍ ସଙ୍ଗ୍ ଆଉ ।” ତେଇଅନି ସେ ତାର୍ ସିସ୍‌ତୁମାଙ୍ଗୁମନ୍ ମାଙ୍‌ବାଟା ଚାଡି ଉଟିକରି ଜିସୁର୍ ସଙ୍ଗ୍ ଗାଲା ।

୧୫ ପଟେ ଜିସୁ ଲେବିର୍ ଗରେ ଜାଇ କାଇବା ବେଲେ ବେସି ସିସ୍‌ତୁମାଙ୍ଗୁମା ଲକ୍ ଆରି ଜନ୍ ଲକ୍‌ମନ୍‌କେ ପାପି ବଲି କଇତେରଇଲାଇ, ତାର୍ ସିସ୍‌ମନ୍‌ର୍ ସଙ୍ଗ୍ ମିସି କାଇତେରଇଲାଇ । କାଇକେବଇଲେ ଏନ୍ତାରି ବେସି ଲକ୍ ତାର୍ ସଙ୍ଗ୍ ଜାଇତେ ରଇଲାଇ । ୧୬ ଜିସୁ ପାପି ଆରି ସିସ୍‌ତୁମାଙ୍ଗୁମନ୍‌ର୍ ସଙ୍ଗ୍ କାଇଲାନି, ଏଟା ଦେକିକରି ପାରୁସି ଦଲ୍‌ର୍ ସାସ୍‌ତର୍ ସିକାଉମନ୍ ତାର୍ ସିସ୍‌ମନ୍‌କେ କଇବାର୍ ଦାରଲାଇ, “ସେ କାଇକେ ସିସ୍‌ତୁମାଙ୍ଗୁମନ୍‌ର୍ ଆରି ପାପିମନ୍‌ର୍ ସଙ୍ଗ୍ କାଇଲାନି ?”

୧୭ ସେଟା ସୁନି ଜିସୁ ସାସ୍‌ତର୍ ସିକାଉମନ୍‌କେ କଇଲା, “ ନିମାନ୍ ଲକ୍‌ମନ୍‌ର୍‌ପାଇ ଡାକ୍‌ଦରର୍ ଲଡା ନାଇ, ମାତର୍ ନିମାନ୍ ନ ରଇଲା ଲକ୍‌ମନ୍‌କେ ଲଡା ଆଟେ । ଜେ ନିଜେ ‘ମୁଇ ଦରମ୍ ଲକ୍ ।’

ବଲି ବାବିଅଇବା ଲକରପାଇ ମୁଇ ଆସିନାଇ, ମାତର ପାପିମନ୍‌କେ ପାପଟାନେଅନି ବାଉଡାଇବାକେ ଆସିଆଚି ।”

ଉପାସ୍ ବିସଇ

(ମାତିଉ ୯:୧୪-୧୭; ଲୁକ୍ ୫:୩୩-୩୯)

^{୧୮} ତୁବନ୍ ଦେଉ ଜଅନର୍ ସିସ୍‌ମନ୍ ଆରି ପାରୁସିମନ୍ ଉପାସ୍ କରତେ ରଇଲାଇ । ସେବେଲାଇ କେତେଲକ୍ ଆସି ଜିସୁକେ କଇଲାଇ, “ତୁବନ୍ ଦେଉ ଜଅନର୍ ସିସ୍‌ମନ୍ ଆରି ପାରୁସିମନ୍‌ର ସିସ୍‌ମନ୍ ଉପାସ୍ କର୍‌ବାଇ, ମାତର ତର୍ ସିସ୍‌ମନ୍ କାଇକେ ଉପାସ୍ ନ କରତ୍ ?”

^{୧୯} ଜିସୁ ସେମନ୍‌କେ କଇଲା, “ବଜିଟାନେ ବିବା ଦାଙ୍ଗ୍‌ଡା ରଇବା ଜାକ ବିବା ଦାଙ୍ଗ୍‌ଡାର ସଙ୍ଗ୍ ରଇବା ଦାଙ୍ଗ୍‌ଡାମନ୍ ଉପାସେ ରଇବାଇ କି ? ନାଇ ନ ରଅତ୍ । ବିବା ଦାଙ୍ଗ୍‌ଡା ଜେଡେବେଲାଜାକ ରଇସି, ସେ ବେଲାଜାକ ସେମନ୍ ଉପାସେ ନ ରଅତ୍ । ^{୨୦} ମାତର ବେଲା ଆଇସି, ଜେଡେବେଲେ ଲକ୍‌ମନ୍ ଆସି ତାକର୍ ଲଗେ ଅନି ବିବା ଦାଙ୍ଗ୍‌ଡାକେ ଦାରିଜିବାଇ, ସେଦିନେ ସେମନ୍ ଉପାସ୍ କର୍‌ବାଇ ।

^{୨୧} “କେ ନୁଆ ଲୁଗାର୍ ଗରଣ୍ଡା ପୁରନା ଲୁଗାଇ ନ ସିଲାଏ, ସିଲାଇଲେ ନୁଆ ଗରଣ୍ଡା ପୁରନା ଲୁଗାକେ ଅଦିକ୍ ଚିରି ପାକାଇସି, ଆରି ଅଦିକ୍ ବଡ଼ଟା କାଣା କରିଦେଇସି । ^{୨୨} ଆରି କେ ନୁଆ ଅଙ୍ଗୁର୍ ରସ୍ ପୁରନା ଚାମ୍ ସଙ୍ଗ୍ ତିଆର୍ କଲା ମୁନାଇ ନ ସଙ୍ଗଅତ୍, ସଙ୍ଗଇଲେ ସେ ଅଙ୍ଗୁର୍ ରସ୍ ଆରି ଚାମ୍ ମୁନା ନସିଜାଇସି । ନାଇ ନୁଆ ଅଙ୍ଗୁର୍ ରସ୍ ନୁଆ ଚାମ୍ ମୁନାଇ ସଙ୍ଗଇବାର୍ ଆଟେ ।”

ଜିସୁ ବିସ୍‌ରାମ୍ ବାରର୍ ମାପରୁ

(ମାତିଉ ୧୨:୧-୮; ଲୁକ୍ ୬:୧-୫)

^{୨୩} ଜିସୁ ତରେକ୍ ବିସ୍‌ରାମ୍‌ବାରେ ତାସ୍ ରଇବା କେତ୍ ବାଟେ ଜାଇତେ ରଇଲା, ଆରି ଜିବାବେଲେ ତାର୍ ସିସ୍‌ମନ୍ ଦାନ୍ କେଡ୍ ଚିଡାଇତେ ଗାଲାଇ । ^{୨୪} ସେ ଜାଗାଇ ରଇବା ପାରୁସିମନ୍ ଜିସୁକେ କଇଲାଇ, “ଦେକ୍ ବିସ୍‌ରାମ୍‌ବାରେ ଜନ୍‌ଟା କର୍‌ବାର୍ ଆମର୍ ବିଦି ନଏ । ତର୍ ସିସ୍‌ମନ୍ କାଇକେ ସେଟା କଲାଇନି ?”

^{୨୫} ଜିସୁ ସେମନ୍‌କେ କଇଲା, “ଆମର୍ ତାକ୍‌ପୁଟା ଆନିଦାଦି ଦାଉଦର୍ ଅବାବ୍ ବେଲେ, ସେ ଆରି ତାର୍ ସଙ୍ଗର୍ ଲକ୍‌ମନ୍ ବୁକେ

ରଇଲା, ସେତୁକିବେଳେ ସେ କାହିଁ କରି ରଇଲା, ସେଟା କାହିଁ ତମେ କେବେ ପତାସ୍ ନାହିଁ କି ? ^{୨୭} ବଡ଼ ପୁଅଟି ଅବିଧାତର ବେଳେ ସେ କେନ୍ଦ୍ର ପରମେସ୍ୱରର ମନ୍ଦିରେ ପୁରିକରି ମାପୁରୁକେ ସରପିଦେଲା ଜନ୍ ଦରସନି ରୁଟି, ପୁଅଟିମନ୍ଦକେ ଚାଡ଼ିଦେଲେ ଆରି କେ ମିସା କାହିଁବାରୁ ବିଦି ନର୍ଷ, ସେଟା ସେ କାହିଁଲା, ଆରି ସେ ରୁଟି ନିଜର ସଙ୍ଗର୍ ଲକ୍ଷମନ୍ଦକେ ମିସା ବାଟାକରି ଦେଇରଇଲା ।” ^{୨୭} ଜିସୁ ସେମନ୍ଦକେ କଇଲା, “ ବିସ୍ୱରାମ୍ବାରୁ ଲକ୍ଷମନ୍ଦର ସାହିଜରପାଇ ଅଇଲା ଆତେ, ସେଟା ଲକ୍ଷମନ୍ଦକେ ବିଜାରୁ କରୁବାକେ ଅଏନାଇ । ^{୨୮} ତେବରପାଇ ପରମେସ୍ୱର ପାଟାଇଲା ନରପିଲା ମୁଇ ବିସ୍ୱରାମ୍ବାରୁ ଲକ୍ଷମନ୍ଦ କାହିଁ କରୁବାରୁ ଆତେ, କାହିଁ କରୁବାରୁ ନାଇ, ସେଟା କଇବାରୁ ମରୁ ଅଦିକାରୁ ଆତେ ।”

୩

ଜିସୁ ଗଟେକ୍ ଆଡ଼ ସୁକ୍ଷ୍ମା କଲା ଲକ୍ଷକେ ନିକ କଲା
(ମାତିଉ ୧୨:୯-୧୪; ଲୁକ୍ ୭:୨-୧୧)

^୧ ପତେ ଜିସୁ ଆରି ଗଟେକ୍ ତରୁ ଜିଉଦିମନ୍ଦର ପାରୁତନା ଗରେ ଗାଲା । ତେଇ ଗଟେକ୍ ଲକ୍ଷ ରଇଲା । ତାରୁ ଗଟେକ୍ ଆଡ଼ ସୁକ୍ଷ୍ମାକରଇଲା । ^୨ ଜିସୁ କେଜାନେ ବିସ୍ୱରାମ୍ ବାରେ ନିମାନ୍ଦ କରୁସି ବଲି, ସେମନ୍ ଆକି ନ ମରାଇତେ ଦେକ୍ତେରଇଲା, କାହିଁକେବଲେ ଜେନ୍ଦ୍ରକି ତାରୁ ବିରୁଦେ ଦସ୍ ଦାରିପାରୁବାଇ । ^୩ ଜନ୍ ଲକ୍ଷ ଆଡ଼ ସୁକ୍ଷ୍ମା ଜାହିରଇଲା, ତାକେ ଜିସୁ କଇଲା, “ଆଉ ମଜାଇ ଚିଆ ଅ ।” ^୪ ଆରି ଜିସୁ ଲକ୍ଷମନ୍ଦକେ ପାଟାରୁଲା, “ ବିସ୍ୱରାମ୍ବାରୁ କାହିଁ କରୁବା ନିଅମ୍ ? ନିକ କରୁବାରୁ କି ଆସାରୁ କରୁବାରୁ ? ଜିବନ୍ ବଞ୍ଚାଇବାରୁ କି ମରାଇଦେବାରୁ ?” ମାତରୁ ସେମନ୍ କାହିଁ ନ କଇ ଚିମ୍ବରାଅଇ ରଇଲା । ^୫ ସେବେଲେ ତାକରୁ ମନ୍ଦ ତାଟୁ ରଇବାଟା ଦେକିକରି ଜିସୁ ଦୁକ୍ଷ୍ମା ରିସାସଙ୍ଗ, ଚାରିବେଡ଼ି ଦେକ୍ଲା । ଆରି ସେ ଲକ୍ଷକେ କଇଲା, “ଆଡ଼ ଲାମା ।” ସେ ଲକ୍ଷ ଆଡ଼ ଲାମାଇଲା, ଆରି ତାରୁ ଆଡ଼ ନିମାନ୍ଦ ଅଇଗାଲା । ^୬ ତେଇଅନି ପାରୁସିମନ୍ଦ ସେ ଜାଗାଇଅନି ଦାପ୍ରେ ବାରଇ ଜାହି ଜିସୁକେ ମରାଉ ବଲି ତାରୁ ବିରୁଦେ ଏରଦ୍ ରାଜାରୁ

ଲକ୍ଷ୍ମୀନରସଙ୍ଗ ଉପାଇ ପାଁବାର ଦାରଲା । ^୭ ସେତୁକିବେଲେ ଜିସୁ ସିସ୍ତମନର ସଙ୍ଗ ଲକ୍ଷ୍ମୀନରଟାନେଅନି ବେଗଲି କରି, ସମଦୁର କଣ୍ଠିବାଟେ ବାରଇ ଗଲା । ଆରି ଗାଲିଲି ଅନି ବେସି ଲକ୍ଷ୍ମୀ ତାର ପଟେ ପଟେ ଆଇଲା, ଆରି ଜିଉଦା, ି ଜିରୁସାଲାମ, ଇଦମ, ଜରଦନର ଉପର ବାଟେ ରଇବା ସର ଆରି ସିଦନର ଚାରିବେଡ଼ିଡ଼ି ଲକ୍ଷ୍ମୀ ସେ କରିରଇବା ସବୁ କାମର କାତା ସୁନି ତାର ଲଗେ ଆଇଲା । ^୯ ସେତୁକିବେଲେ ଚିପାଟେଲା ରଇଲାକେ, ଲକ୍ଷ୍ମୀନ ଜେନ୍ତୁକି ଉପରେ ଡାବି ନ ଅଅଡ଼, ତେବର ପାଇ ଜିସୁ ସିସ୍ତମନକେ ତାରପାଇ ଗଟେକ୍ ସାନ୍ତା ଡଙ୍ଗା ଆନି ଜାଗାଇବାକେ ଡିଆରଲା । ^{୧୦} କାଇକେବଇଲେ ସେ ବେସି ଲକ୍ଷ୍ମୀନକେ ନିମାନ୍ କଲାଜେ ଜରଦୁକା ଅଇରଇବା ଲକ୍ଷ୍ମୀନ ତାକେ ଚିଉଁ ବଲି ଉପରେ ଡାବିଅଇ ଜାଇତେରଇଲା । ^{୧୧} ଆରି ଜେତେବେଲେ ଜିସୁକେ କରାପ୍ ଆଡ଼ମାମନ୍ ଦେକ୍ତେ ରଇଲା, ସେ ଆଡ଼ମାମନ୍ ତାର ମୁଆଟେ ଅଦ୍ରି ଆଉଲିଅଇ କଇତେରଇଲା, “ତୁଇ ଆକା ପରମେସରର ପଅ ।” ^{୧୨} ମାତର ଜିସୁ ତୁମାମନକେ ତାର ବିସଇନେଇ ବିନ୍ ଲକ୍ଷ୍ମୀନକେ କାଇ ବଲି ନ କୁଆ ବଲି ଡାବସଙ୍ଗ ଆଦେସ୍ ଦେଇତେରଇଲା ।

ଜିସୁ ବାରଟା ସିସ୍ତମନକେ ବାଟଲା

(ମାତିଉ ୧୦:୧-୪; ଲୁକ୍ ୬:୧୨-୧୬)

^{୧୩} ଜିସୁ ପରବଡ଼ ଉପରେ ଜାଇ, ଜନ୍ ଲକ୍ଷ୍ମୀନକେ ସେ ମନ୍ କଲା, ସେମନକେ ଲଗେ ଡାକ୍ଲା, ଆରି ସେମନ୍ ତାର ଲଗେ ଆଇଲା । ^{୧୪} ସେ ବାର ଲକ୍ଷ୍ମୀକେ ବାଟଲା ଆରି ସେମନକେ ତାର କବର ନେଉ ବଲି ଡାକ୍ଲା । ଜେନ୍ତୁ ସେମନ୍ ତାର ସଙ୍ଗ ରଇପାରତୁ ଆରି ସେମନ୍ ତାର କବର ଜାନାଇବାଇ, ^{୧୫} ଆରି ତୁମାତାତାଇବାକେ ଅଦିକାର ଦେଲା ।

^{୧୬} ଜିସୁ ବାର ଲକ୍ଷ୍ମୀକେ ବାଟଲା, ଜନ୍ ଲକ୍ଷ୍ମୀନ କି ସିମନ୍, ଜାକେ ସେ ପିତର ବଲି ନାଉଁ ଦେଲା, ^{୧୭} ଜେବଦିର ପ ଜାକୁର୍ ଆରି ତାର ବାଇ ଜଅନକେ ସେ ବିନେରିଗସ୍ ବଲି ନାଉଁ ଦେଲା, ଆର ଅରତୁ ଅଇଲାନି ମେଗ୍ନାଦର ପଅମନ୍, ^{୧୮} ଆଦ୍ରିୟ, ପିଲିପ,

☆ ୩:୯ ୩:୯ ମାର୍ଚ୍ଚକ ୪:୧; ଲୁକ୍ ୫:୧-୩

ବାର୍ତ୍ତଲମ୍ବି, ମାତିଉ, ତମା, ଆଲ୍‌ପିର୍ ପଥ ଜାକୁବ୍, ତଦିୟ, କିଣାନିୟ ସିମନ୍, ଜେ କି ରମିୟ ସରକାରର୍ ବିରୁଦ୍ଧେ ଉଚିରଇଲା । ୧୯ ଆରି ଇସ୍କାରିୟତିୟ ଜିଉଦା, ଜେ କି ଜିସୁକେ ସତ୍‌ରୁକେ ସର୍ପି ଦେଇରଇଲା ।

(ମାତିଉ ୧୨:୨୨-୩୨; ଲୁକ୍ ୧୧:୧୪-୨୩; ୧୨:୧୦)

୨୦ ପଚେ ଜିସୁ ଗଟେକ୍ ଗରେ ପୁରଲା । ସେଡକି ବେଲେ ଲକ୍‌ମନ୍ ଆରି ତରେକ୍ ଏଡେକ୍ ରୁଣ୍ଡଲାଇ ଜେ, ସେ ଆରି ତାର୍ ସିସ୍‌ମନ୍ କାଇବାର୍ ମିସା ନାପାରଲାଇ । ୨୧ “ ଜିସୁକେ କାଇବାକେ ମିସା ବେଲା ନାଇ ।” ବଲି କଇ ତାକର୍ ଗରର୍ ଲକ୍ ସୁନି, ତାକେ ଗରେ ତାକିନେବାକେ ଆଇଲାଇ । କାଇକେବଇଲେ ସେମନ୍ କଇଲାଇ, “ତାର୍ ବୁଦି ବାନାଅଇଗାଲାନି ।”

ଜିସୁ ଆରି ବାଲ୍‌ଜିବୁଲ୍

୨୨ ☆ଆରି, ଜିରୁସାଲାମ୍ ଅନି ଆସିରଇବା ସାସ୍‌ତର୍ ସିକାଉମନ୍ କଇଲାଇ, “ଆକେ ତୁମାମନର୍ ନେତା ବାଲ୍‌ଜିବୁଲ୍ ଦାରିଆଚେ, ଆରି ତୁମାମନର୍ ନେତାର୍ ବପୁସଙ୍ଗ୍ ତୁମା ଚାଡାଇଲାନି ।” ୨୩ ସେଡକିବେଲେ ଜିସୁ ସାସ୍‌ତର୍ ସିକାଉମନ୍‌କେ ଲଗେତାକି ଉଦାଅରନ୍ ଦେଇ କଇଲା, “ସଇତାନ୍ କେନ୍ତି ସଇତାନ୍‌କେ ଚାଡାଇ ପାର୍‌ସି ? ୨୪ ଜଦି ଗଟେକ୍ ରାଇଜ୍ ଦୁଇ ବାଗ୍ ଅଇ ନିଜର୍ ବିରୁଦ୍ଧେ ଉଚ୍‌ସି, ତେବେ ସେ ରାଜିଅ ବେସିଦିନ୍ ନ ରଏ । ୨୫ ଗଟେକ୍ ଗର୍ ବାଗ୍ ଅଇ ନିଜର୍ ବିରୁଦ୍ଧେ ଉଚ୍‌ସି, ତେବେ ସେ ଗର୍ ବେସି ଦିନ୍ ନ ରଏ । ୨୬ ସେନ୍ତାର୍‌ସେ ସଇତାନ୍ ଜଦି ବାଗ୍ ଅଇ ନିଜର୍ ବିରୁଦ୍ଧେ ଉଚ୍‌ସି, ତେବେ ସେ ତବିର୍ ଅଇ ରଇ ନାପାଚେ, ମାତର୍ ତାର୍ ବିନାସ୍ ଗର୍‌ସି ।

୨୭ “ମାତର୍ କେ ମିସା ବପୁ ରଇବା ଲକ୍‌କେ ପର୍‌ତୁମ୍ ନ ବାନ୍‌ଡେ, ତାର୍ ଗରେ ପୁରିକରି ସେଲକର୍ ନିଜର୍ ସବୁ ଚରାଇ ନେଇ ନାପାଚେ, ମାତର୍ ସେ ବପୁ ରଇବା ଲକ୍‌କେ ଆଗେ ବାନ୍‌ଲେ ସିନା ସେ ତାର୍ ଗରେ ପୁରି ଚରିପାର୍‌ସି ।

୨୮ “ମୁଇ ତମ୍‌କେ ସଡ୍ କଇଲିନି, ଲକ୍‌ମନର୍ ସବୁ ପାପ୍, ଆରି ସେମନ୍ ଜେଡେକ୍ ନିନ୍ଦା କାତା କଇ ପର୍‌ମେସରର୍ ନିନ୍ଦା କଲେ

☆ ୩:୨୨ ୩:୨୨ ମାତିଉ ୯:୩୪; ୧୦:୨୫

ମିସା, ସେ ସବୁଜାକ କେମା କରାଅଇସି । ^{୨୯} ✨ଜେକି ସୁକଲ୍‌ଆଡ଼ମାର୍ ବିରୁଦେ ନିନ୍ଦା କାତା କଇସି, ତାକେ କନ୍ କାଲେ ମିସା ପର୍ମେସର୍ କେମା ନ ଦେଏ, ଆରି ସେ ନ ସାର୍‌ବା ପାପର୍ ଦସି ଅଇସି ।” ^{୩୦} ତାକେ କାରାପ୍ ଆଡ଼ମା ଲାଗିଆଚେ ବଲି ସାସ୍‌ତର୍ ସିକାଉମନ୍ କଇଲାକେ, ଜିସୁ ଏନ୍ତାରି କଇଲା ।

ଜିସୁର୍ ମାଆ ଆରି ବାଇବଇନିମନ୍

(ମାତିଉ ୧୨:୪୬-୫୦; ଲୁକ୍ ୮:୧୯-୨୧)

^{୩୧} ସେଡ଼କିବେଲେ ଜିସୁର୍ ମା ଆରି ବାଇମନ୍ ଆସି ବାଇରେ ଚିଆ ଅଇ ଜିସୁକେ ତାକାଉପାଟାଇଲା । ^{୩୨} ତେଇ ତାର୍ ଚାରିବେଡ଼ତି ବସି ରଇବା ଲକ୍‌ମନ୍ ତାକେ କଇଲା, “ଦେକା, ତମର୍ ମାଆ ଆରି ବାଇ ବଇନି ବାଇରେ ରଇ ତମ୍‌କେ କଜ୍‌ଲାଇନି ।” ^{୩୩} ଜିସୁ ସେମନ୍‌କେ କଇଲା, “କେ ମର୍ ମା ଆରି ବାଇବଇନିମନ୍ ?” ^{୩୪} ସେ ତାର୍ ଚାରିବେଡ଼ତି ବସିରଇବା ଲକ୍‌ମନ୍‌କେ ଦେକିକରି କଇଲା, “ଏମନ୍ ମର୍ ମାଆ ଆରି ମର୍ ବାଇ ବଇନି । ^{୩୫} ଜନ୍ ଲକ୍‌ମନ୍ ପର୍ମେସର୍ ମନ୍‌କଲାଟା ପୁରାପୁରୁନ୍ କର୍‌ବାଇ, ସେ ମର୍ ବାଇ, ବଇନି ଆରି ମା ।”

୪

ବିଅନ୍ ବୁନ୍‌ବା ବିସଇର୍ କାତା

(ମାତିଉ ୧୩:୧-୯; ଲୁକ୍ ୮:୪-୮)

^୧ ✨ଜିସୁ ଆରିତରେକ୍ ଗାଲିଲି ସମ୍‌ଦୁର୍ କଣ୍ଟିଗାନେ ସିକିଆ ଦେବାର୍ ଦାରଲା, ଆରି ଏତେକ୍ ମାଣ୍ଟୁ ଲକ୍‌ମନ୍ ତାର୍ ଲଗେ ଚୁଲ୍‌ଅଇଲାକେ, ସେ ସମ୍‌ଦୁରେ ରଇବା ଗଟେକ୍ ଡଙ୍ଗା ଜାଇ ବସଲା, ଆରି ଗୁଲାଇ ଲକ୍‌ମନ୍ ସମ୍‌ଦୁର୍ ପାଲିକେ ରଇଲା । ^୨ ଜିସୁ ସେମନ୍‌କେ ବେସି ବିସଇ ଉଦାଅରନ୍ ଦେଇ ସିକାଇଲା । ଆରି ସିକାଇବାବେଲେ ସେମନ୍‌କେ କଇଲା,

^୩ “ସୁନା ଗଟେକ୍ ଚାସି ତାର୍ ବିଅନ୍ ବୁନ୍‌ବାର୍ ବାରଇଲା । ^୪ ସେ ବୁନ୍ ବୁନ୍ କେତେକ୍ ବିଅନ୍ ବାଟେ ଅଦରଲା, ଆରି ଚଡ଼ଇମନ୍ ଆସି ସବୁଜାକ ବିଅନ୍ କାଇଦେଲା । ^୫ ଆରି କେତେକ୍ ବିଅନ୍ ଉନା

ମାଟିରଇ ତଲେ ପାକ୍‌ନା ରଇଲା ବୁର୍ବୁ ଅଦରଲା, ଆରି ମାଟି ଉନା ରଇଲାକେ ଦାପ୍‌ରେ ଗାଜା ଅଇଲା ।^୭ ମାତର୍ ବେଲ୍ ଉଦ୍‌ଲାକେ ଗାଜା ଅଇଲାଟା ପଡ଼ି ମସ୍‌ରିଗାଲା, ଆରି ଚେର୍ ବେଦି ନ ରଇଲାଜେ ସୁକ୍‌ଗାଲା ।^୮ ଆରି କେତେକ୍ ବିଅନ୍ କାଟା ବୁଟା ମଜାଇ ଅଦରଲା, ଆରି କାଟା ବୁଟାମନ୍ ଉଟି ବଡ଼ିକରି ଗାଜା ଅଇ ସବୁକେ ଚାପି ପାକାଇଲାଇ । ଚାପିଦେଲାକେ କାଇ ଦାନ୍ ମିସା ଅଏ ନାଇ ।
 「ମାତର୍, ଆରି କେତେକ୍ ବିଅନ୍ ନିକ ବୁର୍ବୁ ଅଦରଲା ଆରି ଗାଜା ଅଇ ଉଟି ବଡ଼ିକରି ତିରିସ୍ ଗୁଣ୍ ଯାଟେ ଗୁଣ୍ ଆରି ସଏ ଗୁଣ୍ ଜାକ ପସଲ୍ ଦେଲା ।」

^୯ଆରି ଜିସୁ କଇଲା, “ଜାକେ ସୁନ୍‌ବାକେ କାନ୍ ଆଟେବଇଲେ, ସେ ମନ୍‌ଦେଇ ସୁନ୍ ।”

ଜିସୁ ସେ ଉଦାଅରନ୍ କାଇକେ କଇଲା

(ମାତିଉ ୧୩:୧୦-୧୭; ଲୁକ୍ ୮:୯-୧୦)

^{୧୦}ଜିସୁ ଗଟେକ୍‌ଲକ୍ ରଇଲା ବେଲେ ଡାର୍‌ସଙ୍ଗ୍ ରଇଲା ଲକ୍‌ମନ୍ ଆରି ବାର୍‌ଟା ସିସ୍‌ମନ୍ ତାକେ ପାଚାରଲାଇ, “ତମେ କାଇକେ ଉଦାଅରନ୍ ଦେଇ ସିକାଇଲାସ୍‌ନି ?”
^{୧୧}ଜିସୁ ସେମନ୍‌କେ କଇଲା, “ପର୍‌ମେସରର୍ ରାଇଜେ ଲୁଟିକରି ରଇଲା ବିସଇ ତମେ ବୁଜିପାରଲାସ୍‌ନି, ମାତର୍ ବାଇରେ ରଇବା ବିନ୍ ଲକ୍‌ମନ୍‌କେ ଉଦାଅରନ୍ ଦେଇ କୁଆ ଅଇଲାନି ।”
^{୧୨}ଜେନ୍ତାର୍‌କି

“ମୁଇ କର୍‌ବା କାମ୍‌ମନ୍ ଦେକ୍‌ତେ ରଇଲେ ମିସା ବୁଜି ନାପାରଡ୍, ଆରି କଇଲାଟାମନ୍ ସୁନି ସୁନି ମିସା ନ ବୁଜଡ୍, ବୁଜଡାଇଆଲେ ସେମନ୍ ପର୍‌ମେସରର୍ ଲଗେ ବାଅଡ୍‌ତାଇ ଆରି ପାପ୍ କେମା ପାଇତାଇ ।”

ଜିସୁ କାତାନିର୍ ଅରଡ୍ ବୁଜାଇଲା

(ମାତିଉ ୧୩:୧୮-୨୩; ଲୁକ୍ ୮:୧୧-୧୫)

^{୧୩}ଜିସୁ ସେମନ୍‌କେ କଇଲା, “ଏ ଉଦାଅରନର୍ ଅରଡ୍ ତମେ ବୁଜାସ୍ ନାଇ କି ? ତେବେ ବିନ୍ ଉଦାଅରନର୍ ଅରଡ୍ କେନ୍ତ୍ର ବୁଜସା ?
^{୧୪}ଚାସି ପର୍‌ମେସରର୍ ବାକିଅ ବୁନ୍‌ସି, ^{୧୫}ଜନ୍‌ଲକ୍‌ମନ୍ ସୁନ୍‌ବାଇ ଆରି ସୁନ୍‌ଲା ଦାପ୍‌ରେ, ସଇତାନ୍ ଆସି ସେମନ୍‌ର୍ ଚାନେଅନି ବୁନିରଇବା ବାକିଅ ଜିକି ନେଇସି, ସେମନ୍ ବୁନିରଇବା ବାଟ୍‌ଲଗର୍

ବିଅନ୍ ପାରା । ୧୭ ସେନ୍ତାର ସେ, ଜନଲକ୍ଷ୍ମୀନ୍ ବାକିଅ ସୁନ୍ଲୀ ଦାପ୍ରେ ସାରଦା ଅଇ ସେଟା ମାନବାଇ, ସେଲକ୍ ପାକ୍ନା ରଇବା ଜାଗାଇ ଅଦରଲୀ ବିଅନ୍ ପାରା । ୧୭ ମାତର୍ ସେମନର୍ ଟାନେ ତେର୍ ନ ବେଦିରଏଜେ ଚନେକର୍ପାଇ ବିସ୍ବାସ୍ କରି ରଇବାଇ, ପଚେ ବାକିଅରଲୀଗି କସ୍ଟ କି ତାଡ୍ନା ଆଇଲେ, ସେ ଦାପ୍ରେ ବିସ୍ବାସ୍ ଚାଡି ଦେବାଇ । ୧୮ ଆରି ଜନ୍ଲକ୍ଷ୍ମୀନ୍ ବାକିଅ ସୁନ୍ବାଇ, ମାତର୍ ତାର ଦିନକର୍ ବିସଇର୍ ଚିନ୍ତା, ଦନର୍ ମାୟା ଆରି ବିନ୍ ବିନ୍ ବିସଇର୍ ଲାଲ୍‌ସାଟାନେ ପୁରିକରି ମାପ୍‌ରୁର୍ ବାକିଅକେ ଚାପିପାକାଇସି, ତେଇ ମାପ୍‌ରୁର୍ ବାକିଅ ନିକ କାମ୍ ନ କରେ । ୧୯ ସେନ୍ତାରି ଅଦେକ୍ ଲକ୍ଷ୍ମୀନ୍ ବିଅନ୍ ବୁନିରଇବା କାଟାଲାଟା ବୁଇଁ ପାରା । ୨୦ ବାକିଲକ୍ଷ୍ମୀନ୍ ବାକିଅ ସୁନି ସେଟା ମାନବାଇ ଆରି ତିରିସ୍ ଗୁଣ୍, ସାଟେ ଗୁଣ୍ ଆରି ସଏ ଗୁଣ୍ ପଲ୍ ଦେବାଇ, ସେମନ୍ ବିଅନ୍ ଅଦ୍ରି ରଇବା ନିକ ବୁଇଁ ପାରା ।”

ବତି କୁଦ୍‌ରା

(ଲୁକ୍ ୮:୧୭-୧୮)

୨୧ ✠ଜିସୁ ଆରିତରେକ୍ ସେମନ୍‌କେ କଇଲା, “ବତି ତସାଇ ମାନ୍ ତଲେ କି କଟ୍ ତଲେ ସଙ୍ଗାଇବାକେ ନ ଆନଡ୍ । ବତି, କୁଦ୍‌ରାଇ ସଙ୍ଗାଇବାକେ ତସାଇବାଇ । ୨୨ ✠କାଇକେବଇଲେ ଲକ୍ଷ୍ମୀନ୍‌କେ ଏବେଜାକ ନାଜାନି ରଇବା ବିସଇ ଜାନାଇ ଦିଆଅଇସି, ଆରି ଜନ୍ ବିସଇ ସବୁ ଲୁଚି ରଇସି, ସେଟା ମେଲାକରି ଦିଆଅଇସି । ୨୩ ଜଦି ଜାକେ ନିକ ସଙ୍ଗ୍ ସୁନ୍‌ବାର୍ ଆଚେ, ସେ ନିକ ସଙ୍ଗ୍ ସୁନ ।”

୨୪ ✠ଆରି ଜିସୁ ସେମନ୍‌କେ କଇଲା, “କାଇଟା ସୁନ୍‌ଲାସ୍‌ନି, ସେ ବିସଇ ଏତାଇକରି ଜାଗରଡ୍ ରୁଆ । ଜନ୍ ନାପେ ତମେ ନାପ୍‌ସା, ସେ ନାପେ ପର୍‌ମେସର୍ ତମ୍‌କେ ନାପ୍‌ସି, ଆରି ତାର୍‌ତେଇଅନି ଅଦିକ୍ । ୨୫ ✠କାଇକେବଇଲେ ଜାକେ ରଇ, କାମେ ଲାଗାଇରଇସି ତାକେ ଅଦିକ୍ ଦିଆଅଇସି, ଆରି ଜାକେ ରଇ, କାମେ ନ ଲାଗାଏ, ତାର୍‌ଟାନେ ଅନି ସେ ଅଲପ୍ ରଇଲାଟା ମିସା ନିଆଅଇସି ।”

୨୬ ଆରି ସେ କଇଲା, “ପର୍‌ମେସର୍‌ର ରାଇଜ୍ ଏନ୍ତାରି । ଗଟେକ୍ ଲକ୍ ନିଜର୍ ପଦାଇ ବିଅନ୍ ବୁନ୍‌ସି । ୨୭ ଆରି, ସେ ଦିନ୍‌ବେଲେ କି

✠ ୪:୨୧ ୪:୨୧ ମାତିଉ ୫:୧୫; ଲୁକ୍ ୧୧:୩୩ ✠ ୪:୨୨ ୪:୨୨ ମାତିଉ ୧୦:୨୭; ଲୁକ୍ ୧୨:୨ ✠ ୪:୨୪ ୪:୨୪ ମାତିଉ ୭:୨; ଲୁକ୍ ୭:୩୮ ✠ ୪:୨୫ ୪:୨୫ ମାତିଉ ୧୩:୧୨; ୨୫:୨୯; ଲୁକ୍ ୧୯:୨୭

ରାତିବେଳେ, ସଇଲେ କି କାମ୍ କଲେ ମିସା ବିଅନ୍ କେନ୍ତ୍ରୀ ଆଁକରି ବଡ଼ସି, ସେଟା ନାଜାନେ, ^{୨୮} ଜମି ତାରମନ୍କେ ପଲ୍ ଉଦ୍‌ଜାଇସି, ପରତୁମ୍ ପତର୍, ପଚେ କେଡ଼, ତାରପଚେ ମୁଞ୍ଜି ପୁରୁନ୍ ରଇବା କେଡ଼ । ^{୨୯} ମାତର୍ ଚାସ୍ ପାର୍ଲା ଦାପ୍‌ରେ କାଟ୍‌ବା ବେଲା କେଟିଆଇଲେ, ଚାସି କାଟ୍‌ବାକେ ଇଲା ଲାଗାଇସି ।”

ସର୍ସୁ ମୁଞ୍ଜିର୍ କାତାନି

(ମାତିଉ ୧୩:୩୧, ୩୨, ୩୪; ଲୁକ୍ ୧୩:୧୮-୧୯)

^{୩୦} ସେ ଆରି ତରେକ୍ କଇଲା, “ଆମେ ପର୍‌ମେସରର୍ ରାଇଜ୍ କାଇଟା ସଙ୍ଗ୍ ସମାନ୍ କରୁ ? ନଇଲେ କାଇ ଉଦାଅରନ୍ ସଙ୍ଗ୍ ବୁଜାଇଦେଉ ? ^{୩୧} ସେଟା ଗଟେକ୍ ସର୍ସୁ ମୁଞ୍ଜି ପାରା, ବୁର୍ସ୍ ବୁନ୍‌ବା ବେଲେ ସେଟା ପୁର୍ତିବିର୍ ସର୍ସୁ ମୁଞ୍ଜିତେଇ ଅନି ସାନ୍‌ଟା, ^{୩୨} ମାତର୍ ବୁନ୍‌ଲେ, ସେଟା ବଡ଼ିକରି ସର୍ସୁ ସାଗର୍ ଟାନେଅନି ବଡ଼ ଅଇସି, ଆରି ତାର କେନ୍ଦି ଏନ୍ତି ବଡ଼ ବଡ଼ ଅଇଜାଇସି ଜେ, ସରଗର୍ ଚତଇମନ୍ ତାର କେନ୍ଦାଇ ବାସା ଅଇବାଇ ।”

^{୩୩} ଜିସୁ ଏନ୍ତି କେତେକ୍ କେତେକ୍ ଉଦାଅରଣ୍ ସଙ୍ଗ୍ ସେମନ୍‌ର୍ ବୁଜ୍‌ବା ବପୁ ଇସାବେ ବାକିଅ ସୁନାଇତେ ରଇଲା, ^{୩୪} ଆରି ଉଦାଅରନ୍ ନଇତେ ସେ ତାକର୍ ଲଗେ କାଇ କାତା ନ କଇତେରଇଲା । ମାତର୍ ଜିସୁ ବିନ୍ ଲକ୍‌ମନ୍ କେ ନ ରଇଲାବେଲେ ନିଜର୍ ସିସ୍‌ମନ୍‌କେ ସର୍ସୁ ବିସଇ ବୁଜାଇ ଦେଇତେ ରଇଲା ।

ଜିସୁ ପବନ୍‌କେ ତବିର୍ କଲା

(ମାତିଉ ୮:୨୩-୨୭; ଲୁକ୍ ୮:୨୨-୨୫)

^{୩୫} ସେଦିନେ ସଞ୍ଜ୍ ଅଇଲାକେ ଜିସୁ ସେମନ୍‌କେ କଇଲା, “ଆସା, ଗାଡ଼ ସେପାଟେ ଜୁ ।” ^{୩୬} ସେଡ଼କିବେଲେ ସେମନ୍ ଲକ୍ ଗଅଲି ଚାଡ଼ିକରି, ଜିସୁ ବସି ରଇଲା, ଗଟେକ୍ ଡଙ୍ଗା ଲାଇ ବସ୍‌ଲାଇ । ଆରି ବିନ୍ ବିନ୍ ଡଙ୍ଗା ମିସା ତାକର୍ ସଙ୍ଗ୍ ରଇଲା । ^{୩୭} ପଚେ ଅଟାଡ଼ ବେସି ବାଉପବନ୍ ଆଇଲା, ଆରି ଲଅଡ଼ିର୍ ମାଡ଼କେ ଡଙ୍ଗା ପାନି ପୁରୁନ୍ ଅଇବାର୍ ଦାରଲା । ^{୩୮} ସେଡ଼କିବେଲେ ଜିସୁ ଡଙ୍ଗା ପର୍ ଚତୁ ମାର୍‌ବା ଲଗେ ମର୍‌ଲା ମୁଣ୍ଡିଆକରି ସଇଦେଇ ରଇଲା । ସିସ୍‌ମନ୍ ତାକେ ଉଟାଇ କଇଲା, “ଏ ଗୁରୁ, ଆମେ ବୁଡ଼ିଜିବୁବେ, ତମ୍‌କେ କାଇ ଚେଡ଼ନା ନାଇ ?”

୩୯ ସେଡ଼କିବେଲେ ଜିସୁ ଉଚି ପବନ୍କେ ଦମ୍‌କାଇ ଦେଇ ଲଅଡ଼ିକେ କଇଲା, “ତବିର୍ ଅଇ ରୁପ୍ ର ।” ସେଡ଼କି ବେଲେ ପବନ ବନ୍ଦ ଅଇଲା, ଆରି ସବୁ ତବିର୍ ଅଇଲା । ୪୦ ଆରି ସେ ସିସ୍‌ମନ୍କେ କଇଲା, “କାଇକେ ଏଡେକ୍ ଡରଲାସ୍‌ନି ? ତମ୍କେ ଏବେଜାକ ମରଲଗେ ବିସ୍‌ବାସ୍ ନାଇ କି ?”

୪୧ ସେମନ୍ ବେସି ଡରି ଜାଇକରି ତାକର୍ ତାକର୍ ବିଡ଼ରେ କୁଆବଲା ଅଇଲା, “ତେବେ ଏ କେ ଜେ, ପବନ ଆରି ଲଅଡ଼ି ମିସା ତାର୍ ଆଦେସ୍ ମାନଲାଇନି ?”



ତୁମାଦାରଲା ଲକ୍କେ ଜିସୁ ନିମାନ୍ କଲା

(ମାଡ଼ିଉ ୮:୨୮-୩୪; ଲୁକ୍ ୮:୨୭-୩୯)

୧ ଜିସୁ ଆରି ତାର୍ ସିସ୍‌ମନ୍ ସମଦୁର୍ ସେପାଟେ ରଇବା ଗରାସିୟମନର୍ ଜାଗାଇ କେଟ୍‌ଲାଇ । ୨ ଜିସୁ ଡଙ୍ଗାଅନି ଉତରଲା ଦାପରେ ଗଟେକ୍ ତୁମା ଦାରିରଇବା ଲକ୍ ମସ୍‌ନେ ଅନି ବାରଇ ତାକେ ବେଟ୍‌ଅଇବାକେ ଆଇଲା । ୩ ସେ ଲକ୍ ମସ୍‌ନେ ବାସାଅଇରଇଲା, ଆରି କେ ମିସା ତାକେ ସିକିଲି ସଙ୍ଗ୍ ବାନ୍ଧି ନାପାର୍‌ତେ ରଇଲା । ୪ ତାକେ କେଡେକ୍ ଡର୍ ଗତେ କଡୁ ଆରି ଆତେ ସିକିଲି ସଙ୍ଗ୍ ବାନ୍ଧିଲେ ମିସା, ସେ ସିକିଲି ସବୁ ଚିଡାଇ ଦେଇ, କଡୁ ସବୁ ବାଙ୍ଗାଇ ପାକାଇତେ ରଇଲା । ତାକେ ବାନ୍ଧି ସଙ୍ଗାଇବାକେ କାର୍ ମିସା ବପୁ ନ ରଇଲା । ୫ ସେ ଦିନ୍ ରାତି ସବୁବେଲେ ମସ୍‌ନେ ଆରି କୁପ୍‌ଲିଡେଇ ରଇ କିର୍କିରଡେ ରଇଲା, ଆରି ପାକ୍‌ନା ସଙ୍ଗ୍ ଗାଗ୍‌ଡେ ମୁଣ୍ଡେ ମାରିଅଇ କଣ୍ଡିଆ ବଣ୍ଡିଆ ଅଇଜାଇତେରଇଲା ।

୬ ସେ ଜିସୁକେ ଦୁରିକେ ଅନି ଦେକି ପାଲାଇ ଆସି ତାର୍ ମୁଆଟେ ଅଦରଲା । ୭ ଆରି ଆଉଲି ଅଇ କିର୍କିରି କରି କଇଲା, “ଏ ସବୁର୍ ଟାନେଅନି ବଡ଼ ପର୍‌ମେସରର୍ ପ ଜିସୁ, ମର୍ ଟାନେ ତମର୍ କାଇ କାମ୍ ଆଟେ ? ମୁଇ ତମ୍କେ ପର୍‌ମେସରର୍ ନାଉଁ ଦାରି ଗୁଆରି କରି କଇଲିନି, ମକେ କସଟ ଦିଆନାଇ ।” ୮ କାଇକେବଇଲେ ଜିସୁ ତାକେ ଆଗ୍‌ଡୁ କଇତେରଇଲା, “ଏରେ ତୁମା, ଏ ଲକ୍‌ଟାନେଅନି ବାରଇ ଜା ।”

^୯ ଆରି, ଜିସୁ ତାକେ ପାଚାରୁଲା, “ତର୍ ନାଉଁ କାଇ ନାଉଁ ?” ସେ ତାକେ କଇଲା, “ମର୍ ନାଉଁ ବାଇନି ତୁମା, ଏନ୍ତି ଆମେ ଜବର୍ ଆରୁ ।”

^{୧୦} ଆରି, ସେ ଲକ୍ ଜେନ୍ତିକି ସେମନ୍‌କେ ସେ ଜାଗାଇ ଅନି ବାଇରେ ନ ପାଟାଅ ବଲି, ଜିସୁକେ ତର୍‌କେ ତର୍ ଜୁଆର୍ ବିଆର୍ କଲା ।

^{୧୧} ସେ ଲଗର୍ କୁପ୍‌ଲି ପାଲିକେ ବେସି ଗୁସ୍‌ରି ମାନ୍ଦା ଚାଟେରଇଲା । ^{୧୨} ଆରି ତୁମାମନ୍ ଜିସୁକେ ଜୁଆର୍ ବିଆର୍ କରି କଇଲା, “ସେ ଗୁସ୍‌ରିମନ୍‌ର୍ ବିଡ୍‌ରେ ପୁର୍‌ବାକେ ଆମ୍‌କେ ପାଟାଆ ।” ^{୧୩} ଜିସୁ ସେମନ୍‌କେ ଆଦେସ୍ ଦେଲାଦାପ୍‌ରେ, ସେ ଲକ୍‌ର୍ ଲଗେଅନି ତୁମାମନ୍ ବାରଇକରି ଗୁସ୍‌ରିମନ୍‌ର୍ ବିଡ୍‌ରେ ପୁର୍‌ଲା । ସେଡ୍‌କିବେଲେ, ସେ ଆଡାର୍ ବିଡ୍‌କିକରି ପାଲାଇଲା । ଆରି କୁପ୍‌ଲି ଅନି ଗସ୍‌ରିକରି ସମ୍‌ଦୁରେ ଜାଇ ବୁଡି ମରିଗାଲା । ଆଡାରେ ଗୁସ୍‌ରି ମାନ୍ଦା ପାକାପାକି ଦୁଇଅଜାର୍‌ଟା ରଇଲା ।

^{୧୪} ଗୁସ୍‌ରିମନ୍‌କେ ଚାରିଅଟେରଇବା ଲକ୍‌ମନ୍ ପାଲାଇ ଜାଇ ଗାଉଁ ଆରି ଗୁଡାମନ୍‌କେ ସେଟା ଜାନାଇଲା । ଜାନାଇଲାଟା ସୁନି ଲକ୍‌ମନ୍ “ତେଇ କାଇଟା ଅଇଲାଆଟେ ?” ବଲି ଦେକ୍‌ବାର୍ ଆଇଲା । ^{୧୫} ଆରି ଲକ୍‌ମନ୍ ଜିସୁର୍ ଲଗେ ଆସିକରି ସେ ତୁମା ଦାରି ରଇଲା ଜନ୍‌ଲକ୍‌କେ କି ଆଗତୁ ବାଇନି ତୁମା ଦାରିରଇଲା, ସେ ଲକ୍ ନିମାନ୍ ଲୁଗା ପିନ୍ଧିକରି ନିକ ଲକ୍‌ପାଚା ବସିରଇବାଟା ଦେକି ଡରିଗାଲା । ^{୧୬} ଆରି ଜନ୍ ଲକ୍‌ମନ୍ ଦେକିରଇଲା, ସେମନ୍ ସେ ତୁମା ଦାରିରଇବା ଲକ୍‌କେ କାଇଟା ଅଇରଇଲା, ସେଟା ଆରି ଗୁସ୍‌ରିମନ୍‌କେ ଅଇଲା ବିସଇ ସେମନ୍‌କେ କଇଦେଲା ।

^{୧୭} ତେଇ ଲକ୍‌ମନ୍ ଜିସୁକେ ସେମନ୍‌ର୍ ସନ୍ଧିଅନି ଚାଡି ଜିବାକେ ବାବୁଜିଆ କଲା ।

^{୧୮} ପଟେ ଜିସୁ ଡଙ୍ଗାଇ ଚର୍‌ବା ବେଲେ ଜନ୍‌ଲକ୍‌କେ ଆଗତୁ ତୁମା ଦାରିରଇଲା, ସେ ଲକ୍ ତାର୍ ସଙ୍ଗ୍ ରଇବାକେ ବାବୁଜିଆ କଲା ।

^{୧୯} ମାତର୍ ଜିସୁ ତାକେ ତେବାଇକରି କଇଲା, “ତମର୍ ଗରେ, ତମର୍ ନିଜର୍ ଲକ୍‌ମନ୍‌ର୍ ଟାମେ ଜା, ଆରି ପର୍‌ମେସର୍ ତର୍‌ପାଇ ଜନ୍ ବଡ୍ କାମ୍ କଲା ଆଟେ ଆରି ତକେ ଜନ୍ ଦୟା ଦେକାଇ ଆଟେ, ସେଟା ସବୁ ସେମନ୍‌କେ ଜାନାଇଦେସ୍ ।”

୨୦ ତେଜଅନି ସେ ଲକ୍ ଜାଇକରି, ଜିସୁ ତାରପାଇ ଜନ୍ ବଡ଼ କାମ୍ କରିରଇଲା, ସେ ସବୁ ଦେକାପଲି ନଅରେ, ଗାଉଁମନ୍ଦକେ କଇବୁଲୁଲା । ତେଜ ସବୁଲକ୍ କାବା ଅଇଗାଲାଇ ।

ଜିସୁ ଗଟେକ୍ ମଲା ଟକିକେ ଜିବନ୍ ଦେଲା ଆରି ଗଟେକ୍ ରଗି ମାଇଜିକେ ନିମାନ୍ କଲା
(ମାଡ଼ିଉ ୮:୨୩-୨୭; ଲୁକ୍ ୮:୨୨-୨୫)

୨୧ ଜିସୁ ତଜା ଲକ୍ ଜାଇ ଆରିତରେକ୍ ବାଉଡ଼ି ଆଇଲାଦାପରେ, ଜବରଲକ୍ ତାର ଲଗେ ରୁଣ୍ଡୁଲାଇ, ଆରି ସେ ସମ୍ପଦୁର୍ କଣ୍ଡି ରଇଲା । ୨୨ ସେଡ଼କିବେଲେ ଜିଉଦିମନ୍ଦର୍ ପାରତନା ଗରର୍ ମୁକିଅ, ଜାଇରସ୍ ନାଉର୍ ଗଟେକ୍ ଲକ୍ ଆସି ଜିସୁକେ ଦେକି ତାର ଗଡ଼ତଲେ ଅଦରଲା । ୨୩ ଆରି ବେସି ବାରୁଜିଆ କରି କଇଲା, “ମର୍ ଟକି ମର୍ବା ଉପ୍ରେ ଆରେ, ସେ ଜେକ୍ଟି ନିକ ଅଇ ବର୍ସି, ତେବର୍ ପାଇ ତମେ ଆସି ତାର ଉପ୍ରେ ଆଡ଼ ସଙ୍ଗଇଦିଆସ୍ ।”

୨୪ ଜିସୁ ତାକର୍ ସଙ୍ଗ ଗାଲା, ଆରି ଗାଦିଲକ୍ ତାର ପଟେ ପଟେ ଜିବାର୍ ଦାରଲାଇ, ଆରି ଲକ୍ମନ୍ ତାକେ ଡାବାଡାବି ଅଇତେ ରଇଲାଇ ।

୨୫ ତେଜ ଗଟେକ୍ ବାର ବରସ୍ ଜାକ ଗାଗ୍ତେଅନି ବନି ଜିବା ମାଇଜିଟକି ରଇଲା । ୨୬ ଜେ କି କେତେ କେତେ ଡାକ୍ଟରଗାନେ ଜାଇକରି ମିସା ସାସ୍ତି ବଗି ସବୁ ବିକିଦେଇ ରଇଲା । ମାତର୍ ଅଲପ୍ମିସା ନିକ ନ ଅଇ ଅଦିକ୍ ଅଦିକ୍ ଅଇଜାଇତେରଇଲା । ୨୭ ଜେତେବେଲେ ସେ ଜିସୁର୍ ବିସଇ ସୁନି, ଲକ୍ ଗଅଲି ବିଡ଼ରେ ପର୍ବାଟେ ଆସି ଜିସୁର୍ ଲୁଗା ଚିଇଲା, କାଇକେବଇଲେ ସେ କଇତେ ରଇଲା, ୨୮ “କେକ୍ଟି ମିସା ମୁଇ ତାର ଲୁଗାଜାଲି ଅଲପ୍ ଚିଇଲେ ନିମାନ୍ ଅଇବି ।”

୨୯ ସେ ଦାପ୍ରେ ତାର ବନି ଜିବାଟା ବନ୍ଦୁଅଇଗାଲା, ସେଟା ସେ ନିଜେ ଜାନି ପାରଲା । ୩୦ ସେ ଦାପ୍ରେ ଜିସୁ ନିଜର୍ ଟାନେଅନି ସକ୍ତି ବାରଇବାଟା ଜାନିକରି ଲକ୍ମନ୍ଦର୍ ବାଟେ ବୁଲି ଦେକି କଇଲା, “କେ ମର୍ ଲୁଗା ଚିଇଲା ?”

୩୧ ତାର ସିସ୍ତମନ୍ ତାକେ କଇଲାଇ, “ତମେତା ଦେକ୍‌ଲାସ୍‌ନି, ଲକ୍‌ମନ୍ ତମର୍ ଉପରେ ଡାବା ଡାବି ଅଇଗାଲାଇନି ଆରି ତମେ କେନ୍ତ୍ର କଇଲାସ୍‌ନି, କେ ମକେ ଚିଇଲା ବଲି ?”

୩୨ ମାତର୍ ଜେ ଏଟା କରିରଇଲା, ତାକେ ଦେକ୍‌ବାକେ ସେ ଚାରିବେଡ଼ି ଆଁକି ବୁଲାଇବାର୍ ଦାର୍‌ଲା । ୩୩ ସେଡ଼କି ବେଲେ ସେ ମାଲ୍‌ଜିଟକି ତାକେ ଜନ୍ ଜନ୍‌ଟା ଗଟିଆରେ, ସେଟା ଜାନି, ଡରିକରି ତରତରି ତରତରି ଆସି ଜିସ୍ତୁ ଗଡ଼ତଲେ ଅଦ୍‌ରି ସବୁ ସଡ଼କାତା କଇଲା । ୩୪ ଜିସ୍ତୁ ତାକେ କଇଲା, “ନୁନି, ମରଗାନେ ବିସ୍‌ବାସ୍ କଲାକେ ତୁଇ ନିମାନ୍ ଅଇ ଆରୁସ୍, ସାନ୍ତିଅଇ ଜା ଆରି ତର୍ ରଗେଅନି ନିମାନ୍ ଅଇ ର ।”

୩୫ ସେ ଏ କାତା କଇଲା ବେଲେ ଜିଉଦି ମନର୍ ପାର୍‌ତନା ଚାଲାଉ ଜାଇରସର୍ ଗରେଅନି ଗଟେକ୍ ଲକ୍ ଆସି କଇଲା, “ତମର୍ ନୁନି ମରିଗାଲାବେ, କାଇକେ ଗୁରୁକେ ଆରି କସ୍‌ଟ ଦେଲାସ୍‌ନି ?”

୩୬ ମାତର୍ ଜିସ୍ତୁ ସେମନ୍ କାତା ଅଇଲାଟା ନ ସୁନ୍‌ଲାପାରାଅଇ ପାର୍‌ତନା ଚାଲାଉକେ କଇଲା, “ଡରାନାଇ, ଆବ୍‌କା ବିସ୍‌ବାସ୍ କରା ।” ୩୭ ଆରି ପିତର୍, ଜାକୁବ୍ ଆରି ତାର୍ ବାଇ ଜଅନକେ ଚାଡ଼ି ଆରି କାକେ ନିଜର୍ ସଙ୍ଗ୍ ଜିବାକେ ଦେଏ ନାଇ । ୩୮ ସେମନ୍ ପାର୍‌ତନା ଚାଲାଉର୍ ଗରେ ଅଇଲା ଦାପ୍‌ରେ, ଜିସ୍ତୁ ଆଉଲି ଅଇବାଟା ଆରି ବେସି ମାର୍‌ଟପ୍ ଅଇ କାନ୍‌ବାଟା ଦେକ୍‌ଲା । ୩୯ ମାତର୍ ବିଡ଼ରେ ଜାଇ ଲକ୍‌ମନ୍‌କେ କଇଲା, “କାଇକେ ଆଉଲି ଅଇ କାନ୍‌ଲାସ୍‌ନି ? ଏ ନୁନି ମରେ ନାଇ, ଅବ୍‌କା ସଇଦେଇଆଟେ ।” ସେଡ଼କି ବେଲେ ସେମନ୍ ଜିସ୍ତୁକେ ଲାଜ୍ କରାଇ କଇବାର୍ ଦାର୍‌ଲାଇ ।

୪୦ ମାତର୍ ସେ ସବୁକେ ବାର୍‌କରି ଟକିର୍ ଆୟାବାବାକେ ଆରି ନିଜର୍ ସିସ୍ତମନ୍‌ର୍ ସଙ୍ଗ୍, ତାକେ ଜନ୍ ଲଗେ ତୁଲାଇ ରଇଲାଇ, ସେ ଜାଗାଇ ଗାଲା । ୪୧ ଆରି ଟକିର୍ ଆଡେଦାରି ତାକେ କଇଲା, “ଟଲିତାକୁମ୍ !” ବଇଲେ “ଏ ନୁନି ମୁଇଁ ତକେ କଇଲିନି ଉର୍ !”

୪୨ ଏଡ଼କି କଇଲା ଦାପ୍‌ରେ ଟକି ଉଟି ବୁଲ୍‌ବାର୍ ଦାର୍‌ଲା, ତାକେ ବାର ବରସ୍ ଅଇରଇଲା । ସେଡ଼କିବେଲେ ସବୁଲକ୍‌ମନ୍ ଦେକି ଅଦିକ୍ କାବାଅଇଗାଲାଇ । ୪୩ ଜେନ୍ତ୍ର ଆରି, କେ ମିସା ଟକିକେ ଗଟ୍‌ଲା ବିସଇ ନାଜାନଡ଼, ତେବର୍ ପାଇ ସେ ଟକିର୍ ଆୟାବାବାକେ

ଅଦିକ୍ ତାଟ୍ ସଙ୍ଗ୍ ଆଦେସ୍ ଦେଲା, ଆରି “ଟକିକେ କାଇଟା ଆଲେ କାଇବାକେ ଦିଆସ୍ ।” ବଲି କଇଲା ।



ନିଜର୍ ଗାଏଁ ଜିସୁକେ ନାମତ୍ ନାଇ

(ମାତିଉ ୧୩:୫୩-୫୮; ଲୁକ୍ ୪:୧୭-୩୦)

୧ ଜିସୁ ସେ ଜାଗା ଚାଡ଼ି, ସାନ୍‌ବେଲେ ଅନି ବଡ଼ିଆଇଲା ନଅରେ ଆଇଲା, ଆରି ତାର୍ ସିସ୍‌ମନ୍ ମିସା ତାର୍ ସଙ୍ଗ୍ ଗାଲାଇ ।
୨ ବିସ୍‌ରାମ୍‌ବାର୍ ଆଇଲାକେ, ସେ ଜିଉଦିମନର୍ ପାର୍‌ତନା ଗରେ ସିକିଆ ଦେବାର୍ ଦାରଲା, ଆରି କେତେ କେତେ ଲକ୍ ତାର୍ କାତା ସୁନି କାବା ଅଇ କଇଲାଇ, “ଏ ଲକ୍ ଏ ସବୁଜାକ କନ୍ତି ଅନି ସିକିଲା ? ଆରି, ଆକେ ଏନ୍ତାରି ଗିଆନ୍ କେ ଦେଲା ? ଆରି କେବେ ନ ଅଇବା କାମର୍ ବପୁ କନ୍ତି ଅନି ପାଇଲା ?”
୩ ଏ ଲକ୍‌ତା ସେ ବାଡ଼ଇ । ସେ ମରିୟମର୍ ପଅ, ଜାକୁର୍, ଜସି, ଜିଉଦା ଆରି ସିମନ୍ ତାର୍ ବାଇ ଅଇବାଇ । ଆର୍ ବଇନିମନ୍ ତା ଇଡ଼ି ଆମର୍ ସଙ୍ଗ୍ ଆତଡ଼ ।” ଏନ୍ତାରି କଇକରି ସେମନ୍ ତାକେ ମାନତ୍ ନାଇ ।

୪ *ତେଇ ଜିସୁ ସେମନ୍‌କେ କଇଲା, “ନିଜର୍ ନଅରର୍ କୁଟୁମର୍ ଲକ୍‌ମନ୍‌କେ ଆରି ନିଜର୍ ଗରର୍ ଲକ୍‌କେ ଚାଡ଼ି ବାକି ସବୁ ଜାଗାଇ ବାବଦାଦିମନ୍‌କେ ସନ୍‌ମାନ୍ ମିଲ୍‌ସି ।”
୫ ସେଜାଗାଇ ଆରି କେତେଟା ରଗିମନ୍‌କେ ସେ ଆଡ଼ ସଙ୍ଗାଇକରି ନିକ କର୍‌ବାଟା ଚାଡ଼ି ଆରି କାଇ ନ ଅଇବା କାମ୍ କରିନାପାରଲା । କାଇକେବଇଲେ ତେଇର୍ ଲକ୍‌ମନ୍ ତାକେ ବିସ୍‌ବାସ୍ କରତ୍ ନାଇ ।
୬ ଆରି ତେଇର୍ ଲକ୍‌ମନ୍ ତାକେ ବିସ୍‌ବାସ୍ ନ କର୍‌ବାଟା ଦେକି ଜିସୁ କାବାଅଇଗାଲା ।

ଜିସୁ ବାର୍‌ଟା ସିସ୍‌ମନ୍‌କେ ପାଟାଇଲା

(ମାତିଉ ୧୦:୫-୧୫; ଲୁକ୍ ୯:୧-୬)

୭ ପଟେ ସେ ଚାରିବେଡ଼ଡ଼ିର୍ ଗାଉଁ ମନ୍ ବୁଲି ବୁଲି ସିକିଆ ଦେବାର୍ ଦାରଲା । ଏଡ଼କି ବିଡ଼ରେ ସେ ବାରଟା ସିସ୍‌ମନ୍‌କେ ଲଗେ ଡାକି, ଦୁଇ ଦୁଇ ଲକ୍‌କେ ପାଟାଇବାର୍ ଆରାମ୍ କଲା, ସେମନ୍‌କେ ତୁମାମନ୍‌କେ ଚାଡ଼ାଇବାକେ ଅଦିକାର୍ ଦେଲା ।
୮ ଜିବାବେଲେ ଗଟେକ୍ ଡାଙ୍ଗ୍

☆ ୨:୪ ୨:୪ ଜଅନ୍ ୪:୪୪

ଚାଡ଼ି ବାଟ କରତର ପାଇ ରୁଟି କି ବେସ୍‌ନିଟାନେ ତାରୁ ନ ନିଆ ବଲି ଆଦେସ୍ ଦେଲା ।^୯ ମାତର ସେମନ୍‌କେ ପାଣ୍ଡୁଇ ପିନ୍ଦ୍‌ବାକେ କଇଲା, ପିନ୍ଦିରଇବା ଚକା ଚାଡ଼ି ଆରି ଗଟେକ୍ ଚକା ନିଆନାଇ ବଲି କଇଲା ।^{୧୦} “ଜେଡେବେଲେ ତମ୍‌କେ ଜାର୍ ଗରେ ତାକ୍‌ବାଇ ସେ ନଅର୍ ଚାଡ଼ିଜିବା ଜାକ ତେଇସେ ରୁଆ ।^{୧୧} ✨ଜଦି କନ୍ ନଅରର୍ ଲକ୍‌ମନ୍ ତମ୍‌କେ ନ ନାମଡ଼, ଆରି ତମର୍ କାତା ନ ସୁନଡ଼, ସେ ଜାଗାଇ ଅନି ଆଇବା ବେଲେ ସେମନ୍‌ର୍ ବିରଦେ ସାକି ଇସାବେ, ତମର୍ ପାଦର୍ ଦୁଲି ପାପ୍‌ଡ଼ିଆସ୍ । ଏଟାର୍‌ଲାଗି ସେ ନଅରର୍ ଲକ୍‌ମନ୍ ଜାନ୍‌ବାଇ ଜେ, ପର୍‌ମେସର୍ ସେମନ୍‌କେ ଡଣ୍ଡ ଦେଇସି ।”

^{୧୨} ସିସ୍‌ମନ୍ ବାରଇ ଜାଇ ଲକ୍‌ମନ୍‌କେ “ତମର୍ ପାପ୍ ଟାନେଅନି ବାଉଡା ।” ବଲି ଜାନାଇଲା ।^{୧୩} ✨କେତେକ୍ କେତେକ୍ ଲକ୍‌ମନ୍‌ର୍ ଟାନେଅନି ତୁମା ଚାଡ଼ାଇଲା, ଆରି କେତେକ୍ ରଗି ଲକ୍‌ମନ୍‌କେ ଚିକନ୍ ଲାଗାଇ ନିମାନ୍ କଲା ।

**ତୁବନ୍ ଦେଉ ଜଅନର୍ ମରନ୍
(ମାଡ଼ିଉ ୧୪:୧-୧୨; ଲୁକ୍ ୯:୭-୯)**

^{୧୪} ✨ଜିସୁର୍ ନାଉଁ ସବୁବାଟେ ଉଡ଼ରା ଅଇଗାଲାକେ, ଏରଦ୍ ରାଜା ଜିସୁର୍ ବିସଇ ସୁନ୍‌ଲା, ଆରି ଲକ୍‌ମନ୍ କଇତେରଇଲା, ତୁବନ୍ ଦେଉ ଜଅନ୍ ମରିକରି ଉଟି ଆଟେ, ତେବର୍‌ପାଇ ଏ ସବୁ ନ ଅଇବା କାମର୍ ସକ୍ତି ତାର୍‌ଟାନେ କାମ୍ କଲାନି ।^{୧୫} ମାତର୍ ବିନ୍ ବିନ୍ ଲକ୍‌ମନ୍ କଇତେ ରଇଲା, ଏ ଏଲିୟ, ଆରି କେ କେ କଇତେ ରଇଲା, ଆଗର୍ ବାବବାଦି ମନର୍‌ପାରା ଗଟେକ୍ ଲକ୍ ।

^{୧୬} ମାତର୍ ଏରଦ୍ ଏଟା ସୁନି କଇଲା, “ମୁଇ ଜନ୍ ଜଅନର୍ ମୁଣ୍ କାଟାଇଲି, ସେ ମଲାତେଇଅନି ଉଟିଆଟେ !”^{୧୭} ✨ତେବେ ଏରଦ୍ ନିଜର୍ ବାଇ ପିଲିପର୍ ମାଇଜି ଏରଦିଆକେ ବିବା ଅଇ ରଇଲା । ତାକେ ସାର୍‌ଦା କର୍‌ବାକେ ନିଜେ ଏରଦ୍ ଲକ୍‌ମନ୍‌କେ ପାଟାଇ ତୁବନ୍ ଦେଉ ଜଅନ୍‌କେ ଦାରି, ବାନ୍ଦିକରି ବନ୍ଦି କର୍‌ବାକେ ଆଦେସ୍ ଦେଲା ।^{୧୮} କାଇକେବଇଲେ ଜଅନ୍ ଏରଦ୍‌କେ ତର୍‌କେତର୍ କଇତେରଇଲା

✨ **୬:୧୧** ୬:୧୧ ପେରିଡ଼ ୧୩:୫୧ ✨ **୬:୧୧** ୬:୧୧ ଲୁକ୍ ୧୦:୪-୧୧ ✨ **୬:୧୩** ୬:୧୩ ଜାକୁବ ୫:୧୪ ✨ **୬:୧୪** ୬:୧୪ ମାଡ଼ିଉ ୧୭:୧୪; ମାର୍ଚ୍ଚକ ୮:୨୮; ଲୁକ୍ ୯:୧୯ ✨ **୬:୧୭** ୬:୧୭ ଲୁକ୍ ୩:୧୯, ୨୦

“ମସାର ନିୟମ ଲକ୍ଷ୍ୟାବେ ନିଜର ବାଇର ମାଇଲିକେ ସଙ୍ଗଲବାର ତର ବିଦି ନାଇ ।”

୧୯ ଏନ୍ତାରି କଇଲାଇକେ ଏରଦିଆ ଜଅନ୍କେ ରିସା ଅଇ ତାକେ ମରାଇବାକେ ମନ୍ କରତେରଇଲା, ମାତର ନାପାରତେ ରଇଲା । ୨୦ କାଇକେବଇଲେ ଏରଦ୍ ଜଅନ୍କେ ଗଟେକ୍ ଦରମ୍ ଆରି ସୁକଲ୍ ଲକ୍ ବଲି ଜାନି ତରତେ ରଇଲା, ଆରି ତାକେ ରକିଆ କରବାକେ ଚେସ୍ଟା କରତେରଇଲା । ଜେତେବେଲେ ମିସା ତାର କାତା ସୁନ୍ତେରଇଲା, ବେସି କିଲ୍ବିଲ୍ ଅଇତେରଇଲା । ଏଲେମିସା ସେଟା ସାରଦା ସଙ୍ଗ୍ ସୁନ୍ତେରଇଲା ।

୨୧ ପଟେ ଏରଦିଆର ଜାଗତେ ରଇବା ଦିନ୍ କେଟିଆଇଲା । ଏରଦର ଜନମ୍ ଦିନେ, ନିଜର ମନ୍ତ୍ରି ମନ୍କେ ଆରି ମୁକିଅ ମୁକିଅ ସେନାପତି ଆରି ଗାଲିଲିର ବଡ଼ବଡ଼ ଲକ୍ମନକେ ତାକି, ରାତିଆ ଗଟେକ୍ ବଜିକଲା । ୨୨ ତେଇ ଏରଦିଆର ଟକି ବିଡ଼ରେ ପୁରି ଏରଦ୍ ଆରି ତାର ସଙ୍ଗ୍ ବସି କାଇବା ଲକ୍ମନକେ ନାଟକରି ମନ୍ତାଇ ଦେଲା । ରାଜା ଟକିକେ କଇଲା, “ତୁଇ ଜାଇଟା ମନ୍ କଲୁସନି ସେଟା ମାଙ୍ଗ୍, ମୁଇ ତକେ ଦେବି ।” ୨୩ ଆରି ଏରଦ୍ ତାର ଲଗେ ପରମାନ୍ କଲା, “ତୁଇ ଆମ୍ବକେ ଜାଇଟା ମାଙ୍ଗ୍ଲେ ମିସା, ମୁଇ ରାଇଜର ଅଦ୍ ବାଗ୍ ଜାକ ତକେ ଦେଇ ଦେବି ।”

୨୪ ତେଇଅନି ସେ ବାରଇଜାଇ ତାର ମାଆକେ ପାଚାରଲା, “ମୁଇ କାଇଟା ମାଙ୍ଗ୍ବି?” ତାର ମାଆ କଇଲା, “ତୁବନ୍ ଦେଉ ଜଅନର ମୁଣ୍ଟ୍ ମାଙ୍ଗ୍ ।”

୨୫ ସେଦାପୁରେ ଟକି ରାଜାର ଲଗେ ଆସି ଏଟା କଇ ମାଙ୍ଗ୍ଲା, “ତୁଇ ମକେ ଏବେ ତୁବନ୍ ଦେଉ ଜଅନର ମୁଣ୍ଟ୍ ଗଟେକ୍ ତାଲାଇ କାଟି ଦେ ।” ୨୬ ସେକାତା ସୁନି ରାଜା ବେସି ଦୁକ୍ କଲା ମାତର ନିଜେ କାତା ଦେଇରଇଲାଟା ଆରି କାଇବାକେ ବସି ରଇବା ଲକ୍ମନରମୁଆଟେ ମାଙ୍ଗ୍ଲାଟା ନାଇ ବଲି କଇବାକେ ମନ୍ କରେନାଇ । ୨୭ ତେବେ ରାଜା ସେଦାପୁରେ ଗଟେକ୍ ସଇନକେ ପାଟାଇ ତାର ମୁଣ୍ଟ୍ ଆନ୍ବାକେ ଆଦେସ୍ ଦେଲା, ତେଇ ସଇନ ବନ୍ଦି ଗରେ ଜାଇ, ତୁବନ୍ ଦେଉ ଜଅନର ମୁଣ୍ଟ୍ କାଟ୍ଲା । ୨୮ ଆରି ସେ ମୁଣ୍ଟ୍ ଗଟେକ୍ ତାଲାଇ ଆନି ଟକିକେ ଦେଲା, ଆରି ଟକି ତୁବନ୍ ଦେଉ ଜଅନର ମୁଣ୍ଟ୍ ନେଇ

ତାର ମାକେ ଦେଲା । ୨୯ ଜଅନର୍ ସିସ୍‌ମନ୍ ତେଇର୍ କବର୍ ସୁନି ଆଇଲାଇ, ଆରି ମଲା ମଡ଼କେ ନେଇ ମସନେ ତପ୍‌ଲାଇ ।

ଜିସୁ ବେସି ଲକ୍‌ମନ୍‌କେ କୁଆଇଲା

(ମାତିଉ ୧୪:୧୩-୨୧; ଲୁକ୍ ୯:୧୦-୧୭; ଜଅନ୍ ୨:୧-୧୪)

୩୦ ପତେ *ପେରିତ୍‌ମନ୍ ଜିସୁର୍ ଲଗେ ରୁଣ୍ଡିଲାଇ, ଆରି ସେମନ୍ ଜନ୍ ଜନ୍‌ଟା କରି ରଇଲାଇ, ଆରି ଜାଇ ଜାଇଟା ସିକାଇ ଦେଇରଇଲାଇ, ସେସବୁ ତାକେ ଜାନାଇଲାଇ । ୩୧ ସେଡ଼କି ବେଲେ ଜିସୁ ସେମନ୍‌କେ କଇଲା, “ତମେମନ୍ ମର୍‌ସଙ୍ଗ୍ ଆସା ଆମେ ଗଟେକ୍ କିନରା ଜାଗାଇ ଜାଇ ଚନେକ୍ ବିସରାମ୍ କରୁ ।” କାଇକେବଇଲେ କେତେକ୍ କେତେକ୍ ଲକ୍ ଆସ୍ ଜା ଅଇତେରଇଲାଇଜେ ସେମନ୍‌କେ କାଇବାକେ ମିସା ସୁଜଗ୍ ନ ମିଲ୍‌ତେ ରଇଲା । ୩୨ ତେବେ ଜିସୁ ଆରି ତାର ସିସ୍‌ମନ୍ ବାରଇ ବେଗ୍‌ଲି ଜାଇ ଡଙ୍ଗାଇ ବସି ଗଟେକ୍ କିନରା ଜାଗାଇ ଗାଲାଇ ।

୩୩ ମାତର୍ ସେମନ୍ ବାରଇ ଜିବାଟା ବେସିଲକ୍ ଦେକି ଚିନ୍‌ଲାଇ, ଆରି ସବୁ ନଅରେ ଅନି ଲକ୍‌ମନ୍ ପାଲାଇ ପାଲାଇ ଜାଇ ସେମନ୍‌ର ଆଗ୍‌ତୁ କେଟ୍‌ଲାଇ । ୩୪ ☆ଜିସୁ ଡଙ୍ଗାଇଅନି ବାରଇ, ବେସି ଲକ୍‌ମନ୍‌କେ ଦେକି ତାର ଜିବନ୍ ଦୁକାଇ ଦୟାକଲା । କାଇକେବଇଲେ ସେମନ୍ ଗଡ଼ଡ଼ ନ ରଇଲା ମେଣ୍ଡୁରାସି ପାରା ରଇଲାଇ ଆରି ସେ ସେମନ୍‌କେ କେତେକ୍ ବିସଇ ସିକିଆ ଦେବାରଦାରଲା । ୩୫ ଏଡ଼କି ବିଡ଼ରେ ବେଲ୍ ବସି ଆଇବାକେ ସିସ୍‌ମନ୍ ଆସି ଜିସୁକେ କଇଲାଇ, “ଏ ଜାଗା ତା ଚିମ୍‌ରା ଜାଗା ଆରି ବେଲ୍ ମିସା ବସିଆଇଲାନି, ୩୬ ତେବର୍‌ପାଇ ଲକ୍‌ମନ୍‌କେ ପାଟାଇ ଦିଆସ୍ । ଜେନ୍ତି କି ସେମନ୍ ଚାରିବେଡ଼ତିର୍ ଗାଉଁ ମନ୍‌କେ ଜାଇ ନିଜର୍ ନିଜର୍ ପାଇ କାଇବାକେ କାଇଟା ମିସା ଗେନଡ଼ ।”

୩୭ ମାତର୍ ଜିସୁ ସେମନ୍‌କେ କଇଲା, “ତମେ ସେମନ୍‌କେ କାଇଟା ମିସା କାଇବାକେ ଦିଆସ୍ ।” ସେମନ୍ ତାକେ କଇଲାଇ, “ଆମେ ଜାଇ ଆର୍ ମାସର୍ କୁଲି ତାରୁ ନେଇ ଏମନ୍‌କେ ରୁଟି ଗେନିଆନି କୁଆଇବୁ କି ?”

* ୨:୩୦ ୨:୩୦ ମାପୁରୁର୍ କାତା କଇବାକେ ପାଟାଇଲା ଲକ୍‌ମନ୍ ☆ ୨:୩୪ ୨:୩୪ ମାତିଉ ୯:୩୭

୩୮ ଜିସୁ ସେମାନଙ୍କେ କଇଲା, “ତମର ଲଗେ କେତେଟା ରୁଟି ଆତେ ? ଜାଇ ଦେକା ।” ସେମନ୍ ଦେକିଆସି ତାକେ କଇଲାକ, “ପାଁଟା ରୁଟି ଆରି ଦୁଇଟା ମାଟ୍ ।”

୩୯ ତେଇ ସବୁଲକ୍ ଜେନ୍ତି ଦଲ୍ଲଦଲ୍ ଅଇ କଅଁଲି ଗାଁସ୍ ଉପ୍ରେ ବସ୍ବାଇ, ଏଟାରପାଇ ଜିସୁ ତାର୍ ସିସମନ୍‌କେ ଡିଆରଲା । ୪୦ ସେମନ୍ ସଏ ସଏ ଆରି ପଚାସ୍ ପଚାସ୍ ଲକ୍ ଦାଡି ଦାଡି ଅଇ ବସ୍ଲାଇ । ୪୧ ପଚେ ଜିସୁ ପାଁଟା ରୁଟି ଆରି ଦୁଇଟା ମାଟ୍ ଦାରି ସରଗ୍ ବାଟେ ଦେକି ପରମେସର୍‌କେ ଦନିଅବାଦ୍ ଦେଲା, ଆରି “ରୁଟି ବାଙ୍ଗାଇ ଲକ୍‌ମନ୍‌କେ ଦିଆସ୍ ।” ବଲି ସିସମନ୍‌କେ ଦେଲା । ଆରି, ସେ ଦୁଇଟା ମାଟ୍ ସବୁକେ ବାଟାକରି ଦେଲା । ୪୨ ତେଇ ସବୁଲକ୍ କାଇକରି ପେଟ୍ ପୁରାଇଲାକ, ୪୩ ଆରି ସେମନ୍ ବାଙ୍ଗାଲା ରୁଟି ଆରି ମାଟ୍ ରୁଣ୍ଡାଇ ବାରଟା ଡାଲାଇ ପୁରୁନ୍ କଲାକ । ୪୪ ତେଇ କାଇଲା ଲକ୍‌ମନ୍‌ର ବିଡ଼ରେ ଅବକା ମନସ୍ ପିଲାମନ୍ ପାଁଟ୍ ଅଜାର୍ ରଇଲାକ ।

ଜିସୁ ପାନିତେଇ ଇଣ୍ଡୁଲା

(ମାତିଉ ୧୪:୨୨-୩୩; ଜଅନ୍ ୬:୧୫-୨୧)

୪୫ ସେଦାପ୍ରେ ଜିସୁ ନିଜର୍ ସିସମନ୍‌କେ ଡଙ୍ଗାଇ ବସି ଗାଡ୍ ସେପାଟର୍ ବେଡ଼ସାଇଦାଇ ତାର୍ ଆଗଡୁ ଜିବାକେ କଇଲା, ଆରି ତେଇ ରଇଲା ଲକ୍‌ମନ୍‌କେ ନିଜର୍ ନିଜର୍ ଗର୍ମନ୍‌କେ ପାଟାଇ ଦେଲା । ୪୬ ଜିସୁ ଲକ୍‌ମନ୍‌କେ ପାଟାଇଲା ପଚେ, ପାରତନା କର୍ବାକେ କୁପ୍‌ଲିଉପ୍ରେ ଗାଲା । ୪୭ ରାତି ଅଇଲାକେ ଡଙ୍ଗା ସମ୍‌ଦୁର୍ ମଜାଇ ରଇଲା, ଆରି ସମ୍‌ଦୁର୍ ପାଲି ଜିସୁ ଗଟେକ୍ ଲକ୍‌ସେ ରଇଲା । ୪୮ ମୁଆଟ୍ ବାଟେ ଅନି ପବନ୍ ଆଇତେ ରଇଲାଜେ ତାର୍ ସିସମନ୍ ଡଙ୍ଗା ଗାଟ୍‌ବାକେ କସ୍ଟ ଅଇବାଟା ଜିସୁ ଦେକ୍‌ଲା । କୁକ୍‌ଡା ତାକେ ଜିସୁ ସମ୍‌ଦୁର୍ ଉପ୍ରେ ଇଣ୍ଡି ଇଣ୍ଡି ସେମନ୍‌ର ଲଗେ ଗାଲା, ଆରି ସେମନ୍‌କେ ବାଟ୍ ଦେଇ ଜିବାଟା ସିସମନ୍ ଦେକ୍‌ଲାକ । ୪୯ ମାତର୍ ସେମନ୍ ଜିସୁ ପାନିତେଇ ଇଣ୍ଡୁବାଟା ଦେକି ହୁମା ବଲି ବାବି କିରକିରଲାକ । ୫୦ କାଇକେବଇଲେ ସବୁଲକ୍ ତାକେ ଦେକି କିଲ୍‌ବିଲ୍ ଅଇଜାଇତେ ରଇଲାକ । ସେଦାପ୍ରେ ଜିସୁ ସେମନ୍‌ର ସଙ୍ଗ୍ କାତା ବାରତା ଅଇ ସେମନ୍‌କେ କଇଲା, “ତରାନାଇ ସାଆସ୍ ଦାରା, ଏଟାତା ମୁଇ ।”

୫୧ ଆରି, ସେ ସେମାନର ଲଗେ ଜାଇ ଡଙ୍ଗାଇ ଚଗଲା, ଆରି ପବନ୍ ବନ୍ଦୁ ଅଇଲା । ତେଇ ସେମନ୍ ମନେ ମନେ କାବା ଅଇଗାଲାଇ, ୫୨ କାଇକେବଇଲେ ପାଁଟା ରୁଟିର ଗଟନାଇଅନି ଜିସୁ କେ ବଲି ବୁଜି ନ ରଇଲାଇଜେ ସେମାନର୍ ବୁଦି ଗୁପିଜାଇରଇଲା ।

ଜିସୁ ଗିନେସରତେଇ ବେସି ଲକ୍ମନ୍‌କେ ନିକ କଲା
(ମାତିଉ ୧୪:୩୪-୩୬)

୫୩ ଜିସୁ ଆରି ତାର ସିସ୍‌ମନ୍ ଗାଡ଼ ଲକ୍ମି ଗିନେସରତ୍ ବାଟେ ଜାଇକରି କେଟଲାଇ ଆରି ଗାଡ଼ପାଲି ଡଙ୍ଗା ବାନ୍ଦଲାଇ । ୫୪ ଆରି, ଡଙ୍ଗାଇ ଅନି ଉତରଲା ଦାପ୍‌ରେ, ଲକ୍ମନ୍ ଜିସୁକେ ଚିନ୍‌ଲାଇ । ୫୫ ଆରି ସେମନ୍ ଜିସୁ ଆଇଲା କବର ସୁନାଇବାକେ ସବୁ ଗାଏଁ ପାଲାଇଲାଇ । ସେ ଜନ୍ ଜନ୍ ଜାଗାଇ ଆଟେ ବଲି ସୁନ୍‌ଲାଇ, ସେ ଜାଗାଇ ଜରର୍ ଲକ୍ମନ୍‌କେ କଟ୍ ମିସ୍‌ତେ ବଇ ଆନ୍‌ବାର୍ ଦାରଲାଇ । ୫୬ ଆରି ସେ ଜେତେକ୍ ଜେତେକ୍ ଗାଉଁ, ସଅର୍ ଆରି ପୁଟ୍ ମନ୍‌କେ କେଟଲା, ଲକ୍ମନ୍ ସେ ସବୁ ଜାଗାଇ ଆଟ୍ ବଜାର୍‌ମନ୍‌କେ ରଗିମନ୍‌କେ ସଙ୍ଗଇଦେଇ, ସେମନ୍ ତାର ଲୁଗା ଅଁଟାଗନେ ଚିଇବୁ ବଲି ଜୁଆରବିଆର୍ କଲାଇ । ଜେତେକ୍ ଲକ୍ ତାକେ ଚିଇଲାଇ, ସବୁଲକ୍ ନିକ ଅଇଲାଇ ।



ସୁଚି ଆରି ଅସୁଚି ବିସଇରେ ସିକିଆ
(ମାତିଉ ୧୫:୧-୯)

୧ ପଟେ ପାରୁସିମନ୍ ଆରି ଜିରୁସାଲାମ୍ ଅନି ଆସିରଇବା କେତେଟା ସାସ୍‌ତର୍ ସିକାଉ ପଣ୍ଡିତମନ୍ ଜିସୁର୍ ଲଗେ ରୁଣ୍ଡୁଲାଇ । ୨ ତାର୍ ସିସ୍‌ମନ୍‌ର ବିତରେ ଅନି କେତେକ୍ ସିସ୍‌ମନ୍ ଜିଉଦିମନ୍‌ର ରିତିନିତି ଇସାବେ ଆଡ଼ ନ ଦଇତେ କାଇବାଟା ଦେକ୍‌ଲାଇ ।

୩ ପାରୁସିମନ୍ ଆରି ସବୁ ଜିଉଦିଲକର୍ ପାର୍‌ଚିନ୍‌ମନ୍‌ର ନିୟମ୍ ମାନି ରିତିନିତି ଇସାବେ ଆଡ଼ ନ ଦଇତେ ନ କାଇତେରଇଲାଇ । ୪ ଆରି ଆଟ୍‌ବାଟ୍ କରିଆସି ରିତିନିତି ଇସାବେ ପାନି ନ ଚିତି ଅଇତେ ନ କାଇତେ ରଇଲାଇ । ଗିନା, ମୁତା, ପିତଲ୍ ତାଲା ଆରି ସଇବା କଟ୍ କେନ୍ଦ୍ରି ଦଇବାର୍, ସେଟା ସଙ୍ଗ୍ ଅଲ୍‌ଗା ରିତିନିତି ମିସା ମାନ୍‌ତେରଇଲାଇ ।

୫ ତେବେ ପାରୁସି ଆରି ସାସ୍ତର ସିକାଉମନ୍ ଜିସୁକେ ପାଟାରଲାଇ, “କାଇକେ ତର୍ ସିସ୍ମନ୍ ପାର୍ଟିନ୍ମନର୍ ରିତିନିତି ନ ମାନି ଆଡ଼ ନ ଦଇ କାଇଲାଇନି ?”

୬ ଜିସୁ ସେମନ୍କେ କଇଲା, “ଏରେ କୁଟିଆଲ୍ମନ୍, ତମର୍ ବିସଇନେଇ ଜିସାୟ୍ସ ବବିସ୍ତବକ୍ତା ନିକସଙ୍ଗ୍ ଜାନାଇଆଟେ, ସେ ଏନ୍ତି କଇଲା ଆଟେ ।”

ପର୍ମେସର୍ କଇଲାନ୍ତି “ଏ ଜାତି, ମକେ ମୁଏ ସନ୍ମାନ୍ ଦେବାଇ, ମାତର୍ ତାକର୍ ମନ୍ ମରଟାନେଅନି ଦୁରିକେ ରଇସି ।

୭ ସେମନ୍ ଲକ୍ମନ୍ କଲା ନିୟମ୍ ମାପୁରୁର୍ ନିୟମ୍ ବଲି ସିକାଇବାଇ ମାତର୍ ସେ ଉପାସନାର୍ କିଟି ମୁଲିଅ ନାଇ ।

୮ “ତମେ ପର୍ମେସର୍ ଆଦେସ୍ ଇନ୍କରି ନର୍ଲକର୍ ରିତିନିତି ଦାରି ବସିଆଟାସ୍ ।” ୯ ଆରି ଜିସୁ ସେମନ୍କେ କଇଲା, ତମେ ତତୁର୍ ଅଇ ନିଜର୍ ରିତିନିତି ମାନ୍ବାକେ ବଲି ପର୍ମେସର୍ ଆଦେସ୍ ନିତୁ ବଇଲାସିନି । ୧୦ କାଇକେବଇଲେ ମସା ସିକିଆ ଦେଇଆଟେ, ମା ବାବାକେ ମାନା, ଆରି ଜେ କି ତାର୍ ବାବାକେ କି ମାକେ ସାଇପ୍ ଦେଇସି, ସେ ମରନ୍ ତଣ୍ ପାଇସି ଆକା । ୧୧ ମାତର୍ ତମେ ସିକାଇଲାସିନି କି ଜେବେ ବାବାକେ କି ମାକେ କଇସା, “ଜନ୍ଟା ମୁଇ ତମ୍କେ ଦେବାର୍ ରଇଲା ସେଟା କର୍ବାନ୍ ।” କର୍ବାନ୍ ବଇଲେ ମାପୁରୁକେ ଆକା ମାନଡ଼ କର୍ବାଟା । ୧୨ ତେବେ ତମେ ତାର୍ ବାବାର୍ କି ମାଆର୍ କାଇ ଉପକାର୍ କର୍ବାଟାକେ ତେବାଇଲାସିନି । ୧୩ ଏନ୍ତାରି ତମେ ନିଜର୍ ଆନିଦାଦିମନ୍ ବେଲେ ଅନି ଆଇବା ରିତିନିତି ମାନିକରି ପର୍ମେସର୍ ବାକିଅ ଏଡାଇ ଦେଲାସିନି, ଆରି ଏନ୍ତାରି କେତେକ୍ କେତେକ୍ କାମ୍ମନ୍ କଲାସିନି ।

ଗଟେକ୍ ଲକ୍ମକେ କାଇଟା ଅସୁକଲ୍ କର୍ସି

(ମାଡିଉ ୧୫:୧୦-୨୦)

୧୪ ଜିସୁ ଆରି ତରେକ୍ ଲକ୍ମନ୍କେ ଲଗେତାକି କଇଲା, “ତମେ ସବୁଲକ୍ ମର୍ କାତା ସୁନା ଆରି ବୁଜା । ୧୫ ଲକ୍ମର୍ ଟଣ୍ଟେଅନି ଏନ୍ତାରି କାଇ ବିସଇ ନାଇ, ଜନ୍ଟା ତାର୍ ବିଡରେ ପୁରି ତାକେ ଅସୁକଲ୍ କରି ପାରେ, ମାତର୍ ଜନ୍ ଜନ୍ଟା ମୁନ୍ସମନର୍ଟାନେଅନି ବାରଇସି ସେ

ସବୁ ତାକେ ଅସୁକଲ୍ କରସି । ^{୧୭}* ଜଦି ଜାକେ ସୁନ୍‌ବାର୍ କାନ୍ ଆଚେ, ସେ ସୁନ୍ ।”

^{୧୭} ଆରି ଜିସୁ ଲକର୍ ମାନ୍ଦା ଚାଡ଼ି ଗରେ ପୁରୁଲାପଚେ ତାର୍ ସିସ୍‌ମନ୍ ସେ ଉଦାଅରନର୍ ଅରଡ଼ କାଇଟା ବଲି ପାଗାର୍‌ବାର୍ ଦାରୁଲାଇ । ^{୧୮} ଜିସୁ ସେମନ୍‌କେ କଇଲା, “ତମେ ମିସା କାଇ ବୁଜାସ୍ ନାଇ ? ଜନ୍ ଜିନିସ୍ ମିସା ବାଇରେ ଅନି ମୁନୁସ୍‌ମନର୍ ବିଡ଼ରେ ପୁରସି, ସେଟା ତାକେ ଆସାର୍ ନ କରେ । ^{୧୯} କାଇକେବଇଲେ ସେଟା ତାର୍ ମନ୍ ବିଡ଼ରେ ପୁରେନାଇ, ମାତର୍ ପେଟ୍ ବିଡ଼ରେ ପୁରି କରି ବାଇରେ ବାରଇ ଆଇସି ।” ଏନ୍ତାରି କଇଲାକେ ସବୁ କାଦି ସୁକଲ୍ ଆକା ବଲି ଜିସୁ ଜାନାଇଲା ।

^{୨୦} ଆରି ସେ କଇଲା, “ମୁନୁସ୍‌ମନ୍ ବିଡ଼ରେ ଅନି ଜନ୍‌ଟା ବାରଇସି, ସେଟାସେ ତାକେ ଆସାର୍ କରସି । ^{୨୧} କାଇକେବଇଲେ ମୁନୁସ୍‌ମନ୍ ବିଡ଼ରେ ଅନି କରାପ୍ ଚିନ୍ତା ବାରଇସି । ସେଟାମନ୍ ଅଇଲାନି, ପାଦ୍‌ରା ପାଦ୍‌ରି କାମ୍, ଚର୍କାମ୍, ଲକ୍‌ମନ୍‌କେ ମରାଇବା କାମ୍ । ^{୨୨} ବିବା ଅଇ କରବା ବେସିଆ କାମ୍, ବିବା ନଇତେ କରବା ବେସିଆ କାମ୍, ଲବାଇବାଟା, ମିର୍ କଇବାଟା, ଅଲ୍‌ସୁଆ ଅଇବାଟା, ଆଁକାର୍ ଅଇବାଟା, ନିନ୍ଦା କାତା କଇବାଟା, ବଡ଼ପନ୍ ଅଇବାଟା, ବକୁଆ ଅଇବାଟା । ^{୨୩} ଏ ସବୁ କରାପ୍ ବିସଇମନ୍ ବିଡ଼ରେଅନି ବାରଇ ଲକ୍‌କେ ନସାଇଦେଇସି ।”

ଗଟେକ୍ ମାଇଜିର୍ ତାଟ୍ ବିସ୍‌ବାସ୍

(ମାତିଉ ୧୫:୨୧-୨୮)

^{୨୪} ତାର୍‌ପଚେ ଜିସୁ ସେ ଜାଗା ଚାଡ଼ିକରି ସର ଆରି ସିଦନର୍ ସଅରେ ଗାଲା । ତେଇ ଗଟେକ୍ ଗରେ ପୁରୁଲା । ଜେନ୍ତି କେ ମିସା ସେଟା ନାଜାନଡ଼, ଏଟା ସେ ମନ୍ କର୍ତ୍ତେ ରଇଲା, ମାତର୍ ସେ ନ ଜାନାଇ ଅଇତେ ରଇନାପାରୁଲା । ^{୨୫} ଜିସୁ ଆଇଲାଆଚେ ବଲି ସୁନ୍‌ଲା ଦାପ୍‌ରେ, ଗଟେକ୍ ମାଇଜି ଜାର୍ ସାନ୍ ଟକିକେ ତୁମା ଦାରିରଇଲା, ତାର୍ ଗଡ଼ତଲେ ଆସି ଅଦରୁଲା । ^{୨୬} ସେ ସୁର ଦେସର୍ ପଇନିକିଆ ଜାଗାଇ ଜନମ୍ ଅଇ ଜିଉଦି ଜାତିର୍ ନ ରଇଲା, ତାର୍ ଟକିକେ ତୁମା ଚାଡ଼ାଇବାକେ ସେ ଜିସୁକେ ବାବୁଜିଆ କଲା ।

* ୭:୧୭ ୭:୧୭ କେତକ୍ ପୁରୁନା ଲେକାଇ ଏ ପଦ୍ ଲେକାଅଏ ନାଇ

୨୭ ତେବେ ଜିସୁ ତାକେ କଇଲା, “ଆଗ୍ତୁ ପିଲାମନ୍‌କେ ପେଟ୍ ପୁରୁନ୍ କାଇବାକେ ଦେସ୍, କାଇକେବଇଲେ ପିଲାମନ୍‌ର କାଦି ନେଇ କୁକୁର୍‌ମନ୍‌ର ଟାନେ ପାକାଇବାଟା ଟିକ୍‌ନାଇ ।”

୨୮ ମାତର୍ ମାଇଜି ତାକେ କଇଲା, “ଉଁ ମାପ୍‌ରୁ, କୁକୁର୍‌ମନ୍ ମିସା ପିଲାମନ୍‌ର ଅଦ୍‌ରି ରଇଲା ସକ୍ତି କାଇବାଇ ।”

୨୯ ସେଡ୍‌କି ବେଲେ ଜିସୁ ତାକେ କଇଲା, “ଏନ୍ତାରି କଇଲାପାଇ ଜା, ତର୍ ଟକିଡେଇଅନି ତୁମା ବାରଇଗାଲାବେ ।”

୩୦ ଆରି ସେ ମାଇଜି ଗରେ ଜାଇ, ଟକି କଟେ ସଇରଇବାଟା ଆରି ତାର୍‌ଟାନେଅନି ତୁମା ବାରଇଜାଇ ରଇବାଟା ଦେକ୍‌ଲା ।

ଜିସୁ ଗଟେକ୍ ଗୁଲା ବଇରାକେ ନିକ କଲା

୩୧ ଜିସୁ ଆରିତରେକ୍ ସର ସନ୍ଦିଅନି ଜାଇ ସିଦନ୍ ଦେଇ ଦେକାପଲି ଦସ୍‌ଟା ସଅରେ ଉଡ୍‌ରି ଗାଲିଲି ସମ୍‌ତୁରେ ଗାଲା । ୩୨ ଆରି ତେଇ କେଡେକ୍ ଲକ୍‌ମନ୍ ଗଟେକ୍ କସ୍‌ଟସ୍‌କ୍ କାତା ଅଇବା ବଇରାକେ ଜିସୁର୍ ଲଗେ ଆନି ତାର୍ ଉପ୍‌ରେ ଆଡ୍ ସଙ୍ଗାଇବାକେ ବାବୁଜିଆ କଲାଇ । ୩୩ ଜିସୁ ସେ ବଇରାକେ ଲକ୍‌ମନ୍‌ର ଟାନେଅନି ବେଗ୍‌ଲାଇ କରି, ଡାକିନେଇ ତାର୍ ଦୁଇଟା କାନେ ଆଙ୍ଗଟି ପୁରାଇଲା ଆରି ତୁକିକରି ଆଡ୍‌ସଙ୍ଗ୍ ସେ ଲକ୍‌ର୍ ଜିବେ ଲାଗାଇଲା, ୩୪ ଆରି ସରଗ୍ ବାଟେ ଦେକିକରି ତେଙ୍ଗ୍ ପୁଣ୍ଡା ଦାରି ବଇରାକେ କଇଲା, “ଇପ୍‌ପତା !” ବଇଲେ ପୁଟିଅ ।

୩୫ ସେ ଦାପ୍‌ରେ ତାର୍ କାନ୍ ଉଗାଡି ଅଇଲା, ଆରି ଜିବର୍ ବନ୍ଦନ୍ ପିଟିଗାଲା, ଆରି ସେ ନିମାନ୍ ସଙ୍ଗ୍ କାତା ଅଇବାର୍ ଦାର୍‌ଲା ।

୩୬ ଜିସୁ ଲକ୍‌ମନ୍‌କେ ଏ ବିସଇ କାକେ ନ କଇବାକେ ଆଦେସ୍ ଦେଲା, ମାତର୍ ସେ ଲକ୍‌ମନ୍‌କେ ଜେଡେକ୍ ନିରୁବଇଲେ ମିସା ସେମନ୍ ଆରି ଅଦିକ୍ ଅଦିକ୍ ସେଟା ଜାନାଇଲାଇ । ୩୭ ଆରି ଲକ୍‌ମନ୍ ଅଦିକ୍ କାବା ଅଇ କଇଲାଇ, “ସେ ସବୁ କାମ୍ ନିମାନ୍ ସଙ୍ଗ୍ କରିଆରେ, ସେ ବଇରାମନ୍‌କେ ସୁନ୍‌ବା ବପୁ ଆରି ଗୁଲାମନ୍‌କେ କଇବା ବପୁ ମିସା ଦେଇଆଟେ ।”



ଜିସୁ ଚାରିଅଜାର ଲକ୍ଷ୍ମୀକୁ କୁଆଇଲା
(ମାତିଉ ୧୫:୩୨-୩୯)

^୧ ସେବେଲେ ଆରି ତରେକ୍ ବେସି ଲକ୍ଷ୍ମୀନ୍ ମିସ୍ଲାଇ, ଆରି ସେମନର୍ ଲଗେ କାଇବା ପିଇବାକେ କାଇଟା ନ ରଇଲାଜେ ଜିସୁ ସିସ୍ମାନ୍‌କେ ଲଗେଡାକି କଇଲା, ^୨ “ଏ ଲକ୍ଷ୍ମୀନ୍‌କେ ଦେକି ମକେ ଦୁକ୍ ଲାଗ୍‌ଲାନ୍ତି, କାଇକେବଇଲେ ଏମନ୍ ତିନ୍‌ଦିନ୍ ଅଇଲାନ୍ତି ମର୍ ସଙ୍ଗ୍ ଆଚଡ୍ ଆରି ଏମନର୍ ଲଗେ କାଇବାକେ କାଇଟା ମିସା ନାଇ । ^୩ ତେବେ ମୁଇ ସେମନକେ ନ କୁଆଇତେ ଗରେ ପାଟାଇଲେ, ବାଟେ ସେମନର୍ ଚେତା ଆଜିଜାଇସି, ସେମନର୍ ବିତ୍‌ରେ କେତେକ୍ ଲକ୍ ଦୁରେଅନ୍ତି ଆସି ଆଚଡ୍ ।”

^୪ ସିସ୍ମାନ୍ ତାକେ କଇଲା, “ଇତି ଏ ଚିମ୍‌ରା ଜାଗାଇ ଲକ୍ ନ ରଇବାଟାନେ କନ୍ତିଅନ୍ତି ରୁଟି ଆନ୍ତି ଏମନକେ ପେଟ୍ ପୁରାଇବାର୍ ?” ^୫ ଜିସୁ ସେମନକେ ପାଟାଇଲା, “ତମରଲଗେ କେତେଟା ରୁଟିଆଟେ ?” ସେମନ୍ କଇଲା, “ସାଡ୍‌ଟା ।”

^୬ ତେଇ ଜିସୁ ସେ ସବୁ ଲକ୍ଷ୍ମୀନ୍‌କେ ବୁର୍‌ସି ବସ୍‌ବାକେ କଇଲା, ଆରି ସେ ସାଡ୍‌ଟା ରୁଟି ଦାରିକରି ପର୍‌ମେସର୍‌କେ ଦନ୍ତିଅବାଦ୍ ଦେଇ ସେଟା ସବୁ ବାଙ୍ଗାକରି ବାଟାକରିଦେବାକେ ତାର୍ ସିସ୍ମାନ୍‌କେ ଦେଲା । ଆରି ସେମନ୍ ଲକ୍ଷ୍ମୀନ୍‌କେ ସେଟା ବାଟାକଲା । ^୭ ସେମନର୍ ଲଗେ ଜଡେକ୍ ପାରା କେତେଟା ସାନ୍ ମାଟ୍ ରଇଲା, ସେଟା ମିସା ସେ ପର୍‌ମେସର୍‌କେ ଦନ୍ତିଅବାଦ୍ ଦେଇ ବାଟାକର୍‌ବାକେ କଇଲା । ^୮ ତେଇ ସେମନ୍ ସବୁ ଲକ୍ ପେଟ୍‌ପୁରତେ କାଇଲା ଆରି ଅଗଲ୍‌ଲାଟା ସାଡ୍‌ତାଲା ବେଟ୍‌ଲା । ^୯ ତେଇ ଚାରିଅଜାର ଲକ୍ଷ୍ମୀନ୍ ରଇଲା । ^{୧୦} ତାର୍‌ପଟେ ଜିସୁ ଲକ୍ଷ୍ମୀନ୍‌କେ ପାଟାଇ ଦେଲା ଆରି ନିଜର୍ ସିସ୍ମାନ୍‌ର୍ ସଙ୍ଗ୍ ଡଙ୍ଗା ଚାରି ଦଲ୍‌ମନୁତା ନାଉର୍ ଗଟେକ୍ ଜାଗାଇ ଆଇଲା ।

ପାରୁସିମନ୍ ଜିସୁକେ ପରିକା କଲା
(ମାତିଉ ୧୭:୧-୪)

୧୧ ✨ପରେ ପାରୁସିମନ୍ ବାରଇ ଆସି ଜିସୁର ସଙ୍ଗ ଦଦାପେଲା ଅଇବାର ଦାରଲାଇ । ତାକେ ପରିକା କରବାକେ ପାନ୍ଦେ ପାକାଉଁ ବଲି ମନ୍‌କରି, ସେ ଜେ ପରମେସ୍‌ରଟାନେଅନି ଆସିଆରେ, ଏଟା ଦେକାଇବାକେ ଆକାସେଅନି ଗଟେକ୍ କାବାଅଇଜିବା ଚିନ୍ ଦେକାଆ ବଲି କଇଲାଇ । ୧୨ ✨ଜିସୁ ଗଟେକ୍ ଡେଙ୍ଗ୍‌ପୁଣ୍ଡା ପୁଣ୍ଡିକରି କଇଲା, “ଏବର ଲକ୍‌ମନ୍ କାଇକେ କାବା ଅଇବା ଚିନ୍ ମାଙ୍ଗ୍‌ଲାଇନି ? ମୁଇ ତମ୍‌କେ ସତ୍ କଇଲିନି, ଆଜିକାଲିର୍ ଏ ଲକ୍‌ମନ୍‌କେ କାବା ଅଇବା କାଇ ଚିନ୍ ମିସା ଦେକାଇ ନଏଁ ।”

୧୩ ତାର୍‌ପରେ ଜିସୁ ଆରି ତାର୍ ସିସ୍‌ମନ୍ ସେମନ୍‌କେ ତେଇ ଚାଡ଼ି ଡଙ୍ଗାଇ ଚଗି ଆରି ତରେକ୍ ଗାଡ଼ ସେପାଟେ ଗାଲା ।

ପାରୁସିମନ୍‌ର ସିକିଆ ବିରୁଦ୍ଧେ ଜିସୁର ଚେତ୍‌ନା
(ମାତିଉ ୧୨:୫-୧୨)

୧୪ ଜିସୁର ସିସ୍‌ମନ୍ ଡଙ୍ଗାଇ ଗାଲାବେଲେ କାଇବାକେ ରୁଟି ନେବାକେ ପାସ୍‌ରିଜାଇରଇଲାଇ । ସେମନ୍‌ରଟାନେ ଏକାଇ ଗଟେକ୍ ସେ ରୁଟି ରଇଲା । ୧୫ ✨ଜିସୁ ସେମନ୍‌କେ ଜାଗରତ୍ କରାଇ କଇଲା, “ପାରୁସିମନ୍‌ର ଆରି ଏରଦର୍*କମିର୍ ଅନି ତରିକ୍‌ନା ଅଇ ରୁଆ ।”

୧୬ ଏଟା ସୁନି ସିସ୍‌ମନ୍ ନିଜର୍ ନିଜର୍ ବିତ୍‌ରେ କାତାବାର୍‌ତା ଅଇକରି କଇଲାଇ, “ଆମର୍‌ଲଗେ କାଇବାକେ ରୁଟିନାଇ ବଲି ସେ ଏନ୍ତାରି କଇଲାଇନି ।” ୧୭ ସେମନ୍ କାଇ ବିସଇନେଇ କାତାବାର୍‌ତା ଅଇଲାଇନି ବଲି ଜିସୁ ଜାନିକରି ସେମନ୍‌କେ କଇଲା, “ତମ୍‌ର ଲଗେ ଜେଡ୍‌କି ଦରକାର୍ ଆରେ, ସେଡ୍‌କି ରୁଟିନାଇ ବଲିକରି ତମେ କାଇକେ କାତାବାର୍‌ତା ଅଇଲାସିନି ? ଏବେଜାକ ତମେ କାଇ ଦେକାସ୍ ନାଇ କି ବୁଜାସ୍‌ନାଇ ? ତମ୍‌ର ମନ୍ କାଇ ଆଁର୍ ଅଇଗାଲା ଆରେ କି ? ୧୮ ✨ଆଁକି ରଉ ରଉ ଦେକାସ୍ ନାଇ ? ଆରି, କାନ୍ ରଉ ରଉ ସୁନାସ୍ ନାଇ ? ଆମର୍‌ଟାନେ ଜେଡେବେଲେ କାଇବାକେ ଉନା ରଇଲା, ସେ ବେଲେ ମୁଇ କାଇଟା କରିରଇଲି

✨ ୮:୧୧ ୮:୧୧ ମାତିଉ ୧୨:୩୮; ଲୁକ୍ ୧୧:୧୭ ✨ ୮:୧୨ ୮:୧୨ ମାତିଉ ୧୨:୩୯; ଲୁକ୍ ୧୧:୨୯ ✨ ୮:୧୫ ୮:୧୫ ଲୁକ୍ ୧୨:୧ * ୮:୧୫ ୮:୧୫ କମିର୍‌କେ ଗାଉଁ ଗୁଣ୍ଡେ ପାକାଇଲେ ଏଟା ରୁଟିକେ ପୁଲାଇସି, ସେମନ୍‌ର ଅଲପର୍ ସିକିଆ ଜବର୍ ଲକ୍‌କେ ବୁଲ୍ ବାଟେ ଦାରିଜାଇସି ✨ ୮:୧୮ ୮:୧୮ ମାର୍ଚ୍ଚକ ୪:୧୨

? ସେ ବିସଇ ତମେ ଏତାଆସ୍ ନାଇକି ? ୧୯ ମୁଇ ଜେଡେବେଲେ ପାଁଡ଼ ଅଜାର୍ ଲକର୍ ବିଡ଼ରେ ପାଁଡ଼ା ରୁଟିବାଙ୍ଗାଇ ରଇଲି, ସେଡ଼କି ବେଲେ ତମେମନ୍ ସବୁ କେଡେକ୍ ଡାଲା ବାଙ୍ଗାଳା କଣ୍ଡୁ ବେଟି ନେଇ ରଇଲାସ୍, ସେଟାକାଇ ତମର୍ ମନେ ନାଇ ?” ସେମନ୍ ତାକେ କଇଲାଇ, “ବାର ଡାଲା ।”

୨୦ “ଆରି, ସେ ଚାରି ଅଜାର୍ ଲକର୍ ବିଡ଼ରେ ମୁଇଁ ଜେଡେବେଲ୍ ସାତଟା ରୁଟି ବାଙ୍ଗାଇ ରଇଲି, ସେଡ଼କିବେଲେ ତମେମନ୍ ସବୁ କେଡେକ୍ ଡାଲା ବାଙ୍ଗାଳା କଣ୍ଡୁ ଟୁଲିଆଇ ରଇଲାସ୍ ?” ସେମନ୍ କଇଲାଇ “ସାଡ଼ ଡାଲା ।”

୨୧ ଆରି ଜିସୁ ସେମନ୍‌କେ ପାଚାରଲା, “ମୁଇ କାଇଟା କଇଲିନି, ତମେ କେନ୍ତେ ବୁଜାସ୍ ନାଇ ?”

ଜିସୁ ଗଟେକ୍ କାଣାକେ ଆଁକି ଦେକାଇଲା

୨୨ ପରେ ସେମନ୍ ବେତସାଇଦାଇ ଉଟି ଆଇଲାଇ, ଆରି ତେଇ କେଡେକ୍ ଲକ୍‌ମନ୍ ଗଟେକ୍ କାଣାଲକ୍‌କେ ଜିସୁର୍ ଲଗେ ଆନିକରି ତାକେ ଚିଇକରି ନିକ କର୍‌ବାକେ କଇଲାଇ । ୨୩ ଜିସୁ ତାକେ ଆଡେଦାରି ଗାଉଁ ବାଇରେ ଡାକିନେଲା, ଆରି ତୁକିକରି ତାର ଲାଲ୍ ସେ କାଣାର୍ ଆଁକିତେଇ ଲାଗାଇଲା । ତାର୍‌ମୁଣ୍ଡେ ଆଡ଼ ସଙ୍ଗାଇକରି “ତୁଇ ଅଲପ୍ ମିସା ଦେକି ପାରଲୁସ୍‌ନି କି ?” ବଲି ପାଚାରଲା ।

୨୪ ସେ ଚାରିବେଡ଼ି ଦେକିକରି କଇଲା, “ମୁଇ ଲକ୍‌ମନ୍ ଇଣ୍ଡୁବାଟା ଦେକିପାରଲିନି, ମାତର୍ ସେମନ୍ ଗର୍‌ପାରା ଡିସ୍‌ଲାଇନି” ବଲିକରି କଇଲା ।

୨୫ ଜିସୁ ଆରିତରେକ୍ ସେ କାଣାଲକର୍ ଆଁକିତେଇ ଆଡ଼ସଙ୍ଗ୍ ଚିଇଲା । ସେଦାପରେ ଅନି ତାର୍ ଆଁକି ନିମାନ୍ ଅଇଗାଲା ଆରି ପୁରାପୁରୁନ୍ ନିମାନ୍ ଦେକିପାରଲା । ୨୬ ଆରି ଜିସୁ ତାକେ କଇଲା, “ଏବେ ତୁଇ ଗାଏଁ ନ ଜାଆ, ମାତର୍ ତର୍ ନିଜର୍ ଗରେ ଉଟିଜା” ବଲିକରି ପାଚାଇଦେଲା ।

ପିତର୍ କଇଲା ଜିସୁ ଅଇଲାନି କିରିସଟ

(ମାତିଉ ୧୬:୧୩-୨୦; ଲୁକ୍ ୯:୧୮-୨୧)

୨୭ ତାର୍‌ପରେ ଜିସୁ ଆରି ତାର୍ ସିସ୍‌ମନ୍ କାଇସେରିଆ ପିଲିପ୍ ନାଉର୍ ଗଡ଼ଲଗେ ରଇବା ଚାରିବେଡ଼ିର୍ ଗାଉଁ ମନ୍‌କେ ଗାଲାଇ

। ବାଟେ ଜିସୁ ତାର ସିସ୍ତାମାନଙ୍କେ ପାଚାରଲା, “ଲକ୍ଷ୍ମଣ ମକେ କେ ବଲିକରି ବାବୁଲାଇନି ?”

୨୮ ✧ ସେମାନେ ତାକେ କଇଲା, “କେତେ ଲକ୍ଷ୍ମଣ ତମକେ ତୁବନ୍ ଦେଉ ଜଅନ୍ ବଲିକରି କଇଲାଇନି, ଆରି ଅଦେକ ଲକ୍ଷ୍ମଣ ତମକେ ଆଗର ଏଲିୟ ବଲି କଇଲାଇନି ଆରି କେତେଲକ୍ଷ୍ମଣ ତମକେ ପରମେସରଗାନେଅନି ଆଦେସ ପାଇ ଆସି, କାତାଅଇବା ବବିସତ୍‌ବକ୍ତା ମନରଗାନେଅନି ଗଟେକଲକ୍ଷ୍ମଣ ବଲି କଇଲାଇନି ।” ୨୯ ✧ ଆରି ତମେ ମକେ କେ ବଲିକରି ବାବୁଲାସନି ? ବଲି ଜିସୁ ସେମାନଙ୍କେ ପାଚାରଲା । ପିତର କଇଲା, “ତୁଇ ପରମେସର ପାଟାଇରଇବା ଉଦାରକାରିଆ କିରିସ୍ତ” ବଲି କଇଲା ।

୩୦ ତେଇ ଜିସୁ ସେମାନଙ୍କେ ଡାଟ୍‌ସଙ୍ଗ୍ ଜାଗରତା କରାଇ କଇଲା, “ମୁଇ କେ ବଲି କାକେ ନ କୁଆ ।”

ନିଜର ମରନ୍ ବିସଇନେଇ ଜିସୁର କାତା
(ମାତିଉ ୧୭:୨୧-୨୮; ଲୁକ୍ ୯:୨୨-୨୭)

୩୧ ତାରପଟେ ଜିସୁ, ପରମେସର ଅନି ଆଇଲା ନରପିଲାକେ କାଇ କାଇଟା ଅଇସି ବଲି ତାର ସିସ୍ତାମାନଙ୍କେ ସିକାଇଦେବାର ଦାରଲା । ସେ କଇଲା, “ପରମେସରଗାନେଅନି ଆଇଲା ନରପିଲା ମୁଇ ବେସି ଦୁକ୍ କସ୍ତ ପାଇବାର ଆଟେ । ମୁକିଅ ନେତାମନ୍, ମୁକିଅ ପୁଜାରିମନ୍, ଆରି ନିୟମ୍ ସିକାଇଦେବା ଲକ୍ଷ୍ମଣ ମକେ ନ ନାମତ୍ । ସେମାନେ ମକେ ମରାଇବାଇ ଆରି ତିନ୍ଦିନ୍ ଗାଲାପଟେ ମୁଇ ଆରି ତରେକ୍ ମଲାତେଇଅନି ଜିବନ୍ ଅଇ ଉଟ୍‌ବି ।” ୩୨ ଏ ସବୁ ବିସଇର କାତା ଜିସୁ ତାର ସିସ୍ତାମାନଙ୍କେ କାଇଟାମିସା ନ ଲୁଟାଇକରି କୁଲାକୁଲି ବାବେ କଇଦେଲା । ସେ ବେଲା ପିତର ଜିସୁକେ ଅଁତ୍‌ରେ ଡାକିନେଇକରି କଇଲା, “ତମେ କଇବା କାତା ସବୁ ସେକ୍ତି ନ ଅ ।” ୩୩ ଜିସୁ ପିଟିବାଟେ ପାସ୍‌ଲି ତାର ସିସ୍ତାମାନଙ୍କେ ଦେକ୍‌ଲା ଆରି ପିତରକେ କଇଲା, “ତୁଇ ଏ କାତା ସଇତାନେଅନି କଇଲୁସନି, ତୁଇ ମରଗାନେଅନି ଉଟି ଜା । ତୁଇ ପରମେସର ପାରା ଚିନ୍ତା ନ କରି ଲକ୍ଷ୍ମଣର ପାରା ଚିନ୍ତା କଲୁସନି ।” ବଲି କଇଲା ।

✧ ୮:୨୮ ୮:୨୮ ମାର୍କ ୭:୧୪,୧୫; ଲୁକ୍ ୯:୨୮ ✧ ୮:୨୯ ୮:୨୯ ଜଅନ୍ ୭:୨୮,୨୯

୩୪ ✨ତାର୍ପତରେ ଜିସୁ ସିସ୍ତମନ୍‌କେ ଆରି ଲକ୍‌ମନ୍‌କେ ତାରଲଗେ ଡାକିକରି କଇଲାଇ “କେ ମର୍ ସିସ୍ ଅଇବାକେ ମନ୍ କଲାନି ବଇଲେ, ସେ ତାର ନିଜର୍ ମନ୍ କଲାଟା ଚାଡ଼ିଦେଇକରି କୁର୍ସତେଇ ମର୍ବା ଲକ୍‌ମନ୍ ପାଇବା ଦୁକ୍ କସ୍ଟ ପାରା ଦୁକ୍ କସ୍ଟ ପାଇବାକେ, ତିଆର୍ ଅଇକରି ମର୍ସଇ ଆଇବାର୍ ଆଟେ । ୩୫ ✨ମାତର୍ କେ ନିଜର୍ ଜିବନ୍ ରକିଆ କର୍ବାକେ ମନ୍ କର୍ସି, ସେ ସେଟା ଆରାଇସି, ମାତର୍ ଜେ ମର୍ ଲାଗି ଆରି ସୁବ୍‌କବର୍ ଜାନାଇବାକେ ତାର୍ ଜିବନ ଆରାଇସି ବଇଲେ, ସେ ତାର୍ ଜିବନ୍ ରକିଆ କର୍ସି । ୩୬ ଜଦି ଗଟେକ୍ ଲକ୍ ଦୁନିଆର୍ ସବୁ ଜିନିସ୍ ପାଇକରି, ନିଜର୍ ଜିବନ୍ ଆରାଇସି, ସେଟା ତାର୍ପାଇ କାଇ ଲାବ୍ ନାଇ । ୩୭ ଆରି ତାର୍ ଆଡ଼ମାର୍ ବାଦୁଲେ କାଈଟା ଦେଲେ ମିସା ସମାନ୍ ନ ଅଏ । ୩୮ ପର୍ମେସର୍‌କେ ଚାଡ଼ିକରି ରଇବା ଏ କାରାପ୍ ଦୁନିଆଇ, ଲକ୍‌ମନ୍ ଜଦି ମର୍ ଲାଗି ଆରି ମର୍ କାତାର୍ ଲାଗି ଲାଜ୍ ଅଇବାଇ, ପର୍ମେସର୍‌ର ଟାନେଅନି ଆଇଲା ନରପିଲା ମୁଇ ମିସା ମର୍ ବାବାର୍ ବେସି ଉଜଲ୍ ଆରି ଡାକ୍‌ପୁଟା ସଙ୍ଗ୍ ଆରି ସରଗର୍ ସୁକଲ୍ ଦୁର୍‌ମନର୍ ସଙ୍ଗ୍ ଆଇଲାବେଲେ, ସେମନ୍‌କେ ମର୍ଲକ୍‌ମନ୍ ବଲି କଇବାକେ ମୁଇ ମିସା ଲାଜ୍ ଅଇବି ।”



୧ ଆରିତରେକ୍ ଜିସୁ ସେମନ୍‌କେ କଇଲା, ମୁଇ ତମକେ ସଡ଼ କାତା କଇଲିନି । ସେଟାର୍ପାଇ ସୁନା, ଏବେ ଇଡି ରଇବା କେତେ ଲକ୍‌ମନ୍, ପର୍ମେସର୍ ରାଜା ଅଇକରି ତାର୍ ରାଇଜ୍ ସାସନ୍ କର୍ବାଟା ନ ଦେକ୍‌ବା ଜାକ ନ ମରାସ୍ ।

ଜିସୁର ସଙ୍ଗ୍ ମସା ଆରି ଏଲିୟୁ
 (ମାଡିଉ ୧୭:୧-୧୩; ଲୁକ୍ ୯:୨୮)

୨ ✨ଟଅ ଦିନ୍ ପରେ ଜିସୁ ପିତର୍ ଜାକୁବ୍ ଆରି ଜଅନକେ ତାର୍ ସଙ୍ଗ୍ ମିସ୍ତେ ଡାକିକରି କେ ନଇବା ଗଟେକ୍ ଡେଙ୍ଗ୍ ପର୍ବତ୍ ଉପ୍‌ରେ ଗାଲା । ସିଡି ସେମନ୍‌ର୍ ମୁଆଟେ ତାର୍ ରୁପ୍ ବଦ୍‌ଲିଗାଲା । ୩ ଆରି ତାର୍ ପଟିଆ ବେସି ଜଗ୍‌ଜଗି ଜାଇ, ଦବ୍ ଅଇଗାଲା । ଆରି ଏ ଦୁନିଆ

✨ ୮:୩୪ ୮:୩୪ ମାଡିଉ ୧୦:୩୮; ଲୁକ୍ ୧୪:୨୭ ✨ ୮:୩୫ ୮:୩୫ ମାଡିଉ ୧୦:୩୯; ଲୁକ୍ ୧୭:୩୩; ଜଅନ୍ ୧୨:୨୫ ✨ ୯:୨ ୯:୨ ୨ ଯ୍ ପିତର୍ ୧:୧୭,୧୮

ଇସାବେ କେ ମିସା ସେକ୍ତି ଦବ୍ କରି ଦଇନାପାରତ୍ । ୪ ଆରି ମସାର୍ ସଙ୍ଗ୍ ଏଲିୟ୍ ଆରି ଜିସୁ ମିସ୍ତେ କାତାବାର୍ତା ଅଇବାଟା ସେମନ୍‌କେ ଡିସ୍‌ଲା । ୫ ତେଇ ପିତର ଜିସୁକେ କଇଲା, “ଏ ଗୁରୁ ଆମେ ଇତି ରଇବାଟା ନିକ । ଇତି ତିନ୍‌ଟା କୁଡିଆ ତିଆର୍ କରୁ । ତମ୍‌ପାଇ ଗଟେକ୍, ମସାର୍‌ପାଇ ଗଟେକ୍ ଆରି ଏଲିୟ୍‌ର୍ ପାଇ ଗଟେକ୍ ।” ୬ ପିତର କଇବା ବିସଇ କାଇଟା ବଲି ନିଜେ ନାଜାନି ରଇଲା । କାଇକେବଇଲେ ସେମନ୍ ବେସି ଡରିଜାଇରଇଲା ।

୭ ✨ଆରି ସେମନ୍‌କେ ମେଗର୍ ଚାଇ ଡାବିଅଇଦେଲା । ସେ ମେଗେଅନି ଏକ୍ତାରି କାତା ଅଇଲା, “ଏ ମର୍ ଆଲାଦର ପ, ଆର୍ କାତା ସୁନା ।” ୮ ଆରି ଅଗାଡ୍ ସେମନ୍ ଚାରିବେଡୁଡି ଦେକ୍‌ଲା, ତାକର୍ ସଙ୍ଗ୍ ଜିସୁକେ ଚାଡି ଆରି କାକେ ମିସା ଦେକଡ୍ ନାଇ ।

୯ ସେମନ୍ ପର୍ବତେ ଅନି ଉତରୁଲାବେଲେ ଜିସୁ ସେମନ୍‌କେ ଡାଡ୍ ସଙ୍ଗ୍ ଆଦେସ୍ ଦେଇ ଏକ୍ତି ବଲି କଇଲା, “ପର୍ମେସରର୍ ଟାନେଅନି ଆସିରଇବା ନର୍‌ପିଲା ମୁଇ, ମଲାଟାନେଅନି ଆରିତରେକ୍ ନ ଉଟ୍‌ବା ଜାକ ଇତି କାଇକାଇଟା ତମେ ଦେକ୍‌ଲାସ୍, ସେ ବିସଇ କାକେମିସା ନ କୁଆ ।” ୧୦ ସେଟାର୍‌ପାଇ ପର୍ବତ୍ ଉପରେ ଜାଇଟା ସେମନ୍ ଦେକ୍‌ଲା, ସେ ବିସଇ କାକେମିସା କଅଡ୍ ନାଇ । ମାତର ମଲାଟାନେଅନି ଆରିତରେକ୍ ଉଟ୍‌ବା ଅରଡ୍ କାଇଟା ବଲିକରି ସେମନ୍ କାତାବାର୍ତା ଅଇତେରଇଲା । ୧୧ ✨ସିସ୍‌ମନ୍ ଜିସୁକେ ପାଟାରୁଲା, “ଏଲିୟ୍ ପର୍‌ଡୁମ୍ ଆଇବାର୍ ଆତେ ବଲି ନିୟ୍ମ୍ ସିକାଇଦେବା ଲକ୍‌ମନ୍ କାଇକେ କଇଲାଜନି ?”

୧୨ ଜିସୁ ତାର୍ ସିସ୍‌ମନ୍‌କେ କଇଲା, “ଉଁ ପର୍ମେସରର୍ ବଇତେଇ ଏଲିୟ୍ ଆଗଡୁ ଆଇସି ବଲି ଲେକା ଅଇଲାକାତା ସଡ୍‌ସେ । ଏଲିୟ୍ ପର୍‌ଡୁମ୍ ଆସିକରି ସବୁ ବିସଇ ଟିକ୍ କର୍‌ସି, ମାତର ପର୍ମେସର୍ ଅନି ଆସିରଇବା ନର୍‌ପିଲା ମୁଇ ବେସି ବେସି କସ୍‌ଟ ପାଇବି ଆରି ଲକ୍‌ମନ୍ ମକେ ନ ନାମଡ୍ ବଲି ମିସା କାଇ ପର୍ମେସରର୍ ବଇଟାନେ ଲେକା ଅଏନାଇ କି ? ୧୩ ମୁଇ ତମ୍‌କେ ସଡ୍ କଇଲିନି, ଏବେ ଏଲିୟ୍ ଆସି ସାରୁଲା ଆତେ । ଆରି ତାର୍ ବିସଇ ପର୍ମେସର୍ ଟାନେ କାଇଟା

ଲେକା ଅଇଲା ଆଚେ, ସେ ସେକ୍ତିସେ ଲକ୍ମନ୍ ମିସା ତାକର୍ ନିଜର୍ ମନ୍ କଲା ଇସାବେ କରାପ୍ ତଲାଚଲ୍ତି କଲାଲ ।”

ଜିସୁ ଗଟେକ୍ ପିଲାକେ ତୁମା ଚାଡ଼ାଇଲା
(ମାତିଉ ୧୭:୧୪-୨୦; ଲୁକ୍ ୯:୩୭-୪୩)

୧୪ ତାର୍ପତେ ଜିସୁ, ପିତର୍, ଜାକୁବ୍ ଆରି ଜଅନ୍ ବିନ୍ ସିସ୍ମନ୍ ଲଗେ କେଟ୍ଲାବେଲେ ତେଇ ବେସି ଲକ୍ମନ୍ ରୁଣ୍ଡିରଇବାଟା ଦେକ୍ଲାଲ । ଆରି ନିୟ୍ମ୍ ସିକାଇଦେବା ଲକ୍ମନ୍ ସିସ୍ମନ୍ ସଙ୍ଗ୍ ଦଦାପେଲା ଅଇତେରଇଲାଲ । ୧୫ ଲକ୍ମନ୍ ଜେତେବେଲ୍ ଜିସୁ ତେଇ ଆଇବାଟା ଦେକ୍ଲାଲ, ସାର୍ଦାରେ କାବା ଅଇଗାଲାଲ ଆରି ଜିସୁକେ ଦୁକ୍ ସୁକ୍ ପାଚାର୍ବାକେ ତାରଲଗେ ପାଲାଲ ଆସି ଜୁଆର୍ କର୍ବାର୍ ଦାରଲାଲ । ୧୬ ଜିସୁ ତାର୍ ସିସ୍ମନ୍କେ ପାଚାରଲା, “ତମେ ନିୟ୍ମ୍ ସିକାଇବା ଲକ୍, ମର୍ ସିସ୍ମନ୍ ସଙ୍ଗ୍ କାଇ ବିସଇନେଇ ଦଦାପେଲା ଅଇତେରଇଲାସ୍ ?”

୧୭ ସେ ମାନ୍ଦା ଲକ୍ମନ୍ ବିତ୍ରେଅନି ଗଟେକ୍ ଲକ୍ ଜିସୁକେ ଡାକି କଇଲା, “ଏ ଗୁରୁ, ମୁଇ ମର୍ ପିଲାକେ ନିକ କର୍ବାକେ ତମର୍ ଗାନେ ଆନିରଇଲି । ତାର୍ ବିତ୍ରେ ଗଟେକ୍ କାରାପ୍ ଆଡ଼ମା ପୁରିକରି ତାକେ କାତା ଅଇବାକେ ଦେଏ ନାଲ । ୧୮ ସେ କରାପ୍ ଆଡ଼ମା ପିଲାକେ ଦାରଲାବେଲେ, ତାକେ ମଡିକରି ଅଦରାଇଦେଲାନି ଆରି ତାର୍ ଟଣ୍ଡେଅନି ପେପୁଲ୍ ବାରଇଲାନି ଆରି ସେ ଦାଡ଼ କାତର୍ସି । ଆରି ତାର୍ ଗାଗଡ଼ ସିଦା ଅଇଜାଇସି । ମୁଇ ତାର୍ତେଇ ଅନି କାରାପ୍ ଆଡ଼ମାକେ ବାରକରାଇ କେଦିଦେବାଇ ବଲି ତମର୍ ସିସ୍ମନ୍ ଲଗେ ଆନିରଇଲି । ମାତର୍ ତମର୍ ସିସ୍ମନ୍ ନାପାରଲାଲ ।”

୧୯ ଜିସୁ ସେମନ୍କେ କଇଲା, “ଏ ପର୍ମେସର୍କେ ବିସ୍ବାସ୍ ନ ରଇବା ଆଜିକାଲିର୍ ଲକ୍ମନ୍, ତମେ ବିସ୍ବାସ୍ କର୍ବାକେ ଆରି କେତେ ଦିନ୍ ମୁଇ ତମର୍ ସଙ୍ଗ୍ ରଇବାର୍ ଆଚେ ? ଆରି କେତେଦିନ୍ ମୁଇ ସାଆସ୍ ଦାରି ତମର୍ ସଙ୍ଗ୍ ରଇବାର୍ ଆଚେ ? ସେ ପିଲାକେ ମର୍ଲଗେ ଆନା ।” ୨୦ ଆରି ଲକ୍ମନ୍ ସେ ପିଲାକେ ଜିସୁରଲଗେ ଆନଲାଲ । ସେ କରାପ୍ ଆଡ଼ମା ଜିସୁକେ ଦେକ୍ଲା ଦାପ୍ରେ ପିଲାକେ ତଲେ ମଡିକରି ଅଦରାଇଲା । ଆରି ଗୁଣ୍ଡୁଲି ଗୁଣ୍ଡୁଲି କରି ତାର୍ ଟଣ୍ଡେଅନି ପେପୁଲ୍ ବାରଇ ଜାଇତେରଇଲା ।

୨୧ ଜିସୁ ସେ ପିଲାଟି ବାବାଙ୍କେ ପାଚାଉଲା, “ଏ ପିଲା ଏନ୍ତି ଅଇ କେତେଦିନ ଅଇଲା ?” ପିଲାଟି ବାବା କଇଲା, “ସାନ୍‌ବେଲେଅନି” ବଲି । ୨୨ ଆରି ସେ କଇଲା, “ସେ କାରାପ୍ ଆଡ଼ମା ପିଲାଙ୍କେ ମରାଇବାଙ୍କେ ବେସିତର୍ ପାନିଟାନେ ଆରି ଜଇଟାନେ ମଡ଼ିକରି ଅଦରାଇ ଆଟେ । ମାତର୍ ତୁଇ ଜଦି କାଇଟା କର୍ବାଙ୍କେ ପାରୁସ୍ ବଇଲେ ଆମର୍ ପାଇ ଦୟାକରି ସାଇଜ କର୍ ।”

୨୩ ଜିସୁ ତାଙ୍କେ କଇଲା, “କାଇଙ୍କେ ଜଦି ପାରୁସ୍ ବଇଲେ ନିମାନ୍ କର୍ ବଲିକରି କଇଲୁସ୍‌ନି ? କାଇଙ୍କେବଇଲେ ପର୍ମେସର୍‌ଙ୍କେ ବିସ୍‌ବାସ୍ କର୍ବା ଲକ୍‌ମନର୍ ତେଇ ସବୁ ଅଇସି ।”

୨୪ ସେ ଦାପରେ ପିଲାଟି ବାବା ଆଉଲିଅଇକରି, “ମୁଇ ବିସ୍‌ବାସ୍ କଲିନି, ଆରି ଅଦିକ୍ ବିସ୍‌ବାସ୍ କର୍ବାଙ୍କେ ମକେ ସାଇଜ କର୍ ।” ବଲିକରି କଇଲା ।

୨୫ ଏ ଗଟନାର୍ କାମ୍ ଦେକ୍‌ବାଙ୍କେ ଲକ୍‌ମନ୍ ଏକାତରେ ପାଲାଅଇବାଟା ଜିସୁ ଦେକିକରି ସେ କାରାପ୍ ଆଡ଼ମାଙ୍କେ ଦମ୍‌କାଇକରି କଇଲା, “ଏ କାରାପ୍ ଆଡ଼ମା, ତୁଇ ଏ ପିଲାଙ୍କେ ଗୁଲା ଆରି ବଇରା କରାଇଆରୁସ୍ । ଏ ପିଲାଟି ଗାଗଡେଅନି ବାରଇ ଉଟିଜା ଆରି କେବେ ମିସା ତାର୍ ଗାଗଡେ ନ ପୁର୍, ବଲି ମୁଇ ତକେ ଆଦେସ୍ ଦେଲିନି ।”

୨୬ ଆରି କାରାପ୍ ଆଡ଼ମା ବେସି ଆଉଲିଅଇକରି ପିଲାଙ୍କେ ମଡ଼ିକରି ଅଦରାଇ, ତାର୍‌ଟାନେଅନି ବାରଇଗାଲା । ଆରି ପିଲା ମରିଗାଲା ଲକ୍‌ର୍ ପାରା ଡିସ୍‌ଲା, ଏନ୍ତିକି କେତେକ୍ ଲକ୍‌ମନ୍ “ସେ ମରିଗାଲା ।” ବଲିକରି କଇଲା । ୨୭ ମାତର୍ ଜିସୁ ସେ ପିଲାଙ୍କେ ଆତେଦାରି ଉଟାଇକରି ତାଙ୍କେ ଟିଆ କରାଇଲାଙ୍କେ ସେ ଟିଆଅଇଲା ।

୨୮ ଜିସୁ ଆରି ତାର୍ ସିସ୍‌ମନ୍ ଗଟେକ୍ ଗର୍ ବିତ୍‌ରେ ଗାଲାପରେ, ଲକ୍‌ମନ୍ କେ ନଇଲାବେଲେ ତାଙ୍କେ ପାଚାଉଲା, “ଆମେ କାଇଙ୍କେ ସେ କାରାପ୍ ଆଡ଼ମାଙ୍କେ କେଦି ନାପାର୍‌ଲୁ ?”

୨୯ ଏ କାତା ସୁନି ଜିସୁ ସେମନ୍‌ଙ୍କେ କଇଲା, “ଏନ୍ତାରି କାରାପ୍ ଆଡ଼ମା ପର୍ମେସର୍‌ଙ୍କେ ପାର୍‌ତନା କରିସେ କେଦ୍‌ବାର୍ ଅଇସି, ଆରି କାଇ ବାଟ୍ ନାଇ ।”

ନିଜର ମରନ୍ ବିସଇ ଜିସୁ ଆରିତରେକ୍ କଇଲାନି
(ମାତିଉ ୧୭:୨୨-୨୩; ଲୁକ୍ ୯:୪୩-୪୫)

୩୦ ତାର୍ପତେ ଜିସୁ ଆରି ତାର୍ ସିସ୍ମନ୍ ସେ ଜାଗା ଚାଡ଼ିକରି ଉଠିଗାଲା । ସେମନ୍ ଗାଲିଲି ଦେସର୍ ବାଟ୍‌ଦେଇକରି ଜାଇତେରଇଲା । ସେମନ୍ କନ୍ ଜାଗାଇ ଆଚଡ଼ ବଲିକରି ଲକ୍‌ମନ୍ ନ ଜାନଡ଼ ବଲି ଜିସୁ ମନ୍ କର୍ତେରଇଲା ୩୧ କାଇକେବଇଲେ ସେ ତାର୍ ସିସ୍ମନ୍‌କେ ସିକାଇ ଦେବାକେ ମନ୍ କର୍ତେରଇଲା । ଜିସୁ ତାର୍ ସିସ୍ମନ୍‌କେ କଇଲା, “ସଡ଼ ପରମେସରର୍ ଟାନେଅନି ଆସିରଇବା ନର୍ପିଲା ମକେ, ଲକ୍‌ମନ୍‌ ଆତେ ସର୍ପି ଦେବାଇ ଆରି ସେମନ୍ ମକେ ମରାଇଦେବାଇ । ମାତର୍ ମୁଇ ମରିକରି ତିନ୍ଦିନ୍ ଗାଲାପତେ ଆରି ତରେକ୍ ମଲାଟାନେଅନି ଜିବନ୍ ଅଇ ଉର୍ବି ।”

୩୨ ମାତର୍ ଜିସୁ କଇବା ଏ କାତାର୍ ଅରଡ଼ ସିସ୍ମନ୍ ବୁଜଡ଼ ନାଇ ଆରି ସେମନ୍ ସେ କାତାର୍ ଅରଡ଼ ପାଚାର୍‌ବାକେ ତରଲାଇ ।

ସବୁର୍ଟାନେଅନି କେ ବଡ଼
(ମାତିଉ ୧୮:୧-୫; ଲୁକ୍ ୯:୪୬-୪୮)

୩୩ ଜିସୁ ଆରି ତାର୍ ସିସ୍ମନ୍ କପରନାତମେ ଆଇଲାଇ ଆରି ସେମନ୍ ଗର୍ ବିଡ଼ରେ ଗାଲାଇ । ତାର୍ପତେ ଜିସୁ ସେମନ୍‌କେ ପାଚାର୍‌ଲା, “ତମେ ବାଟେ କନ୍ ବିସଇନେଇ ଦଦାପେଲା ଅଇତେରଇଲାସ୍ ?”

୩୪ ☆ମାତର୍ ତାର୍ ସିସ୍ମନ୍ ଚିମ୍ବରା ଅଇଦେଲାଇ । କାଇକେବଇଲେ ସେମନ୍ ବାଟେ, ଆମର୍ ବିଡ଼ରେ ସବୁର୍ଟାନେଅନି କେ ବଡ଼ ବଲି ଦଦାପେଲା ଅଇତେରଇଲାଇ । ୩୫ ☆ଜିସୁ ବସ୍ତା ଆରି ତାର୍ ବାର୍ଟା ସିସ୍ମନ୍‌କେ ତାର୍‌ଲଗେ ଡାକାଇ ସେମନ୍‌କେ କଇଲା, “ଜିଦି କେ ମୁକିଆ ଅଇବାକେ ମନ୍ କଲେ, ସେ ସବୁର୍ଟାନେଅନି ସାନ୍ ଅଇବାର୍ ଆଟେ, ଆରି ସବୁଲକର୍ ସେବା କର୍ବାର୍ ଆଟେ ।” ୩୬ ତାର୍ପତେ ଜିସୁ ଗଟେକ୍ ସାନ୍‌ଟା ପିଲାକେ ନେଇକରି ସେମନ୍‌ ମୁଆଟେ ଚିଆ କରାଇ ସେମନ୍‌କେ

☆ ୯:୩୪ ୯:୩୪ ଲୁକ୍ ୨୨:୨୪ ☆ ୯:୩୫ ୯:୩୫ ମାତିଉ ୨୦:୨୬,୨୭,୨୩:୧୧; ମାର୍ଚ୍ଚକ ୧୦:୪୩,୪୪; ଲୁକ୍ ୨୨:୨୬

କଇଲା, ୩୭ ☆“କେ କେ ମର ଲାଗି ଏଡ଼ାରି ଗଟେକ୍ ସାନ୍ତା ପିଲାକେ ନାମ୍ବାଇ, ସେମନ୍ ମକେ ନାମ୍ଲାଇନି, ଆରି କେ କେ ମକେ ନାମ୍ଲାଇନି, ସେମନ୍ ମକେ ନାଇ, ମାତର୍ ମକେ ପାଟାଇରଇବା ମର୍ ବାବାକେ ନାମ୍ଲାଇନି ।”

ଜେ ଆମ୍ବକେ ବିରଦ୍ ନ କରେ ସେ ଆମର୍ ନିଜର୍ ଲକ୍
(ଲୁକ୍ ୯:୪୯-୫୦)

୩୮ ଜଅନ୍ ଜିସୁକେ କଇଲା, “ଏ ଗୁରୁ, ଗଟେକ୍ ଲକ୍ ତରନାଉଁ ଦାରି ଲକ୍ମନର୍ଗାନେଅନି କାରାପ୍ ଆତ୍ମାକେ ବାଟକରାଇ କେଦିଦେବାଟା ଆମେ ଦେକିକରି, ତାକେ ସେକ୍ତି ନ କର୍ ବଲି କଇଲୁ, କାଇକେବଇଲେ ସେ ଆମର୍ ନିଜର୍ ଲକ୍ ନଏଁ ।”

୩୯ ମାତର୍ ଜିସୁ କଇଲା, “ତାକେ ଏକ୍ତି ନ କର୍ ବଲି ତେବାଆ ନାଇ କାଇକେବଇଲେ, ମର୍ ନାଉଁର୍ ବସୁ ପାଇକରି କାବା ଅଇଜିବା କାମାନ୍ କରିପାର୍ବା ଲକ୍, ମର୍ ବିରୁଦେ କାରାପ୍ କାତା ନ କଏ ।
୪୦ ☆କାଇକେବଇଲେ ଜେ ଆମ୍ବକେ ବିରଦ୍ ନ କରେ, ସେ ଆମର୍ ନିଜର୍ ଲକ୍ । ୪୧ ☆ଆରି ମୁଇ ତମ୍ବକେ ସତ୍ କଇଲିନି, କେ ତମ୍ବକେ ମର୍ନାଉଁ ଦାରି ଗଟେକ୍ ଗିଲାସ୍ ପାନି କାଇବାକେ ଦେଇସିବଇଲେ, ସେଟାପାଇ ସତ୍ସେ ତାକେ ପୁରୁସ୍କାର୍ ମିଲ୍ସି ।”

ବିନ୍ ଲକ୍ବକେ ପାପ୍ ନ କରାଇବାକେ ସିକିଆ
(ମାତିଉ ୧୮:୬-୯; ଲୁକ୍ ୧୭:୧-୨)

୪୨ ଜିସୁ କଇବାର୍ ଦାରଲା “ଜଦି କେ ମରତେଇ ବିସ୍ବାସ୍ କରୁରଇବା ଗଟେକ୍ ଲକ୍ବକେ, ସେ କରୁରଇବା ବିସ୍ବାସ୍ ଚାଡିଦେବାକେ ପାପ୍କାମ୍ କରାଇଲାଇନି ବଇଲେ, ସେ ଲକ୍ବ ଗାଲାଇ ଜତା ପାକ୍ନା ବାନ୍ଧିକରି ତାକେ ସମ୍ବୁରେ ପିଙ୍ଗିଦେବାଟା ତାପ୍ପାଇ ନିକ ଅଇତା । ୪୩ ☆ଜଦି ତମର୍ ଆତ୍ ତମ୍ବକେ ପାପ୍ କରାଇଲାନି ବଇଲେ, ସେ ଆତ୍ କାଟିପାକାଆ । କାଇକେବଇଲେ ଜଡେକ୍ ଆତ୍ ରଇକରି ସବୁଦିନପାଇ ଜଇଲାଗ୍ବା ନରକେ ପେଲାଅଇବା ବାଦୁଲେ ଗଟେକ୍ ଆତ୍ ନ ରଇକରି ସର୍ଗେ

☆ ୯:୩୭ ୯:୩୭ ମାତିଉ ୧୦:୪୦; ଲୁକ୍ ୧୦:୧୬; ଜଅନ୍ ୧୩:୨୦ ☆ ୯:୪୦ ୯:୪୦ ମାତିଉ ୧୨:୩୦; ଲୁକ୍ ୧୧:୨୩ ☆ ୯:୪୧ ୯:୪୧ ମାତିଉ ୧୦:୪୨ ☆ ୯:୪୩ ୯:୪୩ ମାତିଉ ୫:୩୦

କେଟ୍‌ବାଟା ନିକ ଅଇସି । ୪୪ କାଇକେବଇଲେ ନର୍‌କେ ସେମନର୍ କିତା ନସ୍‌ଟ ନ ଅଅଡ୍ ଆରି ଜଇ ନ ଲିବେ । * ୪୫ ଜଦି ତମର୍ ପାଦ୍ ତମକେ ପାପକାମ୍ କରାଇଲାନି ବଇଲେ, ସେ ପାଦ୍ କାଟି ପିଙ୍ଗିଦିଆସ୍ । ଜଡେକ୍ ପାଦ୍ ରଇକରି ନର୍‌କେ ପେଲାଇଅଇବା ବାଦୁଲେ ଚଟା ଅଇକରି ସର୍‌ଗେ କେଟ୍‌ବାଟା ତମର୍‌ପାଇ ନିକଅଇସି । ୪୬ କାଇକେବଇଲେ ନର୍‌କେ ସେମନର୍ କିତା ନସ୍‌ଟ ନ ଅଅଡ୍ ଆରି ଜଇ ନ ଲିବେ । † ୪୭ ✨ଜଦି ତମର୍ ଆଁକିର୍ ଲାଗି ତମେ ବିସ୍‌ବାସ୍ ଆରାଇଲାସ୍‌ନି ବଇଲେ, ସେ ଆଁକି ବେଟି ପିଙ୍ଗିଦିଆସ୍ । କାଇକେବଇଲେ ଜଡେକ୍ ଆଁକି ରଇ ନର୍‌କେ ପେଲାଇଅଇବା ବାଦୁଲେ, ଗଟେକ୍ ଆଁକି ରଇକରି ସରଗ୍ ରାଇଜେ କେଟ୍‌ବାଟା ତମର୍‌ପାଇ ନିକରଇସି । ୪୮ କାଇକେବଇଲେ ନର୍‌କେ ସେମନର୍ କିତା ନସ୍‌ଟ ନ ଅଅଡ୍ ଆରି ଜଇ ନ ଲିବେ ।”

୪୯ “ଜେଜ୍‌କି ସୁନା ଜଇଟାମେ ପଡାଇକରି ନିର୍‌ମଲ୍ କଲାପାରା ସବୁ ଲକ୍‌ମନକେ ଜଇସଙ୍ଗ୍ ନିର୍‌ମଲ୍ କର୍‌ବାଇ ।”

୫୦ ✨“ନୁନ୍ ଗଟେକ୍ ନିମାନ୍ ଜିନିସ୍ । ମାତର୍ ନୁନ୍ ଜଦି ତାର୍ କରିଆ ଅଇବାଟା ଆରାଇସି ବଇଲେ ସେ ଆରି ତରେକ୍ କେନତାର୍ କରିଆ ଅଇପାରସି ? ତମେ ନୁନ୍ ପାରା ନିମାନ୍ ଗୁନେ ପୁରାପୁରୁନ୍ ଅଇ ସବୁଲକ୍‌ମନର୍ ସଙ୍ଗ୍ ମିସି ବିଡି କରି ସୁଆଲେ ରୁଆ” ବଲି କଇଲା ।

୧୦

ବିବାଅଇ ଚାଡାଚାଡି ଅଇବା ବିସଇ ଲାଗ ଜିସୁର୍ ସିକିଆ
(ମାତିଉ ୧୯:୧-୧୨; ଲୁକ୍ ୧୬:୧୮)

୧ ତାର୍‌ପଟେ ଜିସୁ ସେ ଜାଗା ଚାଡିକରି ଜିଉଦା ରାଇଜର୍ ସଦି ଆରି ଜର୍‌ଦନର୍ ଆରି ଗଟେକ୍ ବାଟେ ଆଇଲା । ଆରି ସବୁ ବେଲାର୍ ପାରା ଲକ୍‌ମନ୍ ତାର୍ ଲଗେ ରୁଣ୍ଡିଲାଇ । ଆରି ଜିସୁ ସେମନକେ ପର୍‌ମେସରର୍ କାତା ସିକାଇଦେଲା ।

* ୯:୪୪ ୯:୪୪ କେତକ୍‌ପୁରନା ଲେକାଇ ଏ ପଦ୍ ନାଇ † ୯:୪୬ ୯:୪୬ କେତକ୍‌ପୁରନା ଲେକାଇ ଏ ପଦ୍ ନାଇ ✨ ୯:୪୭ ୯:୪୭ ମାତିଉ ୫:୨୯ ✨ ୯:୫୦ ୯:୫୦ ମାତିଉ ୫:୧୩; ଲୁକ୍ ୧୪:୩୪,୩୫

୨ କେତେଟା ପାରୁସିମନ୍ ଜିସୁରୁ ଲଗେ ଆସିକରି ତାକେ ବୁଲ୍ ଦାରବାକେ ଏନ୍ତାରି ପରସନ୍ ପାଚାରୁଲାଇ । “ଗଟେକ୍ ମୁନ୍ନୁସ୍ ତାର୍ ମାଇଜିକେ ଚାଡ଼ିଦେବାଟା ଆମର୍ ନିୟ୍ମେ ଆଚେ କି ?”

୩ ଜିସୁ ସେମନ୍‌କେ କଇଲା, “ମସା ତମ୍‌କେ କାଇ ଆଦେସ୍ ଦେଲା ଆଚେ ?” ୪ ✱ ସେମନ୍ କଇଲାଇ, “ଗଟେକ୍ ମୁନ୍ନୁସ୍ ତାର୍ ମାଇଜିକେ ଚାଡ଼ିଦେବାର୍ ରାଜିନାମା ପତର୍ ଲେକି ତାକେ ଦେଲାପଚେ ତାକେ ପାଟାଲ୍‌ଦେଇ ଅଇସି ବଲି ମସା କଇଲା ଆଚେ ।”

୫ ଜିସୁ ସେମନ୍‌କେ କଇଲା, “ମସା କାଇକେ ଏନ୍ତି ଲେକିରଇଲା ବଇଲେ, ତମର୍ ମନ୍‌ବିତ୍‌ରର୍ ବୁଜ୍‌ବା ବପୁ ଡାଟ୍ ରଇଲାଟା ଦେକିକରି ସେ, ଏ ଆଦେସ୍ ଲେକିଦେଲା ଆଚେ । ୬ ଜେନ୍ତି ସାସ୍‌ତର୍ କଇଲାନି, ପର୍‌ମେସର୍ ଜେଡେବେଲେ ଏ ଦୁନିଆ ତିଆରକଲା, ସେବେଲେ ସେ ମାଇଜିମୁନ୍ନୁସ୍ କରି ତିଆରକଲା ଆଚେ । ୭ ସେଟାର୍‌ପାଇ ଗଟେକ୍ ମୁନ୍ନୁସ୍ ତାର୍ ବାବା ମାକେ ଚାଡ଼ିକରି ତାର୍ ମାଇଜି ସଙ୍ଘ୍ ମିସ୍‌ସି । ୮ ସେ ଦୁଇଲକ୍ ଗଟେକ୍ ଅଇବାଇ, ଆରି ସେମନ୍ ଦୁଇଲକ୍ ଇସାବେ ନ ରଅଡ୍, ମାତର୍ ଗଟେକ୍ ଲକ୍ ଇସାବେ ରଇବାଇ । ୯ ସେଟାର୍‌ପାଇ ପର୍‌ମେସର୍ ଜନ୍ ଦୁଇଲକ୍‌କେ ମିସାଇଆଚେ, କେ ମିସା ସେମନ୍‌କେ ବିନେ ନ ବେଗ୍‌ଲାଅଡ୍ ।”

୧୦ ଜିସୁ ଆରି ତାର୍ ସିସମନ୍ ଗରେ ବାଉଡିଗାଲା ପଚେ, ସିସମନ୍ ଆରିତରେକ୍ ଏ ବିସଇ ତାକେ ପାଚାରୁଲାଇ । ୧୧ ✱ ଜିସୁ ସେମନ୍‌କେ କଇଲା, “ଗଟେକ୍ ମନସ୍ ତାର୍ ମାଇଜିକେ ଚାଡ଼ିପତର୍ ଦେଇ ବିନ୍ ମାଇଜିକେ ବିବା ଅଇସି ବଇଲେ, ସେ ମନସ୍ ପର୍‌ତୁମ୍ ମାଇଜିର୍ ବିରୁଦେ ପାଦ୍‌ରା କାମ୍ କଲାନି । ୧୨ ଆରି ସେନ୍ତି ସେ ଜନ୍ ମାଇଜିଟକି ତାର୍ ମୁନ୍ନୁସକେ ଚାଡ଼ି ପତର୍ ଦେଇ, ବିନ୍ ମୁନ୍ନୁସକେ ବିବା ଅଇସି ବଇଲେ ସେ ମିସା ପର୍‌ତୁମ୍ ମନସ୍ ବିରୁଦେ ପାଦ୍‌ରି କାମ୍ କଲାନି ।” ବଲିକରି କଇଲା ।

ଜିସୁ ସାନ୍ ପିଲାମନକେ ଆସିର୍‌ବାଦ୍ କଲା

(ମାତିଉ ୧୯:୧୩-୧୫; ଲୁକ୍ ୧୮:୧୫-୧୭)

୧୩ ଗଟେକ୍ ଦିନ୍ କେଡେକ୍ ଲକ୍‌ମନ୍ ତାକର୍ ପିଲାଟକିମନ୍‌କେ ଜିସୁ ଆଡ୍ ସଙ୍ଘାଇ ଆସିର୍‌ବାଦ୍ କର ବଲି ତାରୁଲଗେ ଆନ୍‌ଲାଇ ।

✱ ୧୦:୪ ୧୦:୪ ମାତିଉ ୫:୩୧ ✱ ୧୦:୧୧ ୧୦:୧୧ ମାତିଉ ୫:୩୨; ୧ମ କରନ୍ତିୟ ୭:୧୦,୧୧

ମାତର ତାର ସିସ୍ତାନ୍ ଲକ୍ଷ୍ମୀଙ୍କେ, ଦମ୍ଭକାଲାଇ । ୧୪ ଜିସୁ ଏଟା ଦେକି ବେସି ରିସାଅଇ ସିସ୍ତାନ୍ଙ୍କେ କଇଲା, “ସାନ୍ ପିଲାମନ୍ଙ୍କେ ମର୍ ଲଗେ ଆଇବାକେ ବାଟ ଦିଆସ୍, ସେମନ୍ଙ୍କେ ମନା କରାନାଇ । କାଇକେବଇଲେ ପର୍ମେସରର୍ ରାଇଜ୍ ଏକ୍ରି ପିଲାଟକିମନ୍ ପାରା ରଇବା ଲକ୍ଷ୍ମୀମନ୍ ପାଇସେ । ୧୫ ✱ମୁଇ ତମ୍ଙ୍କେ ସତ୍ କାତା କଇଲିନି, କେ ମିସା ଗଟେକ୍ ସାନ୍ ପିଲାର ପାରା ନ ଅଇ, ପର୍ମେସରର୍ ରାଇଜ୍ ନ ନାମତ୍, ସେମନ୍ କେବେ ମିସା ତାର୍ ରାଇଜେ କେଟି ନାପାରତ୍ ।” ୧୬ ତାର୍ପତେ ଜିସୁ ସାନ୍ ସାନ୍ ପିଲାଟକିମନ୍ଙ୍କେ ଉଁଚାରି ତାକର୍ ମୁଣ୍ଡେ ଚିକକରି ଆସିର୍ବାଦ୍ କଲା ।

ସାଉକାର୍ ଗର୍ ପିଲାର୍ କାତ

(ମାତିଉ ୧୯:୧୬-୩୦; ଲୁକ୍ ୧୮:୧୮-୩୦)

୧୬ ଜିସୁ ଆରି ତାର୍ ସିସ୍ତାନ୍ ତେଇଅନି ବାରଇ ଜିବାବେଲେ ବାଟେ ଗଟେକ୍ ଲକ୍ ପାଲାଇ ଆସି ତାର୍ ଲଗେ କେଟ୍ଲା ଆରି ତାର୍ ମୁଆଟେ ମାଣ୍ଡିକ୍ଟା ଦେଇ ପାଚାରଲା, “ଏ ନିମାନ୍ ଗୁରୁ, ନ ସାର୍ବା ଜିବନ୍ ମିଲାଇବାକେ ଆଲେ ମୁଇ କାଇଟା କର୍ବାର୍ ଆଟେ ?”

୧୮ ଜିସୁ ତାକେ କଇଲା, “ତୁଇ ମକେ କାଇକେ ନିମାନ୍ ଲକ୍ ବଲି କଇଲୁସ୍ନି ? କାଇକେବଇଲେ ପର୍ମେସର୍ଙ୍କେ ଚାଡ଼ିକରି ଆରି ବିନ୍ଟା କେ ମିସା ନିମାନ୍ ଲକ୍ ନାଇ । ୧୯ ଆରି ତୁଇ ନିଅମତା ଜାନିଆରୁସ୍, ମାର୍ବାର୍ ନାଇ, ପାଦ୍‌ରାପାଦ୍‌ରି କାମ୍ କର୍ବାର୍ ନାଇ, ଚର୍ କାମ୍ କର୍ବାର୍ ନାଇ, ମିର୍ ସାକି ଦେବାର୍ ନାଇ, ଆୟା ବାବାକେ ସନ୍ମାନ୍ ଦିଆସ୍ ।” ବଲି କଇଲା ।

୨୦ ସେ ଲକ୍ ଜିସୁଙ୍କେ କଇଲା, “ଏ ଗୁରୁ, ମୁଇତା ଏସବୁ ଆଦେସ୍ ସାନ୍ ବେଲେ ଅନି ମାନ୍‌ଲିନି ।”

୨୧ ଜିସୁ ତାକେ ନିକକରି ଦେକଲା ଆରି ତାକେ ଆଲାଦ୍ କରି କଇଲା, “ତୁଇ ଏବେ ମିସା ଗଟେକ୍ ବିସଇତେଇ ଉନା ଆରୁସ୍ । ତୁଇ ଜାଇ ତର୍ ଦନ୍‌ସଁପତି ବିକି, ସେ ତାରୁ ଗରିବ୍ ଲକ୍ଷ୍ମୀଙ୍କେ ବାଟାକରି ଦେସ୍, ତୁଇ ସର୍ଗେ ଦନ୍ ପାଇସୁ । ଏକ୍ରିକରି ମର୍ ପତେ ପତେ ଆଉ ।” ବଲିକରି କଇଲା । ୨୨ ଜିସୁ କଇଲା ଏ କାତା ସୁନିକରି ସେ ଲକ୍

ମୁ ସୁକାଇ କରି, ଗରେ ଉଠିଗାଲା । କାଇକେବଇଲେ ସେଲକ୍ ବେସି ସାଉକାର ରଇଲା ।

୨୩ ଜିସୁ ଚାରିବେଡ଼ି ଦେକିକରି ସିସ୍‌ମନ୍‌କେ କଇଲା, “ସାଉକାର ଲକ୍‌ମନ୍‌ ପର୍‌ମେସରର୍ ରାଇଜେ ଜିବାଟା ବେସି କସ୍‌ଟ ଆଟେ ।”

୨୪ ଜିସୁର କାତା ସୁନିକରି ସିସ୍‌ମନ୍‌ କାବା ଅଇଗାଲାଇ । ମାତର୍ ଜିସୁ ସେମନ୍‌କେ ଆରିତରେକ୍ କଇଲା, “ଏ ମର୍ ପିଲାମନ୍‌ ପର୍‌ମେସରର୍ ରାଇଜେ ଜିବାଟା ଲକ୍‌ମନ୍‌କେ କେଡେକ୍ କସ୍‌ଟ !

୨୫ ଜେକ୍ତି ଗଟେକ୍ ବଡ଼ ଜୁଡ଼ି ସୁଜି ବାଟେ ଚିଙ୍ଗିଲି ଜିବାକେ କସ୍‌ଟ, ସାଉକାର ଲକ୍‌ ପର୍‌ମେସରର୍ ରାଇଜେ କେଟ୍‌ବାଟା ତାର୍‌ତେଇଅନି ଅଦିକ୍ କସ୍‌ଟ ।”

୨୬ ସିସ୍‌ମନ୍‌ ଆରିତରେକ୍ ବେସି କାବା ଅଇଗାଲାଇ ଆରି ନିଜର୍ ନିଜର୍ ବିଡ଼ରେ କାତା ଅଇଲାଇ, “ଏକ୍ତି ବଇଲେ କେ ତେବେ ରକିଆ ପାଇସି ?”

୨୭ ଜିସୁ ସେମନ୍‌କେ ଦେକିକରି କଇଲା, “ଏ ବିସଇ ଲକ୍‌ମନ୍‌ର୍ ଟାନେ ଅଇନାପାରେ, ମାତର୍ ପର୍‌ମେସରର୍ ଟାନେ ସବୁଟା ଅଇପାରସି ।”

୨୮ ପିତର୍ ଜିସୁକେ କଇଲା, “ଦେକା ଆମେ ଆମର୍ ସବୁ ଚାଡ଼ିଦେଇ ତମର୍ ସଙ୍ଗ୍ ଆଇଲୁଆରୁ ।”

୨୯ ଜିସୁ ସେମନ୍‌କେ କଇଲା, “ମୁଇ ତମ୍‌କେ ସଡ଼ କାତା କଇଲିନି, ଜେ ମର୍ ସଙ୍ଗ୍ ଆଇବାକେ ଆରି ପର୍‌ମେସରର୍ ନିମାନ୍ କାତା ଜାନାଇବାକେ ଗର୍ ଦୁଆର୍, ବାଇ ବଇନି, ମା ବାବା, ପିଲାଟକି ଆରି ଜମିବାଡ଼ି ଚାଡ଼ିକରି ଆଟେ, ୩୦ ସେ ସଡ଼ସେ, ନିଜର୍ ଚାଡ଼ିରଇଲା ସବୁ ବିସଇତେଇଅନି ସଏ ବାଗ୍ ଅଦିକ୍ ଏ ଜୁଗେ ପାଇସି । ଗର୍ ଦୁଆର୍, ବାଇ ବଇନି, ମାଆ ବାବା, ପିଲାଟକି ଆରି ଜମିବାଡ଼ି ଏ ସବୁ ଦିନସୁ ଅଦିକ୍ ପାଇସି ଆରି ତାର୍ ସଙ୍ଗ୍ ଗେଞ୍ଜନା ମିସା ପାଇସି । ମାତର୍ ଆଇବା ଜୁଗେ ପର୍‌ମେସରର୍ ରାଇଜେ, ସେ ନ ସାର୍‌ବା ଜିବନ୍ ପାଇସି । ୩୧ ☆ମାତର୍ ଜନ୍ ଲକ୍‌ମନ୍‌ ଆଗ୍‌ତୁ ଅଇତେରଇବାଇ, ସେମନ୍‌ ପଟେ ରଇବାଇ । ଆରି କେ କେ ପଟେ ରଇବାଇ, ସେମନ୍‌ ଆଗ୍‌ତୁ ରଇବାଇ ।”

ଜିସୁ ତାର ମରନର ବିସଇ ଏଟା ସଙ୍ଗ ତିନ୍ ପାଲି କଇଲା
(ମାତିଉ ୨୦:୧୭-୧୯; ଲୁକ୍ ୧୮:୩୧-୩୪)

୩୨ ସେମନ୍ ଜିରୁସାଲମେ ଗାଲାବେଲେ, ଜିସୁ ସେମନ୍ର ଆଗ୍ତୁ ଆଗ୍ତୁ ଜାଇତେ ରଇଲା । ସେବେଲା ସିସ୍ମନ୍ କାବାଅଇଜାଇତେ ରଇଲା । ଆରି ଜିସୁର୍ ପଟେ ପଟେ ଜିବା ଲକ୍ମନ୍ ସବୁ ସେ ଜିରୁସାଲମେ ଗାଲାନି ବଲି ଡରିଜାଇତେ ରଇଲା । ଜିସୁ ତାର ବାରଟା ସିସ୍ମନ୍କେ ବିନେ ଡାକିନେଇକରି ନିଜକେ କାଇକାକଟା ଅଇସି, ସେ ବିସଇ କଇବାର ଦାରଲା । ୩୩ ଜିସୁ ତାର ସିସ୍ମନ୍କେ କଇଲା, “ସୁନା ଆମେ ଜିରୁସାଲମେ ଗାଲୁନି । ତେଇ ପରମେସରରଟାନେଅନି ଆସିରଇବା ନର୍ପିଲା, ମକେ ବିସ୍‌ବାସେ ବିସ୍ ଦେଲାପାରା କରି ମୁକିଅ ପୁଜାରିମନ୍ ଆରି ନିୟମ୍ ସିକାଇ ଦେବା ଲକ୍ମନ୍କେ ସର୍ପି ଦେବାଇ । ସେମନ୍ ମକେ କିଜାଇକରି ବିଚାର କରି ‘ଆକେ ମରାଇବାର୍ ଆଟେ ।’ ବଲି ରମିୟ ଲକ୍ମନ୍କେ ସର୍ପି ଦେବାଇ । ୩୪ ସେମନ୍ ମକେ ଟାପୁରା କରବାଇ, ମର୍ ଉପ୍ରେ ତୁକ୍‌ବାଇ । ମକେ କରଡା ସଙ୍ଗ ମାରବାଇ, ଆରି ସାରାସାରି ମରାଇବାଇ । ମାତର୍ ମରିକରି ତିନ୍‌ଦିନ୍ ଗାଲାପଟେ, ମୁଇ ଆରି ତରେକ୍ ମଲାଟାନେଅନି ଉର୍ବି ।”

ଜାକୁବ୍ ଆରି ଜଅନ୍ ମାଙ୍ଗବାଟା
(ମାତିଉ ୨୦:୨୦-୨୮)

୩୫ ଜେବଦି ନାଉର୍ ଗଟେକ୍ ଲକ୍ମର୍ ପିଲାମନ୍ ଜାକୁବ୍ ଆରି ଜଅନ୍ ଜିସୁର୍ତେଇ ଆସି ତାକେ କଇଲାଇ, “ଏ ଗୁରୁ, ଆମେ ତର୍ତେଇ ଜାଇଟା ମାଙ୍ଗୁ, ତୁଇ ସେଟା କର୍ ବଲି ଆମେ ମନ୍ କଲୁନି ।”

୩୬ ଜିସୁ ପାଟାରଲା, “ମୁଇ ତମର୍ ପାଇ କାଇଟା କର୍ବି ବଲି ମନ୍ କଲାସ୍ନି ?”

୩୭ ସେମନ୍ ଜିସୁକେ କଇଲାଇ, “ତୁଇ ତର୍ ଡାକ୍‌ପୁଟା ପାଇବା ବସ୍‌ବା ଜାଗାଇ ବସ୍‌ଲା ବେଲେ ଆମର୍ ତୁଇଲକ୍‌କର୍ ବିଡ୍‌ରେ ଅନି ଗଟେକ୍ ଲକ୍‌କେ ତର୍ ଉଜା ବାଟେ ଆରି ଗଟେକ୍ ଲକ୍‌କେ ଡେବ୍‌ରି ବାଟେ ବସାଅ ବଲି ମନ୍ କଲୁନି ।”

୩୮ ☆ଜିସୁ ସେମନ୍ତକେ କଇଲା, “ତମେ କାଇ ବିସଇ ମାଙ୍ଗ୍‌ଲାସ୍‌ନି ସେ ବିସଇ ନାଜାନାସ୍ । ମକେ ଜନ୍ ମୁତାଇ ଦୁକ୍‌କସ୍‌ଟ ପାଇବାକେ ଆଚେ, ସେ ମୁତାର ଦୁକ୍‌କସ୍‌ଟ ପାଇପାରାସ୍ କି ? ଆରି ମୁଇ ଜନ୍ ତୁବନ୍ ନେବାର୍ ଆଚେ, ସେ ତୁବନ୍ ନେଇ ପାରାସ୍ କି ?”

୩୯ ସେମନ୍ ଜିସୁକେ କଇଲା, “ଉଁ ଆମେ ପାରୁ ।” ଜିସୁ ସେମନ୍ତକେ କଇଲା, “ଏଟା ସତ୍‌ସେ । ମୁଇ ଜନ୍ ମୁତାର ଦୁକ୍‌କସ୍‌ଟ ପାଇବି ଆରି ଜନ୍ ତୁବନ୍ ନେବି ତମେମିସା ସେ ମୁତାର ଦୁକ୍‌ କସ୍‌ଟ ଆରି ତୁବନ୍ ପାଇସା । ୪୦ ମାତର୍ ମର୍ ଉଜାବାଟେ କି ଡେବ୍‌ରିବାଟେ ବସ୍‌ବାକେ ଦେବାର୍, ମର୍ ଅଦିକାର୍ ନାଇ, ମାତର୍ ମର୍ ବାବା ବାବସି ।”

୪୧ ଜାକୁବ୍ ଆରି ଜଅନ୍ କଇଲା କାତା ବିନ୍ ସିସ୍‌ମନ୍ ଜେଡେବେଲ୍ ସୁନ୍‌ଲା, ଜାକୁବ୍ ଆରି ଜଅନ୍‌କେ ବେସି ରିସା ଅଇଗାଲା । ୪୨ ☆ମାତର୍ ଜିସୁ ତାର୍ ସିସ୍‌ମନ୍‌କେ ଗଟେକ୍‌ଟାନେ ଡାକି କରି ସେମନ୍‌କେ କଇଲା, “ଏ ଦୁନିଆର୍ ରାଜାମନ୍ ଆରି ନେତାମନ୍ ଲକ୍‌ମନ୍‌କେ ନିଜର୍ ଅଦିକାରେ ରକ୍‌ବାକେ ମନ୍ କର୍‌ବାଇ । ଆରି ସର୍‌କାର୍ ମିସା ଡାକର୍ ତଲେ ରଇଲା ଲକ୍‌ମନ୍‌କେ ନିଜର୍ ଅଦିକାରେ ରକି ରଇବାକେ ମନ୍ କର୍‌ବାଇ । ଏ ବିସଇ ତମେ ଜାନିଆଟାସ୍ । ୪୩ ☆ମାତର୍ ତମର୍ ବିତ୍‌ରେ ଏକ୍ତି ନ ରଇକରି ବିନ୍‌ବାବେ ରଇବାର୍ ଆଚେ । ତମର୍ ବିତ୍‌ରେଅନି କେ ବଡ୍ ଲକ୍ ପାରା ଦେକାଇଅଇବାକେ ମନ୍ କଲାନି ବଇଲେ, ସେ ତମର୍ ସବୁ ଲକ୍‌ର୍ ଗଟେକ୍ ଗତିଦାଙ୍ଗ୍‌ଡା ପାରା ରଅ । ୪୪ ଜଦି କେ ତମର୍ ବିତ୍‌ରେ ଅନି ପର୍‌ମେସରର୍ ମୁଆଟେ ମୁକିଅ ଲକ୍ ଅଇବାକେ ମନ୍ କଲାନି ବଇଲେ, ସେ ଗଟେକ୍ ଗେନ୍‌ଲା ଗତିଦାଙ୍ଗ୍‌ଡା ପାରା ସେବା କର । ୪୫ କାଇକେ ବଇଲେ ପର୍‌ମେସର୍‌ଟାନେଅନି ଆସିରଇବା ନର୍‌ପିଲା ମୁଇ, ବିନ୍ ଲକ୍‌ମନ୍‌ର୍‌ଟାନେଅନି ମକେ ସେବା ମିଲ ବଲି ଆସି ନାଇ, ମାତର୍ ସେବା କର୍‌ବାକେ ଆସି ଆତି । ଆରି ମୁଇ ଜିବନ୍ ଦେବାର୍ ଲାଗି, ବେସି ଲକ୍ ଦସି ବଲି ଏଜାଇ ନ ଅଇ, ପାପେଅନି ରକିଆ ପାଇବାଇ ।”

ଜିସୁ ବାର୍ତ୍ତିମୟ କାଣାକେ ନିକ କଲା
(ମାତିଉ ୨୦:୨୯-୩୪; ଲୁକ୍ ୧୮:୩୫-୪୩)

୪୭ ତାର୍ ପରେ ଜିସୁ ଆରି ତାର୍ ସିସ୍ତମନ୍ ଜିରିଅ ନାଉର୍ ଗଡେ କେଟ୍ଲାଇ । ସେ ଗଡ଼ ଚାଡ଼ିକରି ଗାଲାବେଲେ, ତିମାୟ ନାଉର୍ ଲକର୍ ପିଲା ବାର୍ତ୍ତିମୟ ବଲି ଗଟେକ୍ କାଣା ଲକ୍ ବାଟ୍ପାଲି ବସି ବିକ୍ ମାଙ୍ଗ୍‌ଡେରଇଲା । ୪୮ ନାଜରିତର୍ ଜିସୁ ଏବାଟେ ଆଇଲାନି ବଲି ସୁନି, ସେ ବେସି ଆଉଲି ଅଇକରି କଇଲା, “ଏ ଦାଉଦର୍ ପଅ ଜିସୁ, ମକେ ଦୟାକରା !”

୪୮ ବେସି ଲକ୍‌ମନ୍ ତାକେ ଚିମ୍‌ରାଉଅଇ ରଇବାକେ କଇଲାଇ, ମାତର୍ ସେ କାଣାଲକ୍ ଅଦିକ୍ ଅଦିକ୍ ଆଉଲିଅଇକରି କଇଲା, “ଏ ଦାଉଦର୍ ପଅ ! ମକେ ଦୟା କରା ।”

୪୯ ଜିସୁ ତେବିକରି କଇଲା, “ତାକେ ମର୍ ଲଗେ ଆଇବାକେ କୁଆ ।” ଲକ୍‌ମନ୍ କାଣାକେ ଡାକିକରି କଇଲାଇ, “ସାଆୟ୍ ଦାରିକରି ଉଟ୍, ଜିସୁ ତକେ ଡାକ୍‌ଲାନି ।”

୫୦ କାଣା ଲକ୍ ତାର୍ ଚାଦର୍ ତେଇ ପିଙ୍ଗିଦେଇକରି ଚିକାଲ୍‌ନା ତେଗଇ ଉଟ୍‌ଲା ଆରି ଜିସୁର୍ ଲଗେ ଗାଲା ।

୫୧ ଜିସୁ ତାକେ ପାଗାରଲା “ମୁଇ ତର୍ପାଇ କାଇଟା କରବି ବଲି ତୁଇ ମନ୍ କଲୁସ୍‌ନି ?” ସେ କଇଲା, “ଏ ଗୁରୁ, ମୁଇ ଜେଡ଼ିକି ଦେକି ପାର୍‌ବି ସେଟା ମନ୍ କଲିନି ।”

୫୨ ଜିସୁ ତାକେ କଇଲା, “ଜା, ତୁଇ ନିମାନ୍ ଅଇଜାଇ ଆରୁସ୍ । କାଇକେବଇଲେ ତୁଇ ମକେ ବିସ୍‌ବାସ୍ କରି ଆଁକି ଦେକି ପାର୍‌ଲୁସ୍‌ନି ।” ସେଦାପ୍‌ରେସେ କାଣା ଆଁକି ଦେକି ବାଟେ ବାଟେ ଜିସୁର୍ ପଟେ ଜିବାର୍ ଦାର୍‌ଲା ।

୧୧

ଜିସୁ ଡାକ୍‌ପୁଟାଅଇ ଜିରୁସାଲାମ୍ କେଟ୍‌ଲା

(ମାତିଉ ୨୧:୧-୧୧; ଲୁକ୍ ୧୯:୨୮-୪୦; ଜଅନ୍ ୧୨:୧୨-୧୯)

୧ ଜିସୁ ଆରି ତାର୍ ସିସ୍ତମନ୍ ଜିରୁସାଲାମ୍ ଲଗାଲଗି ଅଇକରି ଜିଡ଼ ନାଉର୍ ଡଙ୍ଗର୍‌ଲଗେ ରଇଲା ବେଟ୍‌ପାଗି ଆରି ବେଡ଼ିନିଆ ନାଉର୍ ଗାର୍ କେଟ୍‌ଲାଇ । ଜିସୁ ସିସ୍ତମନ୍ ବିଡ଼ରେଅନି ଦୁଇଲକ୍‌କେ ଡାକିକରି ସେମନ୍‌କେ କଇଲା, ୨ ତମେ ଆମର୍ ମୁଆଟେ ରଇଲା

ଗାଏଁ ଜା । ତମେ ଗାଉଁ ବିତ୍ତରେ ଜିବାବେଲେ, ଗଟେକ୍ ଗଦ ପିଲା ବାନ୍ଧିରଇଲାଟା ଦେକ୍‌ସା । ସେ ଗଦ ପିଲାର ଉପରେ ଏବେଜାକ କେ ମିସା ଚଗଡ଼ ନାଈ । ତାକେ ମେଲିକରି ମରଲଗେ ଦାରିଆସା । ^୩ ଜଦି କେ ତମକେ କାଇକେ ମେଲିକରି ନେଲାସ୍‌ନି ? ବଲି ପାଟାରଲେ, ମାପ୍‌ରୁକେ ଦରକାର ଆଟେ ଆରି ସେ ତମକେ ଦାପ୍‌ରେସେ ବାଉଡ଼ାଇଦେଇସି । ବଲି ସେମନ୍ ଜିବା ଆଗ୍‌ତୁ ସେମନ୍‌କେ ପାଟାଇଦେଲା ।

^୪ ସେ ଗାଏଁ ଗାଲାଈ ଜେ ଗଟେକ୍ ଗରର୍ ତାଣ୍ଡୁର୍ ତିଆଗଡ଼ିଲଗେ ଗଦ ପିଲା ବାନ୍ଧିଅଇ ରଇଲାଟା ଦେକିକରି ତାକେ ଜାଇ ମେଲ୍‌ଲାଈ । ^୫ ତେଇ ଚିଆଅଇରଇଲା କେତେଲକ୍‌ମନ୍ କଇଲାଈ, “ତମେ କାଇଟା କଲାସ୍‌ନି ? ଆରି କାଇକେ ଏ ଗଦ ପିଲାକେ ମେଲ୍‌ଲାସ୍‌ନି ?”

^୬ ସେମନ୍‌କେ ଜିସୁ ଜେନ୍ତି କଇବାକେ କଇରଇଲା, ସେନ୍ତାରିସେ ସିସ୍‌ମନ୍ ଲକ୍‌ମନ୍‌କେ କଇଲାଈ । ତାର୍‌ପଟେ ସେ ଲକ୍‌ମନ୍ “ଗଦ ପିଲାକେ ନିଆ ।” ବଲି କଇଲାଈ ।

^୭ ସେମନ୍ ଗଦ ପିଲାକେ ଜିସୁର୍ ଲଗେ ଆନ୍‌ଲାଈ ଆରି ନିଜର୍ ନିଜର୍ ପଟିଆମନ୍ ଗଦ ପିଲାର୍ ପିଟି ଉପ୍‌ରେ ପାକାଇଲାଈ । ଆରି ଜିସୁ ଗଦ ଉପ୍‌ରେ ବସ୍‌ଲା । ^୮ ବେସି ଲକ୍‌ମନ୍ ଜିସୁକେ ସନ୍‌ମାନ୍ ଦେବାକେ ନିଜର୍ ନିଜର୍ ପଟିଆମନ୍ ବାଟେ ଅଟାଇଦେଲାଈ ଆରି ବିନ୍‌ଲକ୍‌ମନ୍ ଗରର୍ ତାଲ୍‌ପତର୍ ଆରି କେନ୍‌ମାମନ୍ କାଟିଆନିକରି ବାଟେ ଅଟାଇଦେଲାଈ । ^୯ ଜିସୁର୍ ଆଗ୍‌ତୁବାଟେ ଆରି ପର୍‌ବାଟେ ଜିବା ଲକ୍‌ମନ୍ ବେସି ଆଉଲିଅଇ ଏକ୍ତି କଇତେରଇଲାଈ, “ଅସାନା, ପର୍‌ମେସର୍‌କେ ଡାକ୍‌ପୁଟା କରା । ପର୍‌ମେସର୍ ତାକେ ଆସିର୍‌ବାଦ୍ କଲାଆଟେ । ^{୧୦} ଆମର୍ ଆନିଦାଦି ଦାଉଦ୍ ରାଜାର ରାଇଜ୍ ଆଇଲାନି, ତାର୍ ରାଇଜ୍ ପର୍‌ମେସର୍ ଆସିର୍‌ବାଦ୍ କର । ସର୍‌ଗେ ରଇବା ବାବା ପର୍‌ମେସର୍ ସନ୍‌ମାନ୍ ପାଇଲାପାରା କାତା କୁଆ” ବଲି କଇଲାଈ ।

^{୧୧} ତାର୍‌ପଟେ ଜିସୁ ଜିରୁସାଲାମ୍ ଆସିକରି ପର୍‌ମେସର୍‌ର ଗର୍ ବିତ୍ତରେ ପୁରଲା । ଆରି ଚାରିବେଡ଼ିତି ରଇଲା ସବୁ ଜିନିସ୍‌ମନ୍ ନିମାନ୍ କରି ଦେକ୍‌ଲା । ସେ ବେଲା ବେସି ଅଲ୍‌ସ୍‌ମ୍ ଅଇଗାଲାଜେ, ସେ ବାରଟା ସିସ୍‌ମନ୍‌ର ସଙ୍ଗ୍ ବେଡ଼ିନିଆ ନାଉଁର୍ ଗାଏଁ ଉଟିଜାଇକରି ତେଇ ରଇଲା ।

ଜିସୁ ତୁମ୍ଭର ଗର୍ବକେ ସାଇପଦେଲା
(ମାତିଉ ୨୧:୧୮-୧୯)

୧୨ ତାର୍ ଆରକର୍ ଦିନେ ଜିସୁ ଆରି ତାର୍ ସିସମନ୍ ବେଡନିଆଇଅନି ଜିରୁସାଲାମ୍ ଆଇବାବେଲେ ଜିସୁକେ ବେସି ବୁକ୍ କଲା । ୧୩ ଜିସୁ ଦୁରିକେ ଅନି ବେସି ପତର୍ ରଇବା ଗଟେକ୍ ତୁମ୍ଭରିଗର୍ ଦେକଲା । ଆରି ସେ ଗଟେ କେତେଟା ପଲ୍ ଦାରିରଇସି ବଲି ବାବିକରି ଗର୍ବୁନ୍ଦେ ଗାଲା । ମାତର୍ ଗର୍ଲଗେ ଜାଇକରି ଦେକଲାଜେ, ଗଟେକ୍ ମିସା ପଲ୍ ମିଲେ ନାଇ । କାଇକେବଇଲେ, ସେଟା ତୁମ୍ଭରିପଲ୍ ଦାରବା ଦିନ୍ ନ ରଇଲା । ୧୪ ଜିସୁ ଗର୍ବକେ କଇଲା, “ତୁଇ ଆରି କେବେ ମିସା ପଲ୍ ନ ଦାରୁସ୍ ।” ସେ କାତା ତାର୍ ସିସମନ୍ ସୁନ୍ଲାଇ ।

ଜିସୁ ଜିରୁସାଲାମର୍ ପାରତନା ଗର୍ ପରିଚଲ୍ କଲା
(ମାତିଉ ୨୧:୧୨-୧୭; ଲୁକ୍ ୧୯:୩୯-୪୮; ଜଅନ୍ ୨:୧୩-୨୨)

୧୫ ତାର୍ପଟେ ଜିସୁ ଜିରୁସାଲାମର୍ ଗଡେ ଜାଇ, ମନ୍ଦିରେ ପୁରିକରି ତେଇ ଗେନାବିକା କର୍ବା ଲକ୍ମନକେ ଡାଣ୍ଡେ ବାରକରାଇଦେଲା । ବିନ୍ ଦେସର୍ ତାବୁ ବାଦ୍ଲାଇବା ଲକ୍ମନର୍ ଟେବୁଲ୍ ଆରି ବିରୁ କର୍ବା ପରୁଆ ବିକ୍ବା ଲକ୍ମନର୍ ବସବା ପିଡା ପାସଲାଇ ପାକାଇଲା । ୧୬ ମନ୍ଦିରର୍ ଡାଣ୍ଡେ ଗେନା ବିକା କର୍ବାକେ ସେ କାକେମିସା ଦେଏ ନାଇ । ୧୭ ତାର୍ ପଟେ ସେ ଲକ୍ମନକେ ସିକାଇଦେବାବେଲେ ଏନ୍ତି କଇଲା,

“ମର୍ ମନ୍ଦିର୍ ସବୁ ଜାତିର୍ ଲକ୍ମନର୍ ପାରତନା ଗର୍ ବଲି ନାମ୍ବାଇ ବଲି ପର୍ମେସରର୍ ବଇଟାନେ ଲେକା ଅଇଆଟେ,
ମାତର୍ ତମେ ସେ ଗର୍ ଚର୍ମନର୍ ପାଆର୍ କରାଆସ୍ ।”

୧୮ ତେଇ ମୁକିଅ ପୁଜାରିମନ୍ ଆରି ନିୟମ୍ ସିକାଉମନ୍ ଏ କାତା ସୁନି, ଜିସୁକେ କେନ୍ତି ମରାଇବାର୍ ଅଇସି ବଲି ଚେସଟା କର୍ତେରଇଲାଇ । ମାତର୍ ଲକ୍ମନକେ ଡର୍ତେରଇଲାଇ । କାଇକେବଇଲେ ଲକ୍ମନ୍ ସେ ସିକାଇଦେବା ବିସଇ କାବା ଅଇକରି ବେସି ମନ୍ କରି ସୁନ୍ତେରଇଲାଇ ।

୧୯ ଆରି ସେଦିନର୍ ସଞ୍ଜ ଅଇଲାକେ ଜିସୁ ଆରି ତାର୍ ସିସମନ୍ ଜିରୁସାଲାମ୍ ନଅରେଅନି ବାରଇକରି ଉଟିଗାଲାଇ ।

ତୁମ୍ଭର ଗର୍ବତେଜ ଅନି ସିକିଆ (ମାତିଉ ୨୧:୨୧-୨୨)

^{୨୦} ତାରୁ ଆରକର ଦିନରୁ ସାକାଲେ ବାଉଡ଼ି ଆଇବାବେଲେ, ଏଦେ ଦେକା ! ସେ ତୁମ୍ଭର ଗର୍ବ ବୁଦ୍ଧେଅନି ଚିପେଜାକ ସୁକି ଜାଇରଇଲାଟା ଦେକ୍‌ଲାଇ । ^{୨୧} ସେବେଲା ଜିସୁ ଆଗତୁ କଇରଇଲା କାତା ପିତର ଏତାଇକରି ତାକେ କଇଲା, “ଏ ଗୁରୁ ଜନ୍ ତୁମ୍ଭର ଗର୍ବକେ ତମେ ସାଇପ୍ ଦେଇରଇଲାସ୍, ସେ ଗର୍ ସୁକିଗାଲା ଆଚେ ।”

^{୨୨} ଜିସୁ ସେମନ୍‌କେ କଇଲା, “ତମେ ପରମେସରର ତେଜ ବିସ୍‌ବାସ୍ କରିରୁଆ । ^{୨୩} ଶୁଭ ତମ୍ଭକେ ସତ୍ କାତା କଇଲିନି, ଜେ ନିଜର ମନେ ଅଇସି କି ନଏ ବଲିକରି ଏନେ ତେନେ ନ ଅଇ, ସେ କଇବା କାତାଇ ବିସ୍‌ବାସ୍ କରି, ‘ଏ ତଙ୍ଗର ଉଲଟିକରି ସମ୍‌ଦୁରେ ଜାଇ ଅଦର୍ ।’ ବଲି କଇଲେ ସେଟା ସେନ୍ତାରି ଅଇସି । ^{୨୪} ସେଟାରପାଇ ମୁଇ ତମ୍ଭକେ କଇଲିନି, ତମେ ପାର୍‌ତନାଇ ଜନ୍‌ଟା ମିଲ୍‌ସି ବଲି ବିସ୍‌ବାସ୍ କରି ମାଙ୍ଗ୍‌ଲେ, ସେଟା ତମ୍ଭକେ ମିଲ୍‌ସି । ^{୨୫} ଶୁଭାତରୁ ତମେ ପାର୍‌ତନା କର୍‌ବା ବେଲେ ତମ୍ଭର ମନେ କାର୍ ବିରଦେ ମିସା କାଇ କାତା ରଇଲେ, ତାକେ କେମା ଦିଆସ୍ । ଏନ୍ତି କଲେ ତମ୍ଭର ସରଗର୍ ବାବା ମିସା ତମ୍ଭକେ ତମ୍ଭର ପାପେଅନି କେମା ଦେଇସି । ^{୨୬} ମାତରୁ ତମେ କେମା ନ କଲେ, ତମ୍ଭର ସରଗର୍ ବାବା ମିସା ତମ୍ଭକେ କେମା ନ ଦେଏ ।” *

ଜିସୁର ଅଦିକାର ବିସଇନେଇ ପର୍‌ସନ୍ (ମାତିଉ ୨୧:୨୩-୨୭; ଲୁକ୍ ୨୦:୧-୮)

^{୨୭} ସେମନ୍ ଆରିତରେକ୍ ଜିରୁସାଲାମେ ଆଇଲାଇ । ଜିସୁ ମନ୍ଦିରର ଦୁଆରେ ବୁଲ୍‌ବାବେଲେ ମୁକିଅ ପୁଜାରିମନ୍, ନିୟମ୍ ସିକାଉମନ୍ ଆରି ପାର୍‌ଚିନ୍‌ମନ୍ ତାରୁ ଲଗେ ଆସି ପାଚାରୁଲାଇ, ^{୨୮} “ତୁଇ କାଇ ଅଦିକାରେ ଏ ସବୁ କାମ୍‌ମନ୍ କଲୁସିନି ? ଆରି ଏ ସବୁ କାମ୍‌ମନ୍ କର୍‌ବାକେ ତକେ କେ ଅଦିକାର ଦେଲାଆଚେ ?”

^{୨୯} ମାତରୁ ଜିସୁ ସେମନ୍‌କେ କଇଲା, “ମୁଇ ମିସା ତମ୍ଭକେ ଏକାଇ ଗଟେକ୍ ସେ ପର୍‌ସନ୍ ପାଚାରୁବି, ସେ ପର୍‌ସନ୍‌ର ଉତରୁ ତମେ

☆ **୧୧:୨୩** ୧୧:୨୩ ମାତିଉ ୧୭:୨୦; ୧ମ କରନ୍ତ୍ରିୟ ୧୩:୨ ☆ **୧୧:୨୫** ୧୧:୨୫ ମାତିଉ

୬:୧୪,୧୫ * **୧୧:୨୭** ୧୧:୨୭ କେତକ୍ ପୁରନା ଲେକାଇ ଏ ପଦ୍ ନାଇ

କଲିଲେ, ମୁଁ ଏ ସବୁ କାମ୍ କନ୍ ଅଦିକାରେ କଲିନି, ସେଟା ତମ୍ଭେ କଲବି । ^{୩୦} ଜଅନ୍ ତୁବନ୍ ଦେବା ଅଦିକାର୍ ସରଗର୍ ପର୍ମେସରଗ୍ଟାନେଅନି ଆସିରଇଲା କି ଲକ୍ମନର୍ ଟାନେଅନି ଆସିରଇଲା ? ଏଟା ମକେ କୁଆ ।” ବଲି କଇଲା ।

^{୩୧} ତେଇ ସେମନ୍ ନିଜର୍ ନିଜର୍ ବିତ୍ତରେ କୁଆବଲା ଅଇଲାଇ, “ଆମେ ଜଦି ସରଗର୍ ପର୍ମେସରର୍ ଟାନେଅନି ବଲି କଇବୁ ବଇଲେ, ସେନ୍ତାର୍ ଆଲେ ତମେ ଜଅନ୍ ଜନ୍ତା କଇଲା ସେଟା କାଇକେ ବିସ୍ବାସ୍ କରାସ୍ ନାଇ ? ବଲିକରି ଜିସୁ ଆମ୍ଭେ କଇସି । ^{୩୨} ମାତର୍ ଲକ୍ମନର୍ଟାନେଅନି ବଲି କଇବାକେ ଆମ୍ଭେ ତର୍ ଲାଗ୍ଲାନି । କାଇକେ ବଇଲେ ଜଅନ୍ ଗଟେକ୍ ବବିସ୍ତବକ୍ତା ବଲି ସେମନ୍ ସବୁଲକ୍ ବିସ୍ବାସ୍ କଲାଇନି ।” ^{୩୩} ସେଟାର୍ପାଇ ସେମନ୍ ଆମେ ନାଜାନୁ । ବଲି ଜିସୁକେ କଇଲାଇ । ତାର୍ପତେ ଜିସୁ ସେମନ୍କେ କଇଲା, “ଏନ୍ତି ବଇଲେ ମୁଁ ମିସା କନ୍ ଅଦିକାରେ ଏସବୁ କାମ୍ କଲିନି, ସେଟା ତମ୍ଭେ ନ କଇ ।”

୧୨

ଅଙ୍ଗୁର ଚାସ୍ ଆରି ଆଦିବାଗ୍ କର୍ବା ଚାସିମନ୍

(ମାତିଡ ୨୧:୩୩-୪୬; ଲୁକ୍ ୨୦:୯-୧୯)

^୧ ତାର୍ପତେ ଜିସୁ ଲକ୍ମନକେ ବୁଜାଇବାକେ କେତେଟା କାତାନି କଇବାର୍ ଦାରଲା । ପର୍ତୁମ୍ କାତାନି ଅଇଲାନି, ଗଟେକ୍ ଲକ୍ ଗଟେକ୍ ଅଙ୍ଗୁରବାଡ୍ ତିଆରକରି, ତାର୍ ଚାରିବେଡ୍ଡି ବାଡ୍ ବୁନ୍ଲା, ଆରି ଅଙ୍ଗୁର ପିଲବାକେ ଗଟେକ୍ କୁଣ୍ଡ ତିଆରକଲା । ବାଡ୍ ଜାଗ୍ବାକେ ଗଟେକ୍ ଚାଙ୍ଗ୍ ତିଆରକଲା । ଚାସ୍ କର୍ବା ଲକ୍ମନକେ ବାଡ୍ ଆଦିବାଗ୍ କର୍ବାକେ ଦେଇକରି, ସେ ଗଟେକ୍ ବିନ୍ ଦେସେ ଡିଟିଗଲା । ^୨ ତାର୍ପତେ ଅଙ୍ଗୁର ତଲ୍ବା ବେଲା ଆଇଲାକେ, ସାଉକାର୍ ତାର୍ ଗଟେକ୍ ଗତିଦାଙ୍ଗ୍ଡାକେ ଅଙ୍ଗୁରପଲର୍ ବାଗ୍ ବାଟା ପାଇବାକେ ଚାସିମନ୍ରଲଗେ ପାଟାଇଲା । ^୩ ମାତର୍ ଚାସି ଲକ୍ମନ୍, ସାଉକାର୍ ପାଟାଇଲା ଗତିଦାଙ୍ଗ୍ଡାକେ ଦାରିକରି ମାରିପାଇଲାଇ ଆରି କାଉଟା ନ ଦେଇ ରୁଟା ଆତେ ପାଟାଇଦେଲାଇ । ^୪ ସାଉକାର୍ ତାର୍ ଆରିଗଟେକ୍ ଗତି ଦାଙ୍ଗ୍ଡାକେ ଚାସିମନ୍ର ଲଗେ ପାଟାଇଲା । ଚାସି ଲକ୍ମନ୍ ସେ ଗତିଦାଙ୍ଗ୍ଡାକେ ମିସା ମୁଣ୍ଡ ପୁଟେ ମାରଲାଇ

ଆରି ଇଜଡ଼ ଜିକ୍‌ଲାଇ । ୫ ସାଉକାର୍ ଆରି ଗଟେକ୍ ଗଡ଼ିଦାଙ୍ଗ୍‌ଡାକେ ପାଟାଇଲା ଜେ, ଚାସିଲକ୍‌ମନ୍ ତାକେ ମର୍ତ୍ତେ ମାରିଦେଲାଇ । ତାର୍‌ପଟେ ସାଉକାର୍ ଆରି ଗାଦି ଗଡ଼ିଦାଙ୍ଗ୍‌ଡାମନ୍‌କେ ପାଟାଇଲା ଜେ କେତେଟା ଗଡ଼ିଦାଙ୍ଗ୍‌ଡାମନ୍‌କେ ମାର୍‌ଲାଇ ଆରି କେତେଟାକେ ମର୍ତ୍ତେ ମାରିପାକାଇଲାଇ । ୬ ଏବେ ସାଉକାର୍‌ର ଲଗେ ଗଟେକ୍ ଲକ୍‌ସେ ରଇଲା, ତାର୍ ନିଜର୍ ଆଲାଦର୍ ପିଲା । ମର୍ ପିଲାକେ ଚାସିଲକ୍‌ମନ୍ ନାମବାଇ ଆକା ଆରି ମର୍ ବାଗ୍ ପାଟାଇଦେବାଇ । ବଲି ବାବିକରି ସେ ସାରାସାରି ତାର୍ ପିଲାକେ ଚାସିମନ୍‌ର ଲଗେ ପାଟାଇଲା । ୭ ମାତର୍ ଚାସିମନ୍ ନିଜର୍ ନିଜର୍ ବିତ୍ତରେ କାତା ଅଇଲାଇ, “ଏ ଲକ୍ ତା ଆମର୍ ସାଉକାର୍‌ର ଗଟେକ୍ ବଲି ପିଲା, ଆସା ଆମେ ଆକେ ମର୍ତ୍ତେ ମାର୍‌ଲେ ଏ ବାଡ଼ ଆମର୍ ଅଇଜାଇସି ।” ୮ ଆରି ଚାସିମନ୍ ସାଉକାର୍‌ର ପିଲାକେ ଦାରିକରି ମର୍ତ୍ତେ ମାରି ଅଙ୍ଗୁର୍ ବାଡ଼ର୍ ସେପାଟେ ପିଙ୍ଗିଦେଲାଇ ।

୯ ଏ କାତାନି କଇସାରାଇଲା ପଟେ, ଜିସୁ ସେମନ୍‌କେ ପାଟାର୍‌ଲା, “ଏନ୍ତି ବଇଲେ ଅଙ୍ଗୁର୍ ବାଡ଼ର୍ ସାଉକାର୍ କାଇଟା କର୍‌ସି ? ସେ ଆସିକରି ଚାସିମନ୍‌କେ ମର୍ତ୍ତେ ମାର୍‌ସି । ଆରି ଅଙ୍ଗୁର୍ ବାଡ଼ ବିନ୍ ଲକ୍‌ମନ୍‌କେ ଆଦିବାଗ୍ କର୍‌ବାକେ ଦେଇସି ।

୧୦ “ଗର୍ ବାନ୍‌ବା ଲକ୍‌ମନ୍ ଜନ୍ ପାକ୍‌ନା ନଏଁ ବଲି ଚାଡ଼ିଲାଇ,
ସେ ପାକ୍‌ନା ମୁକିଆ ପାକ୍‌ନା ଅଇଲା ବଲିକରି
ତମେ ପର୍‌ମେସରର୍ ବଇତେଇ ପଡ଼ାସ୍ ନାଇ କି ?”

୧୧ ଏ ବିସଇ ମାପୁରୁ କରିଆଟେ,
ଏଟା ଆମର୍ ପାଇ କାବାଅଇଜିବା ବିସଇ ।

୧୨ ତେଇ ଜିଉଦି ଲକ୍‌ର୍ ମୁକିଅ ପୁଜାରିମନ୍ ଜିସୁକେ ବାନ୍‌ନେବାକେ ବାଗ୍ କର୍‌ଲାଇ । କାଇକେବଇଲେ ଜିସୁ ଆମର୍ ବିରଦେ ଏ କାତାନି କଇଲାଇନି ବଲିକରି ସେମନ୍ ଜାନିରଇଲାଇ । ମାତର୍ ଲକ୍‌ମନ୍ ଆମକେ କାଇ କାଇଟା କର୍‌ବାଇ । ବଲିକରି ତରି, ତାକେ ଚାଡ଼ିକରି ଉଟିଗାଲାଇ ।

ସିସ୍ତ୍ରୁମାଙ୍ଗୁମନ୍ ବାନ୍‌ବା ବିସଇ ନେଇ ସିକିଆ
(ମାତିଉ ୨୨:୧୫-୨୨; ଲୁକ୍ ୨୦:୨୦-୨୬)

୧୩ ତାରପରେ ଜିସୁକେ ତାର କାତାଇ ବୁଲ୍ ଦାର୍ଦ୍ଦବାକେ ଜିଉଦି ନେତାମନ୍ କେତେଟା ପାରୁସି ଦଲର ଲକ୍ମନକେ ଆରି ଏରଦ୍ ରାଜାର କେତେଟା ଲକ୍ମନକେ ତାର ଲଗେ ପାଟାଇଲା । ୧୪ ସେମନ୍ ଜିସୁର ଲଗେ ଆସିକରି, “ଏ ଗୁରୁ ତମେ ସତ୍ କାତା କଇଲାସ୍ନି ଆରି କାକେ ମିସା ନ ଡରାସ୍, ସବୁ ଲକ୍ମନକେ ସମାନ୍ ଇସାବେ ଦେକ୍ଲାସ୍ନି ବଲି ଆମେ ଜାନିଆରୁ । କାଇକେବଇଲେ ତମେ ଲକ୍ମନର ଇସାବେ ନାଇ, ମାତର ସତ୍ ବାବେ ସିକାଇଲାସ୍ନି । ଏବେ ଆମ୍ଭକେ କୁଆ, ରମିଅ ରାଜାକେ ସିସ୍ତୁ ଦେବାଟା ନିୟମ୍ କି ନାଇ ?”

୧୫ “ଆମେ ସିସ୍ତୁ ବାନ୍ଦୁ କି ନାଇ ?” ଜିସୁ ସେମନର ମନ୍ଦିତ୍ତରର କୁଟ୍ କାତା ବୁଜିକରି ସେମନକେ କଇଲା, “କାଇକେ ତମେ ମକେ ପାନ୍ଦେ ପାକାଇବାକେ ଚେସ୍ଟା କଲାସ୍ନି ? ରମିୟ ସର୍କାରର ଗଟେକ୍ ଅଦ୍ଲି ତାରୁ ମର୍ ଲଗେ ଆନା, ମୁଇ ସେଟା ଦେକ୍ବି ।” ୧୬ ସେମନ୍ ଗଟେକ୍ ଅଦ୍ଲି ତାରୁ ଆନଲାଇକେ ଜିସୁ ପାଟାରୁଲା, “ଏ ତାରୁ ଉପରେ କାର୍ ମୁର୍ତ୍ତି ଆରି ନାଉଁ ଲେକା ଅଇଆଟେ ?” ସେମନ୍ କଇଲା, “ରମିୟ ରାଜାର ମୁର୍ତ୍ତି ଆରି ତାର ନାଉଁ ଲେକା ଅଇଲାଆଟେ ।”

୧୭ ଜିସୁ କଇଲା, “ଏନ୍ତି ବଇଲେ ଜନ୍ଟା ରମିୟ ରାଜାର, ସେଟା ରମିୟ ରାଜାକେ ଆରି ଜନ୍ଟା ପର୍ମେସରର, ସେଟା ପର୍ମେସରକେ ଦିଆସ୍ ।” ଏ କାତା ସୁନିକରି ସେମନ୍ କାବା ଅଇଗାଲା ।

ମଲାଟାନେଅନି ଉର୍ଦ୍ଦବା ବିସଇ

(ମାତିଉ ୨୨:୨୩-୩୩; ଲୁକ୍ ୨୦:୨୭-୪୦)

୧୮ ✱ତାରପରେ ମଲାଟାନେଅନି ଉର୍ଦ୍ଦବା ବିସଇ, ବିସ୍ବାସ୍ ନ କରବା ସାଦୁକି ଦଲର ଲକ୍ମନ ଜିସୁର ଲଗେ ଆସିକରି ଏ ପର୍ସନ୍ ପାଟାରୁଲା । ୧୯ “ଏ ଗୁରୁ, ଜିଦି ଗଟେକ୍ ଲକ୍ ବିବାଅଇକରି ପିଲାଜିଲା ନ ଅଇତେ ମରିଜାଇସି ବଇଲେ, ତାର ବାଇ ସେ ମାଇଜିକେ ବିବାଅଇ ପିଲାଜିଲା ପାଇବାର୍ ଆଟେ । ଏନ୍ତି କଲେ ମରିଗାଲା ବାଇର୍ ପାଇ ସେ ପିଲାଟକିମନ୍ ତାର ନାଉଁ ଦାର୍ଦ୍ଦବାଇ ବଲି ମସା ଆମର୍ପାଇ ନିଅମ୍ ଲେକିଦେଲା ଆଟେ । ୨୦ ଏନ୍ତି ସାତ୍

ବାଇ ରଇଲାଇ, ସବୁରଟାନେଅନି ବଡ଼ ବାଇ ବିବା ଅଇଲା । ମାତର ପିଲାଟକି ନ ଅଇତେ ମରିଗାଲା ।^{୨୧} ସେଟାରପାଇ ତାର ପତର ବାଇ ସେ ମାଇଜିକେ ସଙ୍ଗଇଲା । ସେ ମିସା ପିଲାଟକି ନଇତେ ମରିଗାଲା । ତାରପତର ବାଇ ମିସା ବିବା ଅଇ ପିଲାଟକି ନଇତେ ମରିଗାଲା ।^{୨୨} ସାଡ଼ବାଇ ଜାକ ସେ ମାଇଜିକେ ଗଟେକ୍ ଲକର୍ ପତେ ଗଟେକ୍ ଲକ୍ ବିବା ଅଇରଇଲାଇ । ସାରାସାରି ସାଡ଼ ବାଇ ଜାକ ପିଲାଟକି ନ ଅଇତେ ମରିଗାଲାଇ । ତାରପତେ ସେ ମାଇଜି ମିସା ମରିଗାଲା ।^{୨୩} ସାଡ଼ବାଇ ଜାକ ତାକେ ବିବା ଅଇରଇଲାଇ, ତେବେ ମରିକରି ଉଟଲା ବେଲେ, ସେ କାର୍ ମାଇଜି ଅଇସି ? ସାଡ଼ବାଇ ଜାକ ତାକେ ବିବା ଅଇରଇଲାଇ ।”

^{୨୪} ଜିସୁ ସେମନ୍‌କେ କଇଲା, “ଦରମ୍ ସାସ୍‌ତରେ ପର୍‌ମେସରର୍ କାଇଟା ଲେକା ଅଇଲା ଆଚେ ସେ ବିସଇ, ଆରି ତାର ବପୁର୍ ବିସଇ ତମେ ନାଜାନି କରି ବୁଲ୍ ବାବ୍‌ଲାସ୍‌ନି ।^{୨୫} ଜେଡେବେଲେ ଲକ୍‌ମନ୍ ମରିକରି ଆରି ତରେକ୍ ଉଟ୍‌ବାଇ, ସେବେଲେ ମୁନ୍‌ସ୍‌ପିଲାମନ୍ ବିବା ନ ଅଅଡ଼, କି ମାଇଜି ଟକିମନ୍‌କେ ବିବା ଅଇବାକେ ନ ଦେଅଡ଼ । ସେମନ୍ ସବୁଲକ୍ ସରଗର୍ ଦୁଡ଼ପାରା ଅଇବାଇ ।^{୨୬} ମଲାଟାନେଅନି ଉଟ୍‌ବା ବିସଇ ମସା ଲେକ୍‌ଲା ବଇଟାନେ ପଡ଼ାସ୍ ନାଇ କି ? ପର୍‌ମେସର ଜଇଲାଗ୍‌ବା ବୁଟାଇ ମସାକେ ଦେକାଇରଇଲାଜେ, ‘ମୁଇ ଅବରାଆମର୍, ଇସାକର୍ ଆରି ଜାକୁବର୍ ପର୍‌ମେସର୍ ।’ ବଲି କଇଲାଟା, ଲେକା ଅଇଲାଆଚେ । ମାତର୍ ଏ ଲକ୍‌ମନ୍ ସବୁ ମରିଗାଲାଇ ଆଚଡ଼ ।^{୨୭} ପର୍‌ମେସର୍ ମଲାଲକ୍‌ମନ୍‌ର୍ ମାପୁରୁ ନର୍ଏ । ସେ ଜିବନ୍ ରଇଲା ଲକ୍‌ମନ୍‌ର୍ ମାପୁରୁ । ଏ ବିସଇ ତମେ ବେସି ବୁଲ୍ ବୁଜ୍‌ଲାସ୍‌ନି ।” ବଲି କଇଲା ।

କନ୍ ଆଦେସ୍ ବେସି ମୁକିଅ

(ମାତିଉ ୨୨:୩୪-୪୦; ଲୁକ୍ ୧୦:୨୫-୨୮)

^{୨୮} ଜିସୁ ଆରି ସାଦୁକି ଦଲର୍ ଲକ୍‌ମନ୍ ଦଦା ପେଲା ଅଇବାବେଲେ ଗଟେକ୍ ନିୟମ୍ ସିକାଉ ତାର ଲଗେ ଆଇଲା । ଜିସୁ ଲକ୍‌ମନ୍‌ର୍ ପର୍‌ସନ୍‌ର୍ ଉତର୍ ନିମାନ୍‌ସଙ୍ଗ୍ କଇବାଟା ସୁନିକରି, ତାକେ ପାଟାରଲା, “କନ୍ ଆଦେସ୍ ସବୁରଟାନେଅନି ଅଦିକ୍ ମୁକିଅ ?”

୨୯ ଜିସୁ କଇଲା, “ସବୁରଟାନେଅନି ପରତୁମର ମୁକିଅ ଆଦେସ୍ ଅଇଲାନି, ସୁନା ଏ ଇସରାଏଲର ଲକ୍ଷମନ୍ ମାପରୁ ଆମର ପରମେସର୍ ଗଟେକ୍ ସେ ମାପରୁ । ୩୦ ତମେ ତମର ପୁରାପୁରୁନ୍ ମନ୍ ସଙ୍ଗ୍, ପୁରାପୁରୁନ୍ ଆତ୍ମା ସଙ୍ଗ୍, ପୁରାପୁରୁନ୍ ଚିନ୍ତାର ସଙ୍ଗ୍ ଆରି ପୁରାପୁରୁନ୍ ବପୁସଙ୍ଗ୍ ତାକେ ଆଲାଦ୍ କରବାର୍ ଆତେ । ୩୧ ଆରି ପରର୍ ମୁକିଅ ଆଦେସ୍ ଅଇଲାନି, ତମେ ନିଜ୍ଜକେ ଆଲାଦ୍ କଲାପାରା ପଡ଼ିସାର୍ ଲକ୍ଷକେ ମିସା ଆଲାଦ୍ କରା । ଏ ଦୁଇଟା ଆଦେସ୍ ଚାଡ଼ିକରି ଆରି କାଇ ମିସା ମୁକିଅ ଆଦେସ୍ ନାଇ” ବଲି କଇଲା ।

୩୨ ଏ କାତା ସୁନି ସେ ଲକ୍ଷ ଜିସୁକେ କଇଲା, “ଏ ଗୁରୁ, ପରମେସର୍ ଗଟେକ୍ ସେ, ତାକେ ଚାଡ଼ିଦେଲେ ଆରି କେ ମିସା ନାଇ । ଏ କାତା ତମେ ଟିକ୍ ବାବେ କଇଆଚାସ୍ । ୩୩ ପରମେସର୍କେ ସବୁ ମନ୍ଦେଇକରି ସବୁ ଚିନ୍ତା ଦେଇକରି ଆରି ସବୁ ବପୁ ଦେଇ ଆଲାଦ୍ କରବାର୍ ଆତେ ଆରି ନିଜ୍ଜକେ ଆଲାଦ୍ କଲା ପାରା ବିନ୍ ଲକ୍ଷକେ ମିସା ଆଲାଦ୍ କରବାର୍ ଆତେ ବଲିକରି ତମେ କଇଲା କାତା ଟିକ୍ ସେ । ଆମେ ପରମେସର୍କେ ଜେଡେକ୍ ଅମ୍ କଲେ ମିସା ଆରି ଜେଡେକ୍ କାଇଟା ପୁଜ୍ଲେ ମିସା, ଏ ଦୁଇଟା ଆଦେସ୍ ବେସି ମୁକିଅ ।” ବଲି କଇଲା । ୩୪ ✨ସେଲକ୍ ବେସି ବୁଦି ସଙ୍ଗ୍ ଉତର୍ ଦେଲା ଆତେ ବଲି ଜିସୁ ଦେକି, ତାକେ କଇଲା, “ତୁଇ ପରମେସର୍ ରାଇଜେ ପୁର୍ବା ଲଗେସେ ଆରୁସ୍ ।” ତାର୍ପତେ ଆରି କେ ମିସା ଜିସୁକେ ପର୍ସନ୍ ପାଚାର୍ବାକେ ସାଆସ୍ କରି ନାପାର୍ଲାଇ ।

ଜିସୁ ଦାଉଦର୍ ପିଲା

(ମାତିଉ ୨୨:୪୧-୪୬; ଲୁକ୍ ୨୦:୪୧-୪୪)

୩୫ ଜିସୁ ଜିଉଦିମନ୍ ରୁଣ୍ଡବା ଗରର୍ ତାଣ୍ଡେ ସିକିଆ ଦେବାବେଲେ ଲକ୍ଷମନ୍କେ ପାଚାର୍ଲା, “ପରମେସର୍ ବାଟିକରି ପାଟାଇଲା ରାଜା ଦାଉଦର୍ ନାତିତିତ ବଲିକରି ନିୟମ୍ ସିକାଇଦେବା ଲକ୍ଷମନ୍ କେନ୍ତି କଇଲାଇନି ?” ୩୬ ଦାଉଦ୍ ସୁକଲ୍ ଆତ୍ମାଲ ଅନି ଏନ୍ତି କଇଲା, ପରମେସର୍ ମର ମାପରୁକେ କଇଲା, “ମୁଇ ତର୍ ସତ୍ତରୁମନ୍କେ ତର୍ ପାଦ୍ ତଲେ ନ ଆନ୍ବା ଜାକ ତୁଇ ମର୍ ଉଜାଆତ୍ବାଟେ ବସି ର ।”

୩୭ “ଜିଦି ଦାଉଦ୍ ରାଜା ନିଜେ ମାପରୁବଲି କଇରଇଲା ବଇଲେ ପରମେସର୍ ବାଟିକରି ପାଟାଇରଇବା ମସିଅ କେନ୍ତି ଦାଉଦ୍ ପିଲା ଅଇସି ?” ତେଇ ରଇଲା ବେସି ଲକ୍ମନ୍ ସାର୍ଦା ସଙ୍ଗ ଏ କାତା ସୁନ୍ଲାଇ ।

ଜିସୁ ନିୟମ୍ ସିକାଉମନ୍‌କେ ଜାଗରତ୍ କରାଇଲା
(ମାତିଉ ୨୩:୩୭; ଲୁକ୍ ୨୦:୪୫-୪୭)

୩୮ ଜିସୁ ଆରି କେତେଟା ବିସଇ ସିକାଇଦେବା ବେଲେ କଇଲା, “ତମେ ନିୟମ୍ ସିକାଇଦେବା ଲକ୍ମନ୍‌ରପାରା ଚଲାଚଲୁତି ନ ଅଇକରି ଜାଗରତ୍ ସଙ୍ଗ ରୁଆ । ସେମନ୍ ସନ୍‌ମାନ୍ ପାଇବାକେ ବେସି ତେଙ୍ଗ ପଟିଆ ପିନ୍ଦିକରି ଏନେ ତେନେ ବୁଲୁବାଇ । ଆଟେ ବାଟେ ଲକ୍ମନ୍‌ରଟାମେଅନି ଜୁଆର୍ ପାଇକରି ସନ୍‌ମାନ୍ ପାଇବାକେ ମନ୍ କର୍‌ବାଇ । ୩୯ ଜିଉଦିମନ୍‌ର ପାରତନା ଗରେ ମୁକିଅ ଜାଗାଇ, ବଜିଟାନର୍ ମୁକିଅ ଜାଗାଇ ବସବାକେ ମନ୍ କର୍‌ବାଇ । ୪୦ ଆରି ସେମନ୍ ରାଣ୍ଡି ମାଇଜିମନ୍‌କେ ନାଡାଇକରି ସେମନ୍‌ର ଦନ୍‌ସିପତି ଜୁରି ନେବାଇ । ସେମନ୍ ନିମାନ୍ ଲକ୍ ବଲିକରି ଦେକାଇଅଇବାକେ ବେସି ପର୍ ପାରତନା କର୍‌ବାଇ । ଏନ୍ତି ଲକ୍ମନ୍‌କେ ପରମେସର୍ ବିନ୍ ଲକ୍ମନ୍‌ରଟାମେଅନି ବେସି ବଡ଼ ତଣ୍ଡ ଦେଇସି ।”

ଗଟେକ୍ ରାଣ୍ଡିମାଇଜିର୍ ଦାନ୍ ଦେବାଟା
(ଲୁକ୍ ୨୧:୧-୪)

୪୧ ଜିସୁ ମନ୍ଦିର୍ ବିତ୍‌ରେ ଜାଇକରି ଚାନ୍ଦାଦେବା ପେଡିଲଗେ ବସିକରି ଲକ୍ମନ୍ ପରମେସର୍‌କେ କେନ୍ତି ଚାନ୍ଦା ଦେଲାଜନି ବଲି ଦେକ୍‌ତେରଇଲା । ସାଉକାର୍ ଲକ୍ମନ୍ ଲଟେକ୍ ଲଟେକ୍ ଡାବୁ ଦେବାଟା ଦେକଲା । ୪୨ ସାରାସାରି ଗଟେକ୍ ଗରିବ୍ ରାଣ୍ଡି ମାଇଜି ଦାନ୍ ଦେବା ପେଡିଲଗେ ଆସିକରି ଦୁଇଟା ସାନ୍ ତାମା କାସୁ ପୁରାଇଦେଲା । ସେ ଦୁଇଟା ଡାବୁର୍ ଦାମ୍ ଗଟେକ୍ ଟାଙ୍ଗାଇ ଅନି ମିସା ଉନା । ୪୩ ତାର୍‌ପଟେ ଜିସୁ ତାର୍ ସିସମନ୍‌କେ ଲଗେ ଡାକି କଇଲା, “ମୁଇ ତମ୍‌କେ ସତ୍ କାତା କଇଲିନି, ଏ ସବୁ ସାଉକାର୍ ଲକ୍ମନ୍ ଦେଲା ଡାବୁତେଇଅନି, ଏ ଅର୍‌କିଡ଼ ରାଣ୍ଡି ମାଇଜି ଅଦିକ୍ ଦେଲାଆଟେ । ୪୪ କାଇକେବଇଲେ ସବୁ ଲକ୍ମନ୍ ସେମନ୍‌କେ ଦର୍‌କାର୍ ଅଇକରି ଅଗଲ୍‌ଲା ଡାବୁ ଦେଲାଆଟତ୍ । ମାତର୍ ଏ

ଗରିବ୍ ରାଣ୍ଡି ମାଇଜି, ସେ ବର୍ତ୍ତବାପାଇ ଜେଡ଼କି ତାରୁ ରଇଲା, ସେ ସବୁ ଦେଲାଆଟେ” ବଲିକରି କଇଲା ।

୧୩

ପାର୍ତନା ଗର୍ ବାଙ୍ଗାଲବା ବିସଇନେଇ ଜିସୁ କଇଲା କାତା
(ମାତିଉ ୨୪:୧-୨; ଲୁକ୍ ୨୧:୫-୬)

^୧ ଜିସୁ, ଜିଉଦିମନର୍ ପାର୍ତନା ଗରେଅନି ବାରଇକରି ଜିବାବେଲେ ତାର୍ ଗଟେକ୍ ସିସ୍ ତାକେ କଇଲା, “ଏ ଗୁରୁ ଏଦେ ଦେକା ! ବଡ଼ ବଡ଼ ପାକ୍ନାଇ ମନ୍ଦିର୍ କେତେକ୍ ସୁନ୍ଦର୍ ଅଇ ତିଆର୍ ଅଇଲାଆଟେ !”

^୨ ଜିସୁ ତାକେ କଇଲା, “ତୁଇ ଏ ବଡ଼ ବଡ଼ ପାକ୍ନାଇ ତିଆର୍ ଅଇଲା ପର୍ମେସରର୍ ଗର୍ ଦେକ୍ଲୁସନି ? ଏ ସବୁ ଗର୍ ନସ୍ତ ଅଇଜାଇସି । ସବୁ ପାକ୍ନାମନ୍ ତୁଲିକରି ମାଟିତେଇ ଏନେତେନେ ଅଇଜାଇସି, ଗଟେକ୍ ପାକ୍ନା ଆରି ଗଟେକ୍ ପାକ୍ନାର୍ ଉପରେ ନ ରଏ ।”

ଜିସୁ ସାରାସାରି ଦିନେ ଗର୍ବା ବିସଇ କଇଲା
(ମାତିଉ ୨୪:୩-୧୪; ଲୁକ୍ ୨୧:୭-୧୯)

^୩ ତାରପରେ ଜିସୁ ପର୍ମେସରର୍ ଗରର୍ ମୁଆଟେ ରଇଲା ଜିଡ଼ ନାଉର୍ ଗର୍ମନ୍ ରଇବା ତଙ୍ଗରେ ବସିରଇଲା । ସେବେଲା ପିତର୍, ଜାକୁବ୍, ଜଅନ୍ ଆରି ଆନ୍ଦ୍ରିୟ୍, କେ ନ ରଇଲାବେଲେ ତେଇ ଆସିକରି ତାକେ ପାଟାରଲାଇ । ^୪ “ଏ ସବୁ ଗର୍ନା କେବେ ଅଇସି ଆରି ସବୁ ଅଇବା ଚିନ୍ମନ୍ କାଇଟା, ଆମ୍ବେ କଇଦେ ।” ବଲି କଇଲାଇ ।

^୫ ଜିସୁ ସେମନ୍କେ କଇଲା, “ତମେ ଜାଗ୍‌ରଡ଼ ଅଇକରି ରୁଆ, ତମ୍ବେ କେ ମିସା ନ ନାଡ଼ାଅଡ଼ । ^୬ କାଇକେବଇଲେ ବେସି ଲକ୍ମନ୍ ମର୍ ନାଉଁ ଦାରି, ସେମନ୍ କିରିସ୍ଟ ବଲି ବେସି ଲକ୍ମନ୍‌କେ ବୁଲ୍‌କାଇବାଇ । ^୭ ମାତର୍ ଜେଡେବେଲେ ତମେ ଜୁଇଦର୍ ବିସଇ ନଇଲେ ଜୁଇଦ୍ ଇତି ଅଇସି ନଇଲେ ସିତି ଅଇସି ବଲିକରି ଲକ୍ମନ୍ କଇବାଟା ସୁନ୍‌ଲେ, କିଲ୍‌ବିଲ୍ ନ ଉଆ । ଏ ସବୁ ଗର୍ନା ଅଇସି, ମାତର୍ ସେଦାପରେ ଆକା ଜୁଗ୍ ସେସ୍ ନଏଁ । ^୮ କାଇକେବଇଲେ, ଗଟେକ୍ ଦେସର୍ ଲକ୍ମନ୍ ଆରି ଗଟେକ୍ ଦେସର୍ ଲକ୍ମନ୍‌

ବିରଦେ ଜୁଇନ୍ କରବାଇ । ଗଟେକ୍ ରାଇଜ୍ ଆରିଗଟେକ୍ ରାଇଜର୍ ବିରଦେ ଉଟ୍‌ବାଇ । ବେସି ଜାଗାଇ ଦର୍ତ୍ତନି ତୁଲ୍‌ତୁଲ୍‌ସି, ଆରି ବେସି ଜାଗାଇ ମର୍ତ୍ତି ଅଇସି । ଏସବୁ ଗଟ୍‌ନା ଗଟେକ୍ ପିଲା ଜନମ୍ ଅଇବା ଆଗ୍‌ତୁ ଆଇବା ଦୁକାସୁକା ପାରା ଅଇସି ।”

୯ ✨“ଏନ୍ତି ସବୁ ଅଇବା ବେଲା ତମେ ଜାଗରତ୍ ରୁଆ । ଲକ୍‌ମନ୍ ତମ୍‌କେ ବାନ୍ଧିକରି ବିଚାର୍ କରବା ଲକ୍‌ମନ୍‌କେ ସର୍ପିଦେବାଇ । ସେମନ୍ ନିଆଇ କରବା ଜାଗାଇ ତମ୍‌କେ ମାରିପାକାଇବାଇ । ତମେ ମର୍ ସିସ୍ ଅଇରଇବା ଲାଗି, ସାସନ୍ କରବା ଲକ୍‌ମନ୍‌ରଟାନ୍‌ ଆରି ରାଜାମନ୍‌ ମୁଆଟେ ଚିଆ କରାଇବାଇ । ତମେ ମର୍‌ଟାନ୍‌ ବିସ୍‌ବାସ୍ କଲା ବିସଇ ତେଇ ସାକି ଦେଇସା । ୧୦ ଏ ସବୁ ଗଟ୍‌ନା ଅଇଜିବା ଆଗ୍‌ତୁ, ସବୁ ଦେସର୍ ଲକ୍‌ମନ୍‌ର ଲାଗେ, ଏ ନିମାନ୍ କବର୍ କେଟ୍‌ବାର୍ ଆଟେ । ୧୧ ସେମନ୍ ତମ୍‌କେ ବାନ୍ଧିକରି ବିଚାର୍ କରବା ବେଲେ ତେଇ କାଇଟା କଇବୁ ବଲିକରି ଆଗ୍‌ତୁ ଚିନ୍ତା କରାନାଇ । ତମେ କାଇଟା କଇବାର୍ ଆଟେ, ସେ କାତା ପର୍‌ମେସର୍ ତମ୍‌କେ ସମାନ୍ ବେଲାଇ ଦେଇସି । କାଇକେବଇଲେ ସେ ବେଲାଇ ତମେ ନିଜେ ନ କୁଆସ୍ ମାତର୍ ସୁକଲ୍‌ଆଡ୍‌ମା ତମର୍‌ଟାନ୍‌ଅନି କାତା କଇସି । ୧୨ ବାଇ ବାଇକେ ମରାଇବାତେଇ ସର୍ପିଦେବାଇ ଆରି ବାବା ପିଲାକେ ମରାଇବାତେଇ ସର୍ପି ଦେବାଇ ଆରି ପିଲାଟକିମନ୍ ତାକର୍ ମାଆ ବାବା ବିରୁଦେ ଉଟିକରି ସେମନ୍‌କେ ମରାଇବାକେ ସର୍ପିଦେବାଇ । ୧୩ ✨ତମେ ମର ସିସ୍ ଅଇରଇଲାର୍ ଲାଗି ସବୁ ଲକ୍‌ମନ୍ ତମ୍‌କେ ଗିନ୍ କରବାଇ । ମାତର୍ ଜେ ସାରାସାରି ଜାକ ମୁର୍ତି କରି ରଇସି, ସେ ରକିଆପାଇସି ।”

ଜିସୁ ନାସ୍ କରବା ଅସୁକଲ୍ ବିସଇ କଇଲା

(ମାତିଉ ୨୪:୧୫-୨୮; ଲୁକ୍ ୨୧:୨୦-୨୪)

୧୪ “ମାତର୍ ତମେ ଜେତେବେଲା କେ ମନ୍ ନ କରବାଟା ଆରି ନାସ୍ ଅଇବା ଦିନ୍‌ସୁ ଜନ୍‌ଟାକି ସୁକଲ୍ ଜାଗାଇ ସଙ୍ଗାଇବାର୍ ନସ୍, ସେ ଜାଗାଇ ସଙ୍ଗାଇବାଟା ଦେକ୍‌ଲେ, ତମେ ସେ ଜାଗାଇଅନି ପାଲାଇବାର୍ ଆଟେ । ଏ ବିସଇ ପଡ୍‌ବା ଲକ୍‌ମନ୍, ତମେ ଏ କାତା ବୁଜା । ସେବେଲେ ଜନ୍ ଲକ୍‌ମନ୍ ଜିଉଦା ରାଇଜେ ରଇବାଇ,

✨ ୧୩:୯ ୧୩:୯ ମାତିଉ ୧୦:୧୭-୨୦; ଲୁକ୍ ୧୨:୧୧,୧୨ ✨ ୧୩:୧୩ ୧୩:୧୩ ମାତିଉ ୧୦:୨୨

ସେମନ୍ ତଙ୍ଗରେ ପାଲାଅଡ଼ । ୧୫ ☆ ଜଦି କେ ଗରର୍ ଚାଉନି ଉପରେ
 ରଇସିବଇଲେ, ସେ ଗର୍ ବିତ୍ରେ ତାର କାଇମିସା ଦିନ୍ସୁ ଆନ୍ବି
 ବଲିକରି ନ ଜାଅ । ୧୬ ଜଦି କେ ଚାସ୍ ରଇବା ପଦାଇ ରଇସି,
 ସେ ତାର ଚାଦର୍ ଆନ୍ବାକେ ଗରେ ବାଉଡ଼ି ନ ଜାଅ । ୧୭ ଗାଗଡେ
 ରଇଲା ମାଇଜିମନର୍ପାଇ ଆରି ଦୁଦ୍ କୁଆଇବା ମାଇଜିମନର୍ ପାଇ
 ସେବେଲେ ପାଲାଇବାକେ ବେସି କସ୍ଟ ଅଇସି । ୧୮ ଏ ସବୁ ଗର୍ନା
 ସିଡ଼ ଦିନେ ନ ଅଇବାକେ ପାର୍ତନା କରା । ୧୯ ☆କାଇକେବଇଲେ
 ପର୍ମେସର୍ ଏ ଦୁନିଆ ତିଆରକଲା ଦିନେଅନି ଆଜିକେ ଜାକ
 ସେନ୍ତାରି ଦୁକ୍ କସ୍ଟ ଅଏନାଇ ଆରି ପଚେ କେବେମିସା ନ ଅଏ ।
 ସେନ୍ତି ବେସି ଦୁକ୍ କସ୍ଟର୍ ଗର୍ନା ସେ ଦିନ୍ମନ୍କେ ଅଇସି । ୨୦ ଜଦି
 ପର୍ମେସର୍ ଅପର୍ବଲ୍ ଦୁକ୍ ଦିନ୍ମନ୍ ଉନା ନ କରି ରଇଲେ,
 ତେବେ ଦୁନିଆର୍ କେ ମିସା ରକିଆ ନ ପାଇକରି ମରି ଜିବାର୍ ଅଇତା
 । ମାତର୍ ସେ ଜନ୍ ଲକ୍ମନ୍କେ ବାଟିଆଚେ ସେ ଲକ୍ମନର୍ପାଇ ସେ
 ଦୁକ୍ ଦିନ୍ମନ୍ ଉନା କଲାଆଚେ ।”

୨୧ ସେବେଲେ କେ ଜଦି ତମ୍କେ ଇଡି କିରିସ୍ଟ ଆଚେ । ନଇଲେ
 ତେଇ ସେ ଆଚେ । ବଲି କଇସି, ତାକେ ବିସ୍ବାସ୍ କରା ନାଇ ।
 ୨୨ ସେଦିନ୍ମନ୍କେ ମୁଇଆକା କିରିସ୍ଟ । ବଲିକରି ମିର୍ କଇବା
 ବବିସ୍ତ କଇବାଲକ୍, ବିନ୍ ବିନ୍ ରକାମର୍ ଚିନ୍ ଆରି କାବା ଅଇଜିବା
 କାମ୍ମନ୍ ଦେକାଇବାଇ । ପର୍ମେସର୍ ବାଟ୍ଲା ଲକ୍ମନ୍ ତମ୍କେ
 ମିସା ନାଡାଇବାକେ ଚେସ୍ଟା କର୍ବାଇ । ୨୩ ସେଦିନ୍ମନ୍କେ କାଇ
 କାଇଟା ଅଇସି ସେ ବିସଇନେଇ ତମେ ଜାଗ୍‌ରଡ଼ ଅଇ ରୁଆ ।
 ସେଟାପ୍ପାଇ, ଦେକା ସେ ବେଲା ନ ଆଇବା ଆଗ୍‌ତୁ ମୁଇ ତମ୍କେ
 ଜାନାଇଦେଲିନି ।

ଜିସୁ ଆରି ତରେକ୍ ଆଇବା ବିସଇ

(ମାଡିଉ ୨୪:୨୯-୩୧; ଲୁକ୍ ୨୧:୨୫-୨୮)

୨୪ ☆ସେଦିନ୍ମନ୍କେ, ସେ ଦୁକ୍ ଗର୍ନା ଅଇଲାପଚେ
 ବେଲ୍ ଉଜଲ୍ ନ ଦେଇକରି ଆନ୍ଦାର୍ ଅଇଜାଇସି ଆରି ଜନ୍ ମିସା
 ଉଜଲ୍ ନ ଦେଏ ।

୨୫ ☆ତାରାମନ୍ ବାଦ୍‌ଲେଅନି ଅଦର୍ବାଇ ଆରି ବାଦ୍‌ଲେ ଉଜଲ୍

ରଇବାଟାମନ୍କେ ପର୍ମେସର୍ ଆଲାଉଦେଇସି ।

୨୭ ✧ “ସେବେଲା ନର୍ପିଲା ମୁଇ, ବେସି ବପୁତେଇ ଆରି ଡାକ୍ପୁଟା ସଙ୍ଗ୍ ବାଦଲ୍‌ଟାନେ ଆଇବାଟା ଲକ୍‌ମନ୍ ଦେକ୍‌ବାଇ । ୨୭ ସେବେଲା ମର୍ ଦୁଡ୍‌ମନ୍କେ ପାଟାଇକରି ଦୁନିଆ ସାର୍‌ଲାଅନି ଆରି ସରଗ୍ ଚିଡ୍‌ଲା ତେଇଅନି ପର୍ମେସର୍ ବାଟ୍‌ଲା ଲକ୍‌ମନ୍କେ ଚୁଲିଆଇବି ।”

ତୁମ୍‌ରି ଗଟର୍ ସିକିଆ

(ମାଡିଉ ୨୪:୩୨-୩୫; ଲୁକ୍ ୨୧:୨୯-୩୩)

୨୮ “ଏବେ ତୁମ୍‌ରି ଗଟର୍ ଉଦାଅରନ୍ ଅନି ଏ ବିସଇ ସିକା । ଜେତେବେଲେ ତାର୍ କେନ୍ଦିଅନି ପତର୍ ପାଲୁଆନି କରି, କାଁଟାପଡ୍‌ରିଆ ଡିସ୍‌ଲେ, କାରାଦିନ୍ କେଟ୍‌ଲା ବଲିକରି ତମ୍‌କେ କେ ନ କଇଲେମିସା ଜାନାସ୍ । ୨୯ ସେକ୍ରିସେ ତମେ ଏ ସବୁ ଗଟ୍‌ନା ଦେକ୍‌ବାବେଲେ, ମୁଇ ଆଇବା ଦିନ୍ କେଟ୍‌ଲା, ବଲିକରି ଜାନସା । ୩୦ ମୁଇ ତମ୍‌କେ ସଡ୍‌କାତା କଇଲିନି, ଏ ଗଟ୍‌ନା ନ ଅଇବାଜାକ, ଏବେ ରଇଲା ଲକ୍‌ମନ୍ ନ ମରଡ୍ । ୩୧ ବାଦଲ୍ ଆରି ତେଇ ଉଜଲ୍ ଅଇ ରଇବାଟାମନ୍, ଦୁନିଆଇ ଆରି ତେଇରଇବା ସବୁ ଦିନ୍‌ସୁ ନାସ୍ ଅଇବା ସାରାସାରି ଦିନ୍ ଆଇସି, ମାତର୍ ମର୍ ବାକିଅ କେବେ ମିସା ନ ସାରେ ।”

ଜିସୁ ଆଇବା କବର୍ କେ ନାଜାନଡ୍

(ମାଡିଉ ୨୪:୩୬-୪୪)

୩୨ ✧ “ମାତର୍ ସବୁ ଗଟ୍‌ନା କେବେ ଆରି ଜେତେବେଲା ଅଇସି ବଲିକରି କେ ମିସା ନାଜାନଡ୍ । ସରଗର୍ ଦୁଡ୍ କି ସଡ୍ ମାପ୍‌ରୁର୍ ପିଲା ମୁଇ ମିସା ନାଜାନି । ମର୍ ବାବା ପର୍ମେସର୍ ଗଟେକ୍ ଲକ୍‌ସେ ଜାନିଆଟେ । ୩୩ ସେ ଦିନ୍ କି ବେଲା କେବେ ଆଇସି, ସେଟା ତମେ କେ ନାଜାନାସ୍ । ସେଟାପାଇ ତମେ ଜାଗ୍‌ରଡ୍ ଅଇ ଡିଆର୍‌ଅଇ ରୁଆ । ୩୪ ✧ ମୁଇ ଆଇବା ଦିନ୍, ଏକ୍ରି ଗଟେକ୍ ଲକ୍ ତାର୍ ଗର୍ ଚାଡି ବିନ୍ ଦେସେ ଜିବା ବିସଇ ସମାନ୍ କରିଅଇସି । ସେ ନିଜର୍ ଗତିଦାଙ୍‌ଡାମନ୍କେ ଡାକିକରି ସେମନ୍ କାଇ କାଇ କାମ୍ କର୍‌ବାଟାଟେ, ସେ ସବୁ ବିସଇ ସେମନ୍କେ କଇଲା ।

✧ ୧୩:୨୭ ୧୩:୨୭ ପରକାସିତ ୧:୭
୧୩:୩୪ ଲୁକ୍ ୧୨:୩୬-୩୮

✧ ୧୩:୩୨ ୧୩:୩୨ ମାଡିଉ ୨୪:୩୬ ✧ ୧୩:୩୪

ବାବ୍ ତିଆଗତି ଜାଗୁବା ଗତିଦାଙ୍ଗତାକେ ଡାକିକରି ସେ ବାଉଡି ଆଇବା ଜାକ ଜାଗିକରି ରଇବାକେ କଇକରି ଗାଲା । ୩୫ ତମେମିସା ଜାଗୁଆଲର୍ ପାରା ଜାଗରଡ୍ ଅଇ ରୁଆ । କାଇକେବଇଲେ ସାଉକାର୍ ସଞ୍ଜବେଲା, କି ମଜାରାତି, କି କୁକ୍ତାତାକେ କି ସାକ୍ଲିଆ ଆଇସି ସେଟା ତମେ ନାଜାନାସ । ୩୬ ଜଦି ସେ ଅଗାଡ୍ ଆସିକରି ଦେକ୍ଲାବେଲେ, ତମେ ଇସ୍ରାଇଲର୍ ଲକ୍ମନର୍ ପାରା ରଇବାଟା ସେ ଦେକ୍‌ବାରନାଇ । ୩୭ ମୁଇ ତମ୍‌କେ କାଇଟା କଇଲିନି, ସେ ବିସଇସେ ସବୁ ଲକ୍‌କେ କଇଲିନି । ମୁଇ ଆଇବା ଦିନ୍‌ପାଇ ତିଆର୍ ଅଇକରି ସବୁବେଲା ଜାଗରଡ୍ ଅଇକରି ରୁଆ ।”

୧୪

ଜିସୁକେ ମରାଇବାକେ ଜିଉଦି ନେତାମନର୍ ଜଜ୍‌ନା

(ମାତିଉ ୨୬:୧-୫; ଲୁକ୍ ୨୨:୧-୬; ଜଅନ୍ ୧୧:୪୫-୫୩)

୧ ନିସ୍‌ତାର ପରବ୍ ଆରି କମିର୍ ନ ମିସାଇ ରୁଟି କାଇବା ପରବ୍ ଅଇବାକେ ଆରି ଦୁଇଦିନ୍ ବାକିରଇଲା । ସେବେଲେ ମୁକ୍ତିଅ ପୁଜାରିମନ୍ ଆରି ନିୟମ୍ ସିକାଉମନ୍ କେ ନାଜାନ୍‌ତେ ଜିସୁକେ କେନ୍ଦ୍ରି ବନ୍ଦିକରି ମରାଇଅଇସି ବଲିକରି ବୁଦି ପାଁଡ୍‌ତେରଇଲାଇ । ୨ ମାତର୍ ସେମନ୍ କଇଲାଇ, “ପରବ୍ ଦିନ୍‌ମନ୍‌କେ ତାକେ ବନ୍ଦିକରି ନଏ । କାଇକେବଇଲେ ଲକ୍‌ମନ୍ ଗଣ୍ଡିଗଲ୍ କର୍‌ବାଇ ।”

ଗଟେକ୍ ମାଇଜି ଜିସୁକେ ନାମ୍‌ଲା

(ମାତିଉ ୨୬:୬-୧୩; ଜଅନ୍ ୧୨:୧-୮)

୩ ✱ଜିସୁ ବେଡ୍‌ନିଆ ଗଡେ ଆଗତୁ ବଡ୍ ରଗ୍ ଅଇଲା ସିମନର୍ ଗରେ କାଇବାକେ ବସ୍‌ଲାବେଲେ, ଗଟେକ୍ ମାଇଜି କାଁଟେ ବେସି ଦାମ୍ ଦେବା ବାସନା ଚିକନ୍ ଆନିକରି କାଁଟର୍ ଗାଲା ବାଙ୍ଗାଇ, ଜିସୁର୍ ମୁଣ୍ଡେ ରକଇଦେଲା । ୪ ମାତର୍ ତେଇ ରଇବା କେତେକ୍ ଲକ୍‌ମନ୍ ରିସାଅଇ ନିଜର୍ ନିଜର୍ ବିଡ୍‌ରେ କାତା ଅଇଲାଇ, “ଏ ଚିକନ୍ କାଇକେ ବେକାର୍ ବେକାର୍ ନସ୍‌ଟ୍ କରି ପାକାଇଲାନି ? ୫ ଏଟା ବର୍‌ସେକର୍ କାମାଇଲାତେଇଅନି ଅଦିକ୍ ତାରୁକେ ବିକି

✱ ୧୪:୩ ୧୪:୩ ଲୁକ୍ ୭:୩୭,୩୮

ଗରିବ୍ ଲକ୍ଷ୍ମୀଙ୍କୁ ଦେବାର ଅଇତା ।” ବଲିକରି ସେମନ୍ ସେ ମାଉଜିକେ ବେସି କଇପାକାଇଲା ।

^୭ମାତର୍ ଜିସୁ ସେମନ୍‌କେ କଇଲା, “ସେ ମାଉଜିକେ ଚାଡ଼ିଦିଆସ୍, କାଇକେ ତାକେ ଲାଗିକରି କସ୍ତ ଦେଲାସ୍ନି ? ସେ ମରପାଇ ନିକ କାମ୍ କଲାଆଚେ । ^୮କାଇକେବଇଲେ, ଗରିବ୍ ଲକ୍ଷ୍ମୀ ସବୁବେଲା ତମର୍‌ସଙ୍ଗ୍ ଆଚଡ଼ । ତମେ ଜେଡେବେଲା ମନ୍‌କଲେ, ସେଡେବେଲା ସେମନ୍‌କେ ସାଇଜ କରପାରାସ୍ । ମାତର୍ ମୁଇ ଆରି ବେସିଦିନ୍ ତମର୍ ସଙ୍ଗ୍ ନ ରଇ । ^୯ଏ ମାଉଜି ଜେଡ଼କି ପାରଲା, ସେଡ଼କି କଲାଆଚେ । ସେ ମର୍ ମଲା ଗାଗଡ଼ ମସନେ ତପବା ଆଗଡୁ ଚିକନ୍ ଲାଗାଇଦେଲା ଆଚେ । ^{୧୦}ମୁଇ ତମ୍‌କେ ସଡ଼କାତା କଇଲିନି, ଗୁଲାଇ ଜଗଡେ ଜନ୍ ଜାଗାଇ ମିସା ମାପୁରୁ ନିକ କବର୍ ଜାନାଇଅଇସି । ଏ ମାଉଜି ଜାଇଟା କଲାଆଚେ, ତାକେ ଏତାଇକରି ସେଟା ମିସା କଇବାଇ ।”

ଜିସୁକେ ସଡ଼ରୁମନ୍‌କେ ସରପି ଦେବାକେ ଜିଉଦାର ରାଜି
(ମାଡ଼ିଉ ୨୭:୧୭-୨୫; ଲୁକ୍ ୨୨:୩-୬)

^{୧୦}ତାରପଚେ ଜିସୁର୍ ବାରଟା ସିସମନ୍‌ ବିଡ଼ରେଅନି ଇସ୍କାରିୟଡ଼ ଜିଉଦା ନାଉର୍ ଗଟେକ୍ ସିସ୍ ଜିସୁକେ ମୁକିଅ ପୁଜାରିମନ୍‌ ଆଡେ ଦାରାଇଦେବାକେ ରାଜିଅଇକରି ସେମନ୍‌ ଲଗେ ଗଲା । ^{୧୧}ସେ ମୁକିଅ ପୁଜାରିମନ୍‌ ଜିଉଦାର କାତା ସୁନିକରି ବେସି ସାରଦା ଅଇଗାଲା । ଏ କାମ୍ କଲେ ସେମନ୍ ଇସ୍କାରିୟଡ଼ ଜିଉଦାକେ ତାବୁ ଦେବୁ ବଲିକରି ପର୍ମାନ୍ କରି କଇଲା । ସେଟାରପାଇ ଇସ୍କାରିୟଡ଼ ଜିଉଦା ଜିସୁକେ ମୁକିଅ ପୁଜାରିମନ୍‌କେ ଦାରାଇ ଦେବାକେ ବେଲା କଇଲା ।

ରକିଆ ପାଇବା ପରବର୍ ବଜି

(ମାଡ଼ିଉ ୨୭:୧୭-୨୫; ଲୁକ୍ ୨୨:୭-୧୪, ୨୧-୨୩; ଜଅନ୍ ୧୩:୨୧-୩୦)

^{୧୨}କମିର୍ ନ ମିସାଇକରି ରୁଟି ତିଆରକରି କାଇବା ବଜିର୍ ପରବର୍ ପର୍‌ଡୁମ୍ ଦିନେ, ରକିଆ ପାଇବା ପରବେ ମେଣ୍ଡାପିଲା ପୁଜାବାଇ । ସେଦିନେ ଜିସୁର୍ ସିସମନ୍ ତାକେ “ତରପାଇ ରକିଆ ପାଇବା ପରବର୍ ବଜି ସବୁ ଟିକ୍ କରବାକେ ଆମେ କନ୍ ଜାଗାଇ ଜିବୁ ବଲିକରି ତୁଇ ମନ୍ କଲୁସ୍ନି ?”

୧୩ ସେଟାରପାଇଁ ଜିସୁ ତାର ଦୁଇଟା ସିସ୍ତମନ୍‌କେ ଡାକିକରି କଇଲା ତମେ ଗତେ ଜା । ତେଇ ଗଟେକ୍ ବଡ଼ଟା ଆଣ୍ଡିତେଇ ପାନି ନେବା ଲକ୍‌କେ ଦେକ୍‌ସା । ତମେ ତାର ପରେ ପରେ ଜା । ୧୪ ସେ ପାନିନେବା ଲକ୍ ଗଟେକ୍ ଗରେ ପୁରସି । ତମେ ମିସା ସେ ଗର୍ ବିଡ଼ରେ ପୁରିକରି ସେ ଗରର୍ ସାଉକାର୍‌କେ କୁଆ, “ଆମର୍ ଗୁରୁ ପାଟାର୍‌ଲାନି, ମୁଇ ମର୍ ସିସ୍ତମନ୍‌ ସଙ୍ଗ୍ ରକିଆ ପାଇବା ପରବର୍ ବଜି କର୍‌ବା ବାକ୍‌ରା କନ୍ତି ଆତେ ? ୧୫ ସେ ଗରର୍ ସାଉକାର୍ ତମ୍‌କେ ଗର୍ ଉପ୍‌ରେ ରଇବା ନିମାନ୍ ସଜାଇଅଇରଇଲା ଗଟେକ୍ ବଡ଼ଟା ବାକ୍‌ରା ଦେକାଇଦେଇସି । ତେଇ ଆମର୍‌ପାଇଁ କାଇବା କାଦି ତିଆର୍‌କରା ।” ବଲି ପାଟାଇଲା ।

୧୬ ତାର ପରେ ଦୁଇଟା ସିସ୍ତମନ୍ ସେ ଗରେ ଗାଲାଇ । ତେଇ ଜିସୁ ସେମନ୍‌କେ ଜେନ୍ତି କଇରଇଲା, ସବୁ ସେନ୍ତି ଦେକ୍‌ଲାଇ । ସେଟାରପାଇଁ ସେମନ୍ ତେଇ ନିସ୍ତାର୍ ପରବର୍ ବଜି ତିଆର୍‌କଲାଇ ।

୧୭ ସଞ୍ଜ ଅଇଲାକେ ଜିସୁ ତାର ସିସ୍ତମନ୍‌କେ ଡାକିନେଇ ତେଇ କେଟ୍‌ଲା । ୧୮ ସେମନ୍ ବସି କାଇବାବେଲେ ଜିସୁ କଇଲା, “ମୁଇ ତମ୍‌କେ ସଡ଼କାତା କଇଲିନି, ଏବେ ତମର୍ ବିଡ଼ରେଅନି ଗଟେକ୍ ଲକ୍ ଜେକି ଆମର୍ ସଙ୍ଗ୍ କାଇଲାନି, ସେ ମକେ ସଡ଼ରୁମନ୍‌କେ ଦାରାଇଦେଇସି ।” ୧୯ ଏ କାତା ସୁନିକରି ସିସ୍ତମନ୍ ବେସି ମନ୍‌ଦୁକ୍ ଅଇଲାଇ । ସବୁଲକ୍ ଗଟେକ୍ ଗଟେକ୍ ଅଇକରି ଜିସୁକେ ସେଲକ୍ ମୁଇ କି ? ବଲିକରି ପାଟାର୍‌ଲାଇ । ୨୦ ଜିସୁ ସେମନ୍‌କେ କଇଲା, “ତମର୍ ବାର ଲକର୍ ବିଡ଼ରେଅନି ଜନ୍ ଲକ୍ ମର୍‌ସଙ୍ଗ୍ ଗିନାତେଇ ରୁଟି ଚବାଲିଆତେ, ସେ ଆକା ।” ୨୧ “ମର୍ ବିସଇ ପର୍‌ମେସରର୍ ସାସ୍‌ତରେ କେନ୍ତି ଲେକା ଅଇଲାଆତେ, ସେନ୍ତିସେ ସବୁ ଅଇଲାନି, ସେଟା ସଡ଼ସେ, ମାତର୍ ଜାର୍‌ଗାନେଅନି ନରପିଲା ମୁଇ ସଡ଼ରୁମନ୍‌ର୍ ଆତେ ଦାରାଇଅଇବି, ସେ ବେସି ବଡ଼ ଡଣ୍ଟ ପାଇବାଲକ୍ ଆରି ସେ ଜନମ୍ ନ ଅଇରଇଲେ ନିକ ଅଇତା ।”

ଜିସୁ ତାର ସିସ୍ତମନ୍‌ର୍ ସଙ୍ଗ୍ ବଜି କାଇବା ବିସଇ

(ମାତିଉ ୨୬:୨୬-୩୦; ଲୁକ୍ ୨୨:୧୪-୨୦; ୧ମ କରନ୍ତିୟ ୧୧:୨୩-୨୪)

୨୨ ସିସ୍ତମନ୍ କାଇବାକେ ବସ୍ତୁଲାବେଲେ, ଜିସୁ ରୁଟିଦାରିକରି ପର୍ଯ୍ୟେସର୍‌କେ ଜୁଆରକଲା ଆରି ସେଟା ବାଙ୍ଗାଲ ସେମନ୍‌କେ ଦେଇକରି କଇଲା, “ନିଆ ଏଟା ମର୍ ଗାଗଡ଼ ।”

୨୩ ତାର୍‌ପଟେ ଅଙ୍ଗୁର୍ ରସ୍ ଦାରି ପର୍ଯ୍ୟେସର୍‌କେ ଜୁଆର୍ କରି ସବୁ ଲକ୍‌କେ କାଇବାକେ ଦେଲାଜେ ସେମନ୍ କାଇଲା । ୨୪ ଆରି ସେ ତାର୍ ସିସ୍ତମନ୍‌କେ କଇଲା, ଏଟା ଅଇଲାନି ବେସି ଲକ୍‌ପାଇ ଜରାଇଲା ମର୍ ବନି । ଏ ବନି ସଙ୍ଗ୍ ପର୍ଯ୍ୟେସର୍ ଲକ୍‌ମନର୍ ସଙ୍ଗ୍ ରାଜିନାମା କଲାନି । ୨୫ ମୁଇ ତମ୍‌କେ ସଡ଼ କାତା କଇଲିନି, “ମୁଇ ପର୍ଯ୍ୟେସର୍‌ର ରାଇଜେ ନୁଆ ଅଙ୍ଗୁର୍ ରସ୍ କାଇବା ଦିନ୍ ନ ଆଇବାଜାକ, ଏଟା ଆରି କେବେ ମିସା ନ କାଇ ।”

୨୬ ସବୁ ସିସ୍ତମନ୍ ମିସିକରି ପର୍ଯ୍ୟେସର୍‌କେ ଦନିଅବାଦର୍ ଗିଡ଼ ଗାଇ ଗାଇ କରି ଜିଡ଼ ନାଉର୍ ପର୍‌ବତେ ଗାଲାଇ ।

ଜିସୁର୍ ବବିସଡ଼ କାତା

(ମାତିଉ ୨୭:୩୧-୩୫; ଲୁକ୍ ୨୨:୩୧-୩୫; ଜଅନ୍ ୧୩:୩୬-୩୮)

୨୭ ସେବେଲେ ଜିସୁ ସିସ୍ତମନ୍‌କେ କଇଲା, “ତମେ ସବୁଲକ୍ ମକେ ଚାଡ଼ିକରି ଉଟିଜାଇସା । ସେଟା ପର୍ଯ୍ୟେସର୍‌ର ସାସ୍ତରେ ଏନ୍ତି ଲେକାଅଇଲାଆଟେ,

“ମୁଇ ମେଣ୍ଡା ଗଉଡ଼କେ ମରାଇବି ।

ତେଇର୍ ମେଣ୍ଡାମନ୍ ଚିନ୍‌ଚତର୍ ଅଇଜିବାଇ ।”

୨୮ ✧ “ମାତର୍ ମୁଇ ମଲାଟାନେଅନି ଆରିତରେକ୍ ଉଟ୍‌ଲାପଟେ, ତମେ ଗାଲିଲି ଦେସେ ଜିବା ଆଗ୍‌ତୁ, ମୁଇ ତମର୍ ଆଗ୍‌ତୁ ଆଗ୍‌ତୁ ଗାଲିଲି ରାଇଜେ ଜିବି ।” ୨୯ ମାତର୍ ପିତର୍ ଜିସୁକେ କଇଲା, “ସବୁ ସିସ୍ତମନ୍ ତମ୍‌କେ ଚାଡ଼ିକରି ଗାଲେ ମିସା ମୁଇ ତମ୍‌କେ କେବେ ନ ଚାଡ଼ି ।”

୩୦ ଜିସୁ ତାକେ କଇଲା, “ମୁଇ ତକେ ସଡ଼କାତା କଇଲିନି, ଆଜି ରାତି ଦୁଇତର୍ କୁକ୍‌ତା ତାକ୍‌ବା ଆଗ୍‌ତୁ, ତୁଇ ମକେ ତିନ୍‌ତର୍ ଚିନିନାଇ ବଲିକରି କଇସୁ ।”

୩୧ ଏ କାତା ସୁନି ପିତର ଜିସୁକେ ଆରିତରେକ୍ ଡାଟ୍‌ସଙ୍ଗ୍ କଇଲା,
“ମୁଇ ତମର୍ ସଙ୍ଗ୍ ମରବାର୍ ଆଲେ ମିସା କେବେ ତମ୍‌କେ ନାଜାନି
ବଲି ନ କଇ ।” ଆରି ବାକି ସିସ୍‌ମନ୍ ମିସା ସେକ୍ରିସେ କଇଲାଇ ।

ଗେଡ୍‌ସିମନି ବାଡେ ଜିସୁର୍ ପାର୍‌ତନା
(ମାତିଉ ୨୭:୩୭-୪୭; ଲୁକ୍ ୨୨:୩୯-୪୭)

୩୨ ତାର୍‌ପତେ ଜିସୁ ତାର୍ ସିସ୍‌ମନ୍‌ର୍ ସଙ୍ଗ୍ ଗେଡ୍‌ସିମନି ନାଉଁର୍
ଗଟେକ୍ ଜାଗାଇ ଆଇଲାଇ । ତେଇ ଜିସୁ ସିସ୍‌ମନ୍‌କେ କଇଲା, “ମୁଇ
ପାର୍‌ତନା କରବାବେଲେ ତମେ ଇତି ବସିରୁଆ ।” ୩୩ ପିତର, ଜଅନ୍
ଆରି ଜାକୁବ୍‌କେ ତାର୍ ସଙ୍ଗ୍ ମିସ୍‌ତେ ଡାକିନେଲା । ସେ ଦୁକ୍‌ଅଇ
କିଲ୍‌ବିଲ୍ ଅଇବାର୍ ବସ୍‌ଲା । ୩୪ ଆରି ଜିସୁ, ପିତର, ଜାକୁବ୍ ଆରି
ଜଅନ୍‌କେ କଇଲା, “ମର୍ ମନେ ବେସି ଦୁକ୍ ଅଇଗାଲା ଆଚେ ।
ଜିବନ୍ ଚିଡିଗାଲା ପାରା ଲାଗ୍‌ଲାନି । ତମେ ଇତି ବସିରଇ ଜାଗିରୁଆ
।”

୩୫ ଜିସୁ ତାକର୍‌ଟାମେଅନି କଣ୍ଡେକ୍ ଦୁରିକେ ଇଣ୍ଡିଜାଇ
ଉମ୍‌ତାଡିଅଇ ବୁର୍‌ ଅଦ୍‌ରିକରି ପର୍‌ମେସର୍‌କେ ଏକ୍ରି ପାର୍‌ତନା
କଲା, “ଏକ୍ରି କରିଅଇସି ବଇଲେ, ଏ କସ୍‌ଟର୍ ବେଲା ମକେ ନ
ଆସ । ୩୬ ଏ ମର୍ ବାବା ତୁଇ ମନ୍‌କଲୁସ୍ ବଇଲେ କାଇ କାମ୍ ମିସା
କରିପାରୁସ୍ । ସେଟାର୍‌ପାଇ ଏ ଦୁକ୍ କସ୍‌ଟର୍ ମୁତା ମର୍‌ଟାମେଅନି
ଦାରି ଜା । ମାତର୍ ମର୍ ମନ୍ କଲା ଇସାବେ ନ କରି ତମର୍ ମନ୍
କଲା ଇସାବେ କରା” ବଲି ପାର୍‌ତନା କଲା ।

୩୭ ତାର୍‌ପତେ ଜିସୁ ତାର୍ ସିସ୍‌ମନ୍‌ର୍ ଲଗେ ବାଉଡି ଆଇଲାଜେ,
ସେମନ୍ ସଇରଇବାଟା ଦେକ୍‌ଲା । ସେ ପିତର୍କେ କଇଲା, “ସିମନ୍
ପିତର, ତମେ ସଇଦେଲାସ୍‌ନି କି ? ଗଟେକ୍ ଗଁଟା ମିସା ଚେଡା
ରଇ ଜାଗି ନାପାରୁଲାସ୍‌ନି ? ୩୮ ତମେ ଜେକ୍ରିକି ପରିକାର୍ ପାନ୍ଦେ ନ
ଅଦର୍‌ବାପାଇ ଜାଗି ରଇକରି ପାର୍‌ତନା କରା । ମନ୍ କର୍‌ବି ବଲି
ମନ୍ କଲାନି ମାତର୍ ଗାଗଡ୍ ନିର୍‌ଲାନି ।”

୩୯ ଜିସୁ ଆରିତରେକ୍ ଜାଇକରି ଆଗଡୁର୍ ପାରା କଇକରି
ପାର୍‌ତନା କଲା । ୪୦ ତାର୍‌ପତେ ସେ ସିସ୍‌ମନ୍‌ର୍ ଲଗେ ଆରି ତରେକ୍
ବାଉଡି ଆସି ଦେକ୍‌ଲା । ସେମନ୍ ଆରିତରେକ୍ ସଇଦେଇରଇଲାଇ

। ସେମାନର ଆଁକିତେଇ ଗୁନ୍ ଡାବି ଆଇତେରଇଲାଜେ ସେମନ୍ ଜିସୁକେ କାଇବଲି ମିସା କଇବାକେ ଜାନି ନାପାରୁଲାଇ ।

୪୧ ଏକ୍ତି ତିନ୍ତର୍ ପାର୍ତନା କରି ସାରାଇଲାପତେ ଜିସୁ ସିସ୍ତମାନରୁଲଗେ ଆରିତରେକ୍ ବାଉଡି ଆଇଲା ଆରି ସେମନ୍କେ କଇଲା, “ଏବେଜାକ ତମେ ପୁଣ୍ଡିକରି ସଇଦେଇ ଆଚାସ୍ ? ଏଡ଼କି ଅଇସିବେ, ଏବେ ନର୍ପିଲା ମକେ, ପାପି ଲକ୍ମନର୍ ଆତେ ଦାରାଇଦେବା ବେଲା ଆସି କେଟ୍ଲା । ୪୨ ଉଟା ଆମେ ଜୁବେ । ଏଦେ ଦେକା ! ମକେ ସଡ଼ରୁମନ୍କେ ଦାରାଇ ଦେବା ଲକ୍ ଆଇଲାଆଚେ ।” ବଲି କଇଲାଇ ।

ଜିସୁ ବନ୍ଦି ଅଇଲା

(ମାତିଉ ୨୨:୪୭-୫୨; ଲୁକ୍ ୨୨:୪୭-୫୩; ଜଅନ୍ ୧୮:୩-୧୨)

୪୩ ସେ ଦାପ୍ରେ ଜିସୁ ଏ କାତା କଇବାବେଲା, ବାରଟା ସିସ୍ତମାନରୁ ବିଡ଼ରେଅନି ଗଟେକ୍ ଲକ୍ ଜେକି ଇସକାରିୟଡ଼ ଜିଉଦା ଆସି କେଟ୍ଲା । ଆରି ତାର୍ ସଙ୍ଗ୍ ବେସି ଲକ୍ମନ୍ ରଇଲାଇ । ସେ ଲକ୍ମନର୍ ଆତେ କାଣ୍ଡା ଆରି ଟେଙ୍ଗ୍ ଦାରିରଇଲାଇ । ସେ ଲକ୍ମନ୍କେ ମୁକିଅ ପୁଜାରିମନ୍, ନିୟମ୍ ସିକାଇବା ଲକ୍ମନ୍ ଆରି ମୁକିଅ ଜିଉଦି ନେତାମନ୍, ପାଟାଇ ରଇଲାଇ । ୪୪ ସଡ଼ରୁମନର୍ ଆତେ ଦାରାଇଦେବା ଇସକାରିୟଡ଼ ଜିଉଦା ଜିସୁକେ ଦେକାଇଦେବାକେ ଏକ୍ତି ଗଟେକ୍ ଚିନ୍ କଇରଇଲା, “ମୁଇ ଜନ୍ ଲକ୍ମକେ ରୁମ୍ବି, ସେ ଆକା ଜିସୁ । ତମେ ତାକେ ବନ୍ଦିକରି ଜାଗରଡ଼ ସଙ୍ଗ୍ ଦୁରିକେ ଦାରିଜାଇସା ।”

୪୫ ସେମନ୍ ତେଇ ଆସିକରି କେଟ୍ଲା ଦାପ୍ରେ, ଇସକାରିୟଡ଼ ଜିଉଦା ଜିସୁର୍ ଲଗେ ଜାଇକରି “ଏ ଗୁରୁ, ଜୁଆର୍ !” ବଲିକରି ରୁମ୍ଲା । ୪୬ ସେବେଲା ସେଲକ୍ମନ୍ ଜିସୁକେ ଦାରି ବନ୍ଦିକରି ନେବାବେଲେ, ୪୭ ସେ ଲଗେ ଚିଆଅଇରଇଲା ଜିସୁର୍ ଗଟେକ୍ ସିସ୍ ତାର କାଣ୍ଡା ବେଟି ମୁକିଅ ପୁଜାରିର୍ ଗତି ଦାଙ୍ଗ୍ଡାର୍ ଉଜା କାନ୍ କାଟିଦେଲା । ୪୮ ଜିସୁ ସେ ଲକ୍ମନ୍କେ ପାଚାରୁଲା, “ମୁଇ କାଇ ଗଟେକ୍ ଅପ୍ରେଦି ଲକ୍ କି, ତମେ କାଣ୍ଡା ଆରି ଟେଙ୍ଗ୍ମନ୍ ଦାରି ମକେ ନେବାର୍ ଆସିଆଚାସ୍ ? ୪୯ ✧ସବୁ ଦିନ୍ ମୁଇ ପାର୍ତନା ଗର୍ମନ୍କେ ସିକାଇଦେବା ବେଲେ

✧ ୧୪:୪୯ ୧୪:୪୯ ଲୁକ୍ ୧୯:୪୭,୨୧:୩୭

ମୁଇ ତମର ସଙ୍ଗେ ରଇଲି । ମାତର ସେବେଲେ ମକେ ଦାରାସନାଇ । ମାତର ପର୍ମେସରର ସାସ୍ତରେ ଜେନ୍ତି ଲେକାଅଇରଇଲା ସେଟା ସବୁ ସତ୍ ଅଇବାକେସେ ଏନ୍ତି ଅଇଲାଆଚେ ।” ^{୫୦} ସେବେଲା ଜିସୁର ସିସ୍‌ମନ୍ ତାକେ ଚାଡ଼ି ଉଟିପାଲାଇଲା ।

^{୫୧} ମାତର ସେବେଲା ଗଟେକ୍ ଦାଙ୍ଗ୍‌ତା ଅବ୍‌କା ପାତଲ୍ ଚାଦର୍ ଡାବିଅଇ ଜିସୁର ପଚେ ପଚେ ଜାଇତେରଇଲା । ଲକ୍‌ମନ୍ ତାକେ ବନ୍ଦିକରବାକେ ଚେସ୍‌ଟା କଲାଇକେ ^{୫୨} ସେ ଦାଙ୍ଗ୍‌ତା ପାତଲ୍ ଚାଦର୍ ଚାଡ଼ିକରି ତୁମ୍‌ଣ୍ଡା ଉଟିପାଲାଇଲା ।

ଜିଉଦିମନର ବଡ଼ସବା ତେଇ ଜିସୁର ବିଚାର

(ମାତିଉ ୨୬:୫୭-୬୮; ଲୁକ୍ ୨୨:୫୪-୫୫, ୬୩-୭୧; ଜଅନ୍ ୧୮:୧୩-୧୪)

^{୫୩} ପଚେ ସେ ଲକ୍‌ମନ୍ ଜିସୁକେ ସବୁର୍ଚାନେଅନି ବଡ଼ପୁଜାରିତେଇ ଦାରିଗାଲା । ମୁକିଅ ପୁଜାରିମନ୍, ପାର୍‌ତିନ୍‌ମନ୍ ଆରି ନିୟ୍‌ମ୍ ଗୁରୁମନ୍ ସବୁଲକ୍ ଗଟେକ୍ ତେଇ ରୁଣ୍ଡିଲା । ^{୫୪} ପିତର ଜିସୁର ଟାନେଅନି ଦୁରିକେ ରଇ ତାର ପଚେ ପଚେ ଗାଲା ଆରି ମୁକିଅ ପୁଜାରିର ଡାଣ୍ଡିବିଡ଼ରେ ଗାଲା । ଜାଗୁଆଲ୍‌ମନର ସଙ୍ଗେ ବସିକରି ଜଇ ଚେକ୍‌ତେରଇଲା । ^{୫୫} ତେଇ ମୁକିଅ ପୁଜାରିମନ୍ ଆରି ବିଚାର କରବା ଜିଉଦି ନେତାମନ୍ ଜିସୁକେ ମରବା ତଣ୍ଡ ଦେବାକେ ତାର ବିରଦେ ସାକି କଜ୍‌ତେରଇଲା । ମାତର ସାକି ଦେବାକେ କେ ମିସା ମିଲ୍‌ଡନାଇ । ^{୫୬} ବେସି ଲକ୍‌ମନ୍ ଆସିକରି ଜିସୁର ବିରଦେ ମିର୍ ସାକି କଇଲା, ମାତର ସେମନ୍ ସବୁଲକ୍ ବିନ୍ ବିନ୍ ରକାମର କାତା କଇଲା ।

^{୫୭} ସାରାସାରି କେତେ ଲକ୍ ଉଟିକରି ତାର ବିରଦେ ମିର୍ ସାକି ଦେଇ ଏନ୍ତି କଇଲା, ^{୫୮} ✧ “ଲକ୍‌ମନ୍ ତିଆରକଲା ଏ ପର୍ମେସରର ମନ୍ଦିର୍ ମୁଇ ବାଙ୍ଗାଇ ଦେଇ, ସେଟା ତିନ୍ ଦିନ୍ ବିଡ଼ରେ ଆରି ତିଆରକରିଦେବି, ଜନ୍‌ଟାକି ଲକ୍‌ମନ୍ ତିଆର ନ କରିଅଡ଼ ବଲି ସେ କଇବା ଏ କାତା ଆମେ ସୁନିଆରୁ ।” ^{୫୯} ମାତର, ଏନ୍ତି ବଇଲେମିସା ଏ ଲକ୍‌ମନ୍ କାଇ କାଇ ବିସଇ ସବୁ କଇତେରଇଲା, ସେଟା, ଗଟେକ୍ ଲକ୍‌ର କାତା ଆରି ଗଟେକ୍ ଲକ୍‌ର କାତା ସଙ୍ଗେ ନ ମିସ୍‌ତେରଇଲା ।

✧ ୧୪:୫୮ ୧୪:୫୮ ଜଅନ୍ ୨:୧୯

୬୦ ତାରପଟେ ସବୁଲକର ଆଗତୁ ବଡ଼ ପୁଜାରି ଚିଆଅଇକରି ପାଟାରୁଲା, “ଏ ଲକ୍ମନ୍ ତର ବିରଦେ କେତେ କାତା କଇଲାକନି, ସେ ବିସଇନେଇ ତକେ କାଇଟା ମିସା କଇବାର ଆଟେ କି ?”

୬୧ ମାତର ଜିସୁ ଚିମ୍ବରା ଅଇକରି ରଇଲା, କାଇଟା ମିସା କଏନାଇ । ବଡ଼ପୁଜାରି ଜିସୁକେ ଆରି ତର ପାଟାରୁଲା, “ତୁଇ କାଇ ପୁଜା ପାଇବା ପରମେସରର ପଅ କିରିସ୍ତ କି ?”

୬୨ ଜିସୁ କଇଲା, “ଉଁ, ମୁଇ ସେ । ଆରି ନରପିଲା ମୁଇ, ପରମେସରର ବେସି ବପୁର ଉଜା ଆଡ଼ ବାଟେ ବସିରଇଲାଟା ଆରି ସରଗର ମେଗେ ଆଇବାଟା ଦେକ୍‌ସା ।”

୬୩ ବଡ଼ ପୁଜାରି ଏ କାତା ସୁନିକରି ବେସି ରିସାଅଇଜାଇ ତାର ନିଜର ପଟିଆ ଚିରିପାକାଇଲା ଆରି ସବୁଲକ୍ମନ୍‌କେ କଇଲା, “ଆମ୍‌କେ ଆରି କାଇ ସାକି ଦରକାର ?”

୬୪ “ସେ ପରମେସରର ପିଲା ବଲିକରି କଇଲାଟା ତମେ ସୁନିଆଟାସ୍ । ଏବେ ତମେ କାଇଟା ବଲି ବାବ୍‌ଲାସ୍‌ନି ?” ତେଇ ସବୁ ଲକ୍ମନ୍ ଜିସୁକେ ଦସି କରାଇ, ତାକେ ମରବା ଡଣ୍ଡ ମିଲ ବଲି କଇଲାଇ ।

୬୫ ତେଇ ରଇଲା କେତେ ଲକ୍ମନ୍ ତାର ଉପରେ ତୁକ୍‌ବାର ଦାରଲାଇ । କେତେଲକ୍ମନ୍ ତାର ମୁର୍ଖି ଡାବିକରି ତାକେ ବିଦାସଙ୍ଗ ମାରଲାଇ । ତାକେ କିଜାଇକରି କଇଲାଇ, “ତୁଇ ଜଦି ପରମେସରର କାତା କଇବା ବବିସଡ଼ବକ୍‌ତା ବଇଲେ, ତକେ କେ ମାରଲା କ ?” ପଟେ ସନିଅମନ୍ ତାକେ ଦାରିଜାଇକରି ମାରଲାଇ ।

ପିତର ଜିସୁକେ ନାଜାନି ବଲି କଇଲା

(ମାତିଉ ୨୭:୨୯-୩୫; ଲୁକ୍ ୨୨:୫୭-୬୨; ଜଅନ୍ ୧୮:୧୫-୧୮, ୨୧-୨୫)

୬୬ ପିତର ମଜାତାଣ୍ଡେ ଚିଆଅଇଲାବେଲେ ବଡ଼ ପୁଜାରିର ଗତି ଦାଙ୍ଗଡ଼ି ତେଇ ଆଇଲା । ୬୭ ପିତର ଜଇ ଚେକ୍‌ବାବେଲେ ତାକେ ନିମାନ୍ ଦେକିକରି କଇଲା, “ତୁଇମିସା ନାଜରିତର ଜିସୁର ସଙ୍ଗ ରଇଲୁସ୍ ।”

୬୮ ମାତର ପିତର ତାକେ କଇଲା, “ସେଟା ମୁଇ ନଇ, ମୁଇ କେବେ ମିସା ଜିସୁର ସଙ୍ଗ ରଇନାଇ, ତମେ କାଇଟା କଇଲାସ୍‌ନି ମୁଇ ନାଜାନି ।” ତାରପଟେ ପିତର ତାଣ୍ଡେ ପୁରବା ବାଟେ ଉଟିଗାଲା ।

୭୯ ଆରି ତରେକ୍ ଗତିଦାଙ୍ଗ୍ତି ପିତରକେ ଦେକି ତେଇ ଚିଆଅଇଲା ଲକ୍ମନ୍‌କେ କଇଲା, “ଏ ଲକ୍ମନ୍ ମିସା ଜିସୁର୍ ଦଲେଅନି ଗଟେକ୍ ଲକ୍ମନ୍ ।” ୭୦ ମାତର୍ ପିତର୍ ଆରିତରେକ୍ କଇଲା, “ଏ କାତା ମୁଲ୍‌କେ ସତ୍ ନାଇ ।” ଆରି କେତେପର୍ ଗାଲା ପତେ, ତେଇ ରଇଲା ଲକ୍ମନ୍ “ତୁଇ ସେମନ୍‌ର୍ ମାନ୍ଦାଇ ରଇଲୁସ୍ ଆକା, ତୁଇ ଗଟେକ୍ ଗାଲିଲି ଅନି ଆଇଲା ଲକ୍ମନ୍ ପାରା ତିସ୍‌ଲୁସ୍‌ନି ।” ବଲି କଇଲାଇ ।

୭୧ ମାତର୍ ପିତର୍ ସାଇପ୍ ଦେଇ ରାନ୍ ପାକାଇ କଇଲା, “ମୁଇ ପର୍‌ମେସରର୍ ନାଉ ଦାରି ପର୍‌ମାନ୍ କରି କଇଲିନି, ତମେ କାର୍ କାତା କଇଲାସ୍‌ନି, ମୁଇ ତାକେ ମୁଲ୍‌କେ ନାଜାନି ।”

୭୨ ପିତର୍ ଏ କାତା କଇଲା ଦାପ୍‌ରେ କୁକ୍‌ତା ଦୁଇତର୍ ଡାକଲା । ଜିସୁ କଇରଇବା ସବୁ କାତା ପିତର୍ ଏତାଇଲା । ଜିସୁ କଇରଇଲା, କୁକ୍‌ତା ଦୁଇତର୍ ଡାକ୍‌ବା ଆଗ୍‌ତୁ ତୁଇ ମକେ ତିନ୍ ତର୍ ନାଜାନି ବଲିକରି କଇସାରାଇରଇସୁ ବଲି । ତାର୍‌ପତେ ପିତର୍ ବେସି ଦୁକ୍‌କରି କାନ୍‌ବାର୍ ଦାରଲା ।

୧୫

ପିଲାତର୍ ମୁଆଟେ ଜିସୁର୍ ବିଚାର

(ମାତିଡ ୨୭:୧-୨, ୧୧-୧୪; ଲୁକ୍ ୨୩:୧-୫; ଜଅନ୍ ୧୮:୨୮-୩୮)

୧ ସାକାଲ୍ ସାକାଲ୍ ପାର୍‌ତନା ଗରର୍ ମୁକିଅ ପୁଜାରିମନ୍, ମୁକିଅ ନେତାମନ୍, ଜିଉଦି ନେତାମନ୍, ନିୟ୍‌ମ୍ ସିକାଇବା ଲକ୍ମନ୍ ଆରି ଜିଉଦି ଲକ୍ମନ୍‌କେ ସାସନ୍ କର୍‌ବା ସବୁ ରକାମର୍ ନେତାମନ୍ ଜିସୁକେ କାଇଟା କର୍‌ବାର୍ ଆଟେ ? ବଲି ଗଟେକ୍ ବଡ୍ ପଠାଦି କଲାଇ । ସେମନ୍ ତାକେ ବାନ୍ଦିକରି ସାସନ୍ କର୍‌ବା ପିଲାତକେ ସର୍‌ପିଦେଲାଇ । ୨ ପିଲାତ୍ ଜିସୁକେ ପାଚାରଲା, “ତୁଇ କାଇ ଜିଉଦି ମନ୍‌ର୍ ରାଜା ?” ଜିସୁ ତାକେ କଇଲା, “ତୁଇ ଜନ୍‌ଟା ପାଚାରଲୁସ୍‌ନି, ସେଟା ସତ୍‌ସେ ।” ୩ ମୁକିଅ ପୁଜାରିମନ୍ ଜିସୁକେ ଦସ୍ ଦେଇ କଇବାର୍ ଦାରଲାଇ । ୪ ସେବେଲା ପିଲାତ୍ ତାକେ ଆରିତରେକ୍ ପାଚାରଲା, “ତୁଇ କାଇକେ ଚିମ୍‌ରା ଅଇଦେଲୁସ୍ ? କାଇଟା ମିସା କଉସ୍ ନାଇ । ଦେକା ସେମନ୍ ତର୍ ବିରଦେ କେତେକ୍ ନିନ୍ଦା କାତା କଇଲାଇନି

୧୫ ମାତର ଜିସୁ କାତା ଅଏ ନାଇ । ସେଟା ଦେକିକରି ପିଲାଡ଼ ବେସି କାବା ଅଇଗାଲା ।

ପିଲାଡ଼ ଜିସୁକେ ମୁକ୍ତଲାଇ ନାପାରଲା

(ମାତିଉ ୨୭:୧୫-୨୬; ଲୁକ୍ ୨୩:୧୩-୨୫; ଜଅନ୍ ୧୮:୩୯; ୧୯:୧୬)

୧୬ ରକିଆ ପାଇବାର ପରବ୍ କଲାବେଲେ ସବୁ ବରସର୍ ରିତିନିତି ଇସାବେ ପିଲାଡ଼, ଜନ୍ ଆଲେ ବନ୍ଦି ଲକ୍‌କେ, ଲକ୍‌ମନ୍ ବାର୍‌କରାଇ ଦେବାକେ ମନ୍ କରତେରଇଲାଇ, ତାକେ ବାର୍‌କରାଇ ଦେଇତେରଇଲା । ୧୭ ସେବେଲେ ସର୍‌କାରର୍ ବିରୁଦେ ଦାବିକରି ବାର୍‌ବା ନାଉର୍ ଗଟେକ୍ ଲକ୍ ବନ୍ଦି ଅଇରଇଲା । ଏ ଲକ୍ ଆରି କେତେଟା ଲକ୍‌ମନ୍‌ର ସଙ୍ଗ୍, ଲକ୍‌ମନ୍‌କେ ମରାଇ ବନ୍ଦି ଅଇରଇଲା । ୧୮ ଲକ୍‌ମନ୍ ପିଲାଡ଼ଟାଣେ ଆସି, କଇଲାଇ, “ସବୁ ବରସର୍ ରିତିନିତି ଇସାବେ ଏ ତରେକ୍ ମିସା ଗଟେକ୍ ବନ୍ଦି ଲକ୍‌କେ ମୁକ୍ତଲାଇ କରି ବାର୍‌କରାଇଦେସ୍ ।” ୧୯ ପିଲାଡ଼ ଲକ୍‌ମନ୍‌କେ ପାଚାରଲା, “ତମେ କାକେ ମନ୍ କଲାସ୍‌ନି ? ମୁଇ ତମର୍ ଲାଗି ଜିଉଦିମନ୍‌ର ରାଜାକେ ଚାଡ଼ିଦେବି କି ?” ୨୦ ପିଲାଡ଼ ରାଜା କାଇକେ ଏନ୍ତି କଇଲା ବଇଲେ, ମୁକ୍ତି ପୁଜାରିମନ୍ କୁର୍ ପାଁଟି ଜିସୁକେ ତାର୍ ଆତେ ସର୍‌ପିଦେଇ ଆତଡ଼ ବଲିକରି ସେ ଜାନିରଇଲା ।

୨୧ ମାତର୍ ମୁକ୍ତି ପୁଜାରିମନ୍ ଲକ୍‌ମନ୍‌କେ ଉସକାଇ କରି, “ଜିସୁର୍ ବାଦୁଲେ ବାର୍‌ବାକେ ଆମର୍‌ପାଇ ବନ୍ଦି ଗରେଅନି ମୁକ୍ତଲାଇବାକେ କୁଆ ।” ବଲି କଇଲାଇ । ୨୨ ମାତର୍ ପିଲାଡ଼ ଆରିତରେକ୍ ପାଚାରଲା, “ସେନ୍ତିଆଲେ ତମେ ଜନ୍ ଲକ୍‌କେ ଜିଉଦିମନ୍‌ର ରାଜା ବଲି କଇଲାସ୍‌ନି, ତାକେ ମୁଇ କାଇଟା କର୍‌ବି ବଲି ତମେ ମନ୍ କଲାସ୍‌ନି ?”

୨୩ ଲକ୍‌ମନ୍ ବେସି ରାଟୁକରି କଇଲାଇ, “ତାକେ କୁର୍‌ସେ ମରାଆ ।”

୨୪ ତେଇଅନି ପିଲାଡ଼ ଆରିତରେକ୍ ଲକ୍‌ମନ୍‌କେ ପାଚାରଲା, “କାଇକେ, ସେ କାଇ ଦସ୍ କଲାଆତେ ଜେ ?” ମାତର୍ ଲକ୍‌ମନ୍ ଅଦିକ୍ ଅଦିକ୍ ରାଟୁଅଇକରି କଇଲାଇ, “ତାକେ କୁରୁସ୍ କାଟେ ମରାଆ ।”

୨୫ ସେଟାପାଇ ପିଲାଡ଼ ଲକ୍‌ମନ୍‌କେ ସାର୍‌ଦା କରାଇବାକେ ମନ୍‌କରି ବାର୍‌ବାକେ ବନ୍ଦି ଗରେଅନି ମୁକ୍ତଲାଇଦେଇ ଜିସୁକେ

କରତା ସଙ୍ଗ ମାରି, କୁରୁସକାଟେ କୁଟିମାରି ମରାଇଦେବାକେ ସନିଅମନକେ ସରପିଦେଲା ।

ସନିଅମନ ଜିସୁକେ କିଜାଇଲା

(ମାତିଉ ୨୭:୨୭-୩୧; ଜଅନ୍ ୧୯:୨-୩)

୧୭ ସନିଅମନ ଜିସୁକେ ରମିୟ ସରକାରର ସାସନକାରିଆ ପିଲାତର, ମୁକିଅ ଗରର ତାଣ୍ଡେ ଦାରିଗାଲା ଆରି ସେମନ୍ ବିନ୍ ସନିଅମନକେ ଗଟେକ ଟାନେ ତାକି ରୁଣ୍ଡାଇଲା । ୧୭ ସେମନ୍ ଜିସୁକେ କିଜାଇବାକେ ଜାମ୍‌କଲି ରଙ୍ଗର ବସତର ପିନ୍ଧାଇଲା ଆରି ଗଟେକ କାଟାର ମୁକୁଟ ତିଆରକରି ତାର ମୁଣ୍ଡେ ପିନ୍ଧାଇଦେଲା । ୧୮ ସେମନ୍ ଜିସୁକେ କିଜାଇ କରି କଇଲା, “ଏ ଜିଉଦିମନର ରାଜା ତକେ ଜୁଆର, ତୁଇ ବେସି ଦିନ ବର୍ତ୍ତ ।” ୧୯ ସେମନ୍ ତରକେତର ବେତ ତାଙ୍ଗ ସଙ୍ଗ ତାର ମୁଣ୍ଡେ ମାରତେରଇଲା ଆରି ତାର ଉପରେ ତୁକି କିଜାଇକରି ମାଣ୍ଡିକୁଟା ଦେଇ ଜୁଆର କଲା । ୨୦ ସେମନ୍ ଜିସୁକେ କିଜାଇ ସାରାଇଲାପତେ, ଜାମ୍‌କଲି ରଙ୍ଗର ବସତର ତାର ଗାଗଡେଅନି ବେଟିକରି, ନିଜର ବସତର ପିନ୍ଧାଇଦେଲା । ତାରପତେ ସେମନ୍ ତାକେ କୁରୁସକାଟେ ମରାଇବାକେ ଗଡ଼ ବାଇରେ ଦାରିଗାଲା ।

କୁରସେ ଜିସୁର ମରନ୍

(ମାତିଉ ୨୭:୩୨-୪୪; ଲୁକ୍ ୨୩:୨୬-୪୩; ଜଅନ୍ ୧୯:୧୭-୨୭)

୨୧ ☆ସେବେଲା ଆଲେକ୍‌ଜାଣ୍ଡାର ଆରି କୁରନିୟ ଜାଗାର ରୁପଅର୍ ବାବା ସିମନ୍ ନାଉଁର ଗଟେକ ଲକ୍, ପଲିଗାରାମ୍ ଅନି ଆସିକରି ସେ ବାଟେ ଜାଇତେରଇଲା । ସେ ସନିଅମନ୍ ତାକେ ଜିସୁର କୁରସ ବଇବାକେ ବାଦିଅ କଲା । ୨୨ ତାରପତେ ସେମନ୍ ଜିସୁକେ ଗଲ୍‌ଗତା ନାଉଁର ଗଟେକ ଜାଗାଇ ଦାରିଗାଲା । ଗଲ୍‌ଗତାର ଅରଡ଼ ଅଇଲାନି, କାପାଲ୍ ଜାଗା । ୨୩ ସେମନ୍ ଜିସୁକେ ଅସ ମିସାଇଲା ଅଙ୍ଗୁର ରସ କାଅ ବଲିକରି ଦେଲା, ମାତର ସେ ନିର୍ଲା । ୨୪ ତାରପତେ ଜିସୁକେ କୁରସେ ଚଗାଇଲା ଆରି ତାର ବସତର କାରବାଗେ କାଇଟା ମିଲ୍‌ସି ବଲି ବାଟାକରି ନେବାକେ, କେଡ଼ ପୁଟାଇକରି ନିଜର ନିଜର ବିଡ଼ରେ ବାଟାକରି ନେଲା । ୨୫ ସେମନ୍

☆ ୧୫:୨୧ ୧୫:୨୧ ରମିୟ ୧୭:୧୩

ସାକ୍ଷୀଆ ନ ଗଠା ବେଲାଈ ଜିସୁକେ କୁରସେ ଚଗାଇଲାଈ । ୨୬ ଆରି
 “ଏଟା ଜିଉଦିମନର ରାଜା ।” ବଲି ନିନ୍ଦା କାତା ଲେକି କୁରୁସ୍ ଉପରେ
 ଡସାଇଲାଈ । ୨୭ କୁରସେ ଜିସୁର୍ ସଙ୍ଗ୍ ଆରି ଦୁଇଟା ଚର୍ମନ୍ଦକେ,
 ତାର ଉଜାବାଟେ ଗଟେକ୍‌କେ, ଡେବ୍‌ରି ବାଟେ ଆରିଗଟେକ୍‌କେ
 ଚଗାଇରଇଲାଈ । ୨୮ ସେ ବୁଲ୍ କଲା ଲକ୍‌ମନର୍ ବିଡ଼ରେଅନି
 ଗଟେକ୍ ଲକ୍ ବଲି, ଇସାବ୍ ଅଇଲା ବଲିକରି *ପର୍ମେସରର୍
 ସାସ୍‌ତରେ ଲେକାଅଇରଇବା ବିସଇ ସିଦ୍ ଅଇଲା । ୨୯ ଯେ ବାଟ୍
 ଦେଇ ଜିବା ଲକ୍‌ମନ୍ ନିଜେ ନିଜେ ମୁଣ୍ଡ ଢୁଲାଇ ଜିସୁକେ ନିନ୍ଦାକରି
 କଇଲାଈ, “ପାର୍ତନା ଗର୍ ବାଙ୍ଗାଈ କରି ତିନ୍‌ଦିନ୍ ବିଡ଼ରେ ତିଆର୍
 କର୍‌ବାଲକ୍ ଏ ସେ କି ?” ବଲି କିଜାଇଲାଈ । ୩୦ “ତୁଇ ଏବେ
 କୁରସେ ଅନି ଉଡ଼ରି ନିଜ୍‌କେ ରକିଆ କର୍ ।”

୩୧ ମୁକିଅ ପୁଜାରିମନ୍ ଆରି ନିୟମ୍ ସିକାଇବା ଲକ୍‌ମନ୍ ମିସା
 ନିଜର୍ ନିଜର୍ ବିଡ଼ରେ କାତାଅଇକରି କିଜାଇଲାଈ । ସେମନ୍
 କଇତେରଇଲାଈ, “ବିନ୍ ଲକ୍‌ମନ୍‌କେ ରକିଆ କର୍‌ତେରଇଲା,
 ମାତର୍ ସେ ନିଜେ ରକିଆ ଅଇ ନାପାରଲା ।” ୩୨ “ତମେ
 ସତଇସେ ଇସ୍ରାଏଲର୍ ରାଜା କିରିସ୍‌ଟ ଅଇରଇଲେ, କୁରସେ
 ଅନି ଉଡ଼ରି ଆଉ । ସେନ୍ତି ଅଇଲେ ଆମେ ଦେକିକରି ବିସ୍‌ବାସ୍
 କର୍‌ବୁ ।” ବଲି କଇଲାଈ । ଜନ୍ ଲକ୍‌ମନ୍‌କେ ଜିସୁର୍ ସଙ୍ଗ୍ କୁରସେ
 ଚଗାଇରଇଲାଈ, ସେମନ୍ ମିସା ଜିସୁକେ ନିନ୍ଦା କଲାଈ ।

ଜିସୁର୍ ମରନ୍

(ମାତିଉ ୨୭:୪୫-୫୬; ଲୁକ୍ ୨୩:୪୫-୪୯; ଜଅନ୍ ୧୯:୨୮-୩୦)

୩୩ ମୁଇଦାନିଆ ବାର୍‌ଟା ବେଲାଈଅନି ତିନ୍‌ଟା ଜାକ ଗୁଲାଈ ଦେସ୍
 ଆନ୍ଦାର୍ ଅଇଗାଲା । ୩୪ ଦିନ୍ ତିନ୍‌ଟା ବେଲେ ଜିସୁ ଆଉଲିଅଇ
 କଇଲା, “ଏଲଇ ଏଲଇ ଲାମା ସବକ୍‌ତାନି ।” ଆର୍ ଅରଡ଼ ଅଇଲାନି,
 “ଏ ମର୍ ପର୍ମେସର୍ ଏ ମର୍ ପର୍ମେସର୍, ତମେ ମକେ କାଇକେ
 ଚାଡ଼ିଦେଲାସ୍ ?”

୩୫ ଏ କାତା ସୁନି ସେଲଗେ ଚିଆ ଅଇରଇବା କେତେ ଲକ୍
 କଇଲାଈ, “ସେ ଏଲିୟକେ ଡାକ୍‌ଲାନି ।” ୩୬ ତେଇଅନି ଗଟେକ୍ ଲକ୍

* ୧୫:୨୮ ୧୫:୨୮ କେତେକ୍ ପୁରନା ଲେକାଈ ଏଟା ଲେକାଅଏନାଇ ☆ ୧୫:୨୯
 ୧୫:୨୯ ମାର୍ଚ୍ଚକ ୧୪:୫୮; ଜଅନ୍ ୨:୧୯

ପାଲାଇ ଜାଇ ଅଙ୍ଗୁର୍ ରସେ, ତୁଲା ବୁଡାଇ ଡାଙ୍ଗେ ବାନ୍ଧି ଉପ୍ରେ ଲାମାଇଦେଲା । ସେ ଲକ୍ କଇଲା, “ଏବେ ଏଲିୟ ଆସିକରି ଆକେ କୁର୍ସେ ଅନି ଉଡ଼ରାଇଦେଇସି କି ନାଇ ଦେକୁ ।”

^{୩୭} ମାତର୍ ଜିସୁ ଆଉଲିଅଇଲା ଦାପ୍ରେ ତାର୍ ଜିବନ୍ ଚାଡ଼ିଗାଲା ।

^{୩୮} ସେବେଲା ମନ୍ଦିରର୍ ସୁକଲ୍ ଜାଗା ବିନେ କର୍ବା ପାର୍ଦା ଉପ୍ରେଅନି ତଲେ ଜାକ ଦୁଇ ତାଡ଼ ଅଇ ଚିରିଅଇଗାଲା । ^{୩୯} ତେଇ ଜିସୁର୍ କୁର୍ସ ମୁଆଟେ ଟିଆଅଇରଇଲା ସଏଟା ସନିଅମନର୍ ମୁକିଅ, ଜିସୁ ସାରାସାରି ଆଉଲି ଅଇଲାଟା ଆରି ସେ କେନ୍ତ୍ର ଅଇକରି ମଲା, ଦେକିକରି କଇଲା, “ସତଇସେ ଏ ପର୍ମେସରର୍ ପିଲା ରଇଲା ।”

^{୪୦} ✧ତେଇ କେତେଟା ମାଇଜିମନ୍ ମିସା କୁର୍ସେ ଅନି ଦୁରିକେ ଟିଆଅଇ ଦେକ୍ତେରଇଲାଇ । ସେମନ୍ ଅଇଲାଇନି, ମଗ୍ଦଲିନି ମରିୟମ୍, ସାନ୍ଟା ଜାକୁବ୍ ଆରି ଜସିର୍ ମା ମରିୟମ୍ ଆରି ସଲମି । ^{୪୧} ଜିସୁ ଗାଲିଲିତେଇ ରଇଲାବେଲେ ଏ ମାଇଜିମନ୍ ଜିସୁର୍ ସଙ୍ଗ୍ ଜାଇତେରଇଲାଇ । ଆରି ତାକେ ଦରକାର୍ ରଇଲା ବିସଇ ସାଇଜ କର୍ତେରଇଲାଇ । ଜିସୁର୍ ସଙ୍ଗ୍ ଜିରୁସାଲାମେ ଆସିରଇଲା ବିନ୍ ମାଇଜିମନ୍ ମିସା ତେଇ ରଇଲାଇ ।

ଜିସୁର୍ ମଲା ମଡ଼ ରାଙ୍ଗ୍ନି କାଟି ତିଆର୍ କଲା ପାଆର୍ ବିଡ଼ରେ ସଙ୍ଗ୍ଇଲାଇ

(ମାତିଉ ୨୭:୫୭-୬୧; ଲୁକ୍ ୨୩:୫୦-୫୬; ଜଅନ୍ ୧୯:୩୮-୪୨)

^{୪୨} ସେ ଦିନ୍ ବିସ୍ରାମ୍ ଦିନ୍ ପାଇ ତିଆର୍ ଅଇବା ଦିନ୍ ଅଇରଇଲା । ସେଦିନେ ସଞ୍ଜବେଲା, ^{୪୩} ଆରାମାତିଆ ଗାଉଁର୍ ବିଚାରକର୍ବା ମୁକିଅ ଲକ୍ ବିଡ଼ରେ ରଇଲା ଜସେପ୍ ନାଉଁର୍ ଗଟେକ୍ ଲକ୍, ପର୍ମେସର୍ ସାସନ୍ କର୍ବା ରାଇଜର୍ ବେଲା ଆସ ବଲି ଜାଗିରଇବା ଗଟେକ୍ ଲକ୍ । ବେସି ସାଆସ୍ଅଇ ପିଲାତର୍ ଲଗେ ଜାଇକରି ଜିସୁର୍ ମଲାମଡ଼ ମାଙ୍ଗ୍ଲା । ^{୪୪} ଜିସୁ ଏତେକ୍ ଦାପ୍ରେ ମରିଗାଲା ବଲି ସୁନି ପିଲାଡ଼ କାବା ଅଇଗାଲା । ତାର୍ ସନିଅମନର୍ ନେତାକେ ଡାକି “ଜିସୁ ମଲାବେ କି ?” ବଲି ପାଚାର୍ଲା । ^{୪୫} ସେ ସନିଅମନର୍ ନେତା, ଜିସୁ ମରିଗାଲା ବିସଇ ପିଲାଡ଼କେ କଇଲା । ତାର୍ପଟେ ଜସେପ୍କେ ପିଲାଡ଼ କଇଲା, “ତୁଇ ମଡ଼ ନେଇ ପାରୁସ୍ ।” ^{୪୬} ସେଟାପାଇ

✧ ୧୫:୪୦ ୧୫:୪୦ ଲୁକ୍ ୮:୨,୩

ଜସେପ୍ ଜିସୁର ଗାଗଡ଼ କୁରସ ଉପରେଅନି ଉଡ଼ରାଇ ଆନ୍‌ଲା ଆରି ଗଟେକ୍ ନୁଆ ଲୁଗା ସଙ୍ଗ୍ ଗୁଡ଼ିଆଇକରି ରାଙ୍ଗନି କାଟି ତିଆର୍ କରି ରଇଲା ଗଟେକ୍ ପାଆରେ ନେଇକରି ସଙ୍ଗାଇଲା । ଗଟେକ୍ ବଡ଼ ଚାତଡ଼ା ପାକ୍‌ନା ନେଇ ପାଆର୍ ମୁଆଟେ ଡାବିଦେଲା । ^{୪୭} ଜିସୁକେ ଜନ୍ ଜାଗାଇ ନେଇ ସଙ୍ଗାଇ ରଇଲାଇ, ସେ ଜାଗା ମଗ୍‌ଦଲିନି ମରିୟମ୍ ଆରି ଜସିର୍ ମା ମରିୟମ୍ ଦେକିରଇଲା ।



ଜିସୁ ମରିକରି ଉଟ୍‌ଲା

(ମାତିଉ ୨୮:୧-୮; ଲୁକ୍ ୨୪:୧-୧୨; ଜଅନ୍ ୨୦:୧-୧୦)

^୧ ବିସରାମ୍‌ବାର୍ ସାର୍‌ଲା ତାର୍ ଆରକର୍ ଦିନେ ମଗ୍‌ଦଲିନି ମରିୟମ୍, ଜାକୁବର୍ ମାଆ ମରିୟମ୍ ଆରି ସଲମି, ଜିସୁର୍ ମଲା ଗାଗ୍‌ଡେ ଲାଗାଇବାକେ ବାସ୍‌ନା ଟିକନ୍ ଗେନିଆନ୍‌ଲାଇ । ^୨ ରଇବାର୍ ଦିନର୍ ସାକାଲ୍ ସାକାଲ୍ ସେମନ୍ ତାର୍ ଗାଗଡ଼ ସଙ୍ଗାଇଲା ଜାଗାକେ ଜାଇତେରଇଲାଇ । ସେବେଲେ ବେଲ୍ ଉଦି ଆଇତେରଇଲା । ^୩ ସେମନ୍ ନିଜର୍ ନିଜର୍ ବିଡ଼ରେ “ଜିସୁର୍ ଗାଗଡ଼ ସଙ୍ଗାଇରଇଲା ମୁଆଟର୍ ବଡ଼ ଚାତଡ଼ା ପାକ୍‌ନା ଆମର୍ ପାଇ କେ ଗୁଚାଇଦେଇସି ତେବେ ?” ବଲି କାତା ଅଇତେରଇଲାଇ । ^୪ ସେମନ୍ ସେ ଜାଗାଇ କେଟିକରି ଦେକ୍‌ଲାବେଲେ, ଏଦେ ଦେକା ! ସେ ବଡ଼ ଚାତଡ଼ା ପାକ୍‌ନା ଗୁଟିଜାଇରଇଲା । ^୫ ସେବେଲା ସେମନ୍ ସେ ଜାଗା ବିଡ଼ରେ ପୁରିକରି ଦେକ୍‌ଲାବେଲେ ଗଟେକ୍ ବିଜ୍‌ଲି ପାରା ଜଗଜଗି ଜାଇତେରଇବା ଦବ୍ ପଟିଆ ପିନ୍‌ରଇବା ଦାଙ୍ଗ୍‌ଡ଼ା, ଜିସୁର୍ ମଡ଼ ସଙ୍ଗାଇରଇଲା ଜାଗାର୍ ଉଜାବାଟେ ବସିରଇଲା । ସେଟା ଦେକି ସେମନ୍ ବେସି ତରିଜାଇ କାବା ଅଇଗାଲାଇ ।

^୬ ମାତର୍ ସେ ଲକ୍ ସେମନ୍‌କେ କଇଲା, “ତରାନାଇ, ତମେ କୁରସେ ମଲା ନାଜରିଡ଼ ଗଡ଼ର୍ ଜିସୁ କିରିସଟକେ କଜ୍‌ଲାସ୍‌ନି କି ? ସେ ଇଡ଼ି ନାଇନି, ଏବେ ମଲାଗାନେଅନି ଉଟ୍‌ଲା ଆଟେ । ତାର୍ ମଡ଼ ସଙ୍ଗାଇଲା ଜାଗା ଦେକା ।” ବଲି କଇଲା । ^୭ ☆ “ତମେ ଜାଇକରି ତାର୍ ସିସମନ୍‌କେ ଆରି ପିତର୍‌କେ ବାଇଦରେ କୁଆ, ତମେ

☆ ୧୭:୭ ୧୭:୭ ମାତିଉ ୨୭:୩୨; ମାର୍ଚ୍ଚ ୧୪:୨୮

ଜିବା ଆଗତୁ ଜିସୁ ଗାଲିଲି ଗଡେ ଗାଲା ଆଚେ । ସେ ତମ୍ଭେ ଜେନ୍ତି କଇରଇଲା, ସେନ୍ତିସେ ଗାଲିଲି ଗଡେ ତାକେ ଦେକ୍‌ସା ।” ବଲି କଇଲା । ୮ ସେ ମାଇଜିମନ୍ ବେସି କାବା ଅଇଜାଇ, ତରତରି ଜାଇକରି ସେ ଜାଗାଇଅନି ବାରଇକରି ପାଲାଇଲାଇ ଆରି ସେମନ୍ ବେସି ଡରିଜାଇକରି କାକେ ମିସା କାଇବଲି କଅଡ୍‌ନାଇ ।

ଜିସୁ ବେସି ଲକ୍‌ମନ୍‌କେ ଦେକାଇଅଇଲା

(ମାତିଉ ୨୮:୯-୧୦; ଜଅନ୍ ୨୦:୧୧-୧୮)

୯ ଜିସୁ ମଲାଟାନେଅନି ଉର୍ଲା ଆଚର୍ ପର୍ତୁମ୍ ଦିନର୍ ସାକାଲେ ଜନ୍ ମାଇଜିଟାନେଅନି ଜିସୁ ସାଡ଼ଟା ହୁମାମନ୍‌କେ କେଦିରଇଲା, ମଗ୍‌ଦଲିନି ନାଉର୍ ମରିୟମ୍‌କେ ପର୍ତୁମ୍ ଦେକାଇଅଇଲା । ୧୦ ସେ ମାଇଜି ତେଇଅନି ଜାଇକରି, ଦୁକ୍‌ଅଇ କରି କାନ୍‌ତେ ରଇଲା ଜିସୁର୍ ସିସ୍‌ମନ୍‌କେ କଇଲା, ୧୧ “ଜିସୁ ମଲାତେଇଅନି ଉର୍ଲା ଆଚେ ଆରି ମୁଇ ତାକେ ନିଜେ ଦେକିଆଟି ।” ବଲି କଇଲା । ସିସ୍‌ମନ୍ ତାକେ ମୁଲ୍‌କେ ବିସ୍‌ବାସ୍ କରଡ୍ ନାଇ ।

ଜିସୁ ଦୁଇଟା ସିସ୍‌ମନ୍‌କେ ଦେକାଇ ଅଇଲା

(ଲୁକ୍ ୨୪:୧୩-୩୫)

୧୨ ତାର୍‌ପଚେ ଦୁଇଟା ସିସ୍‌ମନ୍ ଗଟେକ୍ ଗାଏଁ ଜିବାବେଲେ ଜିସୁ ସେମନ୍‌କେ ବିନ୍ ରୁପେ ଦେକାଇଅଇଲା । ସିସ୍‌ମନ୍ ତାକେ ଚିନି ନାପାରୁଲାଇ । ୧୩ ସେ ଦୁଇଟା ସିସ୍‌ମନ୍ ବାଉଡିଆସିକରି ବିନ୍ ସିସ୍‌ମନ୍‌କେ ଏ କାତା କଇଲାଇ । ଏନ୍ତି କଇଲେ ମିସା ସିସ୍‌ମନ୍ ତାକର୍ କାତା ବିସ୍‌ବାସ୍ କରଡ୍ ନାଇ ।

ଜିସୁ ବେସି ଲକ୍‌ମନ୍‌କେ ଦେକାଇଅଇଲା

(ମାତିଉ ୨୮:୧୬-୨୦; ଲୁକ୍ ୨୪:୩୬-୪୯; ଜଅନ୍ ୨୦:୧୯-୨୩; ପେରିଡ୍ ୧:୬-୮)

୧୪ ତାର୍‌ପଚେ ଏଗାର୍‌ଟା ସିସ୍‌ମନ୍ କାଇବାବେଲେ ଜିସୁ ସେମନ୍‌କେ ଦେକାଇଅଇଲା । ଜିସୁ ମଲାଟାନେଅନି ଉର୍ଲାଟା ଦେକିରଇଲା ଲକ୍‌ମନ୍ କଇଲା କାତା ବିସ୍‌ବାସ୍ ନ କରି, ସେମନ୍‌ର୍ ମନ୍ ଆର୍ କଲାର୍ ଲାଗି ସେମନ୍‌କେ ଲାଗୁଲା । ୧୫ ✧ ଜିସୁ ସେମନ୍‌କେ

କଲିଲା, “ତମେ ଏ ଦୁନିଆର ଗୁଲାଇବାଟେ ଜାଇକରି ସବୁ ଲକ୍ଷ୍ମୀମାନଙ୍କେ ମର ନିମାନ୍ କାତା କୁଆ । ୧୭ ଜେ ଜେ ଏ ନିମାନ୍ କାତା ବିସ୍‌ବାସ୍ କରି ତୁବନ୍ ନେବାଇ, ସେମନ୍ ପାପେଅନି ରକିଆ ପାଇବାଇ, ମାତର୍ ଜେ ଜେ ଏ ନିମାନ୍ କାତା ବିସ୍‌ବାସ୍ ନ କରତ୍, ପର୍ମେସର୍ ସେମନ୍‌କେ ତଣ୍ଡ ଦେଇସି । ୧୮ ଆରି ବିସ୍‌ବାସି ଲକ୍ଷ୍ମୀମନ୍ ମର ନାଉଁ ଦାରି ତୁମାମନ୍‌କେ ବାରକରାଇ କେଦିଦେବାଇ ଆରି ନାଜାନିରଇବା ବାସାଇ କାତା ଅଇବାଇ । ଏନ୍ତି ବିସ୍‌ବାସ୍ କରବା ଲକ୍ଷ୍ମୀମନ୍‌ରଟାନେ ଗଟେକ୍ ଚିନ୍ ପାରା ଅଇସି । ୧୯ ସେମନ୍ ନାଜାନିକରି ସାଁପ୍ ଆତେ ଦାରଲେ କି ବିସ୍ କାଇଲେ ନ ମରତ୍ । ଜର୍ତୁକାର ଲକ୍ଷ୍ମୀମନ୍‌କେ ଆତ୍ ଚିଇ କରି ପାରତନା କଲେ, ସେଲକ୍‌ମନ୍ ନିମାନ୍ ଅଇଜିବାଇ” ବଲି କଇଲା ।

ଜିସୁ ସରଗେ ଗାଲା

(ଲୁକ୍ ୨୪:୫୦-୫୩; ପେରିତ୍ ୧:୯-୧୧)

୧୯ ✠ମାପୁରୁ ଜିସୁ ଏ ସବୁ କାତା ସେମନ୍‌କେ କଇ ସାରାଇଲା ପଟେ, ପର୍ମେସର୍ ତାକେ ସରଗେ ଦାରିଗାଲା ଆରି ପର୍ମେସର୍ ସନ୍‌ମାନ୍ ଜାଗାଇ ବସଲା । ୨୦ ତାର୍‌ପଟେ ତାର୍ ସିସ୍‌ମନ୍ ଜାଇକରି ଏ ଦୁନିଆର ଗୁଲାଇବାଟେ ମାପୁରୁ ଜିସୁର ନିମାନ୍ କାତା କଇଲାଇ ଆରି ମାପୁରୁ ତାକର୍ ସଙ୍ଗ୍ ରଇକରି କାବାଅଇଜିବା ବିନ୍ ବିନ୍ କାମ୍ କଲା । ଏନ୍ତାରି ସେମନ୍ କଇବା କାତା ସତ୍ ବଲି ଦେକାଇଦେଲା । *

✠ ୧୭:୧୯ ୧୭:୧୯ ପେରିତ୍ ୧:୯-୧୧
ମାର୍ଚ୍ଚକ ୧୭, ୯-୨୦ ନ ମିଲେ

* ୧୭:୨୦ ୧୭:୨୦ କେତେଟା ପୁରନା ଲେକାଇ

ସତ୍ତ୍ୱର ବାବ୍
The New Testament in the Desiya language of India:
ସତ୍ତ୍ୱର ବାବ୍ (Bible)

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

ସତ୍ତ୍ୱର ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde